

**NATIONAL ASSEMBLY OF  
SEYCHELLES**

*Wednesday 19th October, 2022*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Mersi. Bonzour tou Manm Onorab e nou *staff* ki pe asiste nou. E Manm piblik ki pe swiv nou. Byenveni pou nou travay lazournen. Avan nou al lo nou biznes regilye mon a donn laparol Onorab Andre pou en pti deklarasyon lo lapar son Komite Defans e Sekirite. Onorab.

**HON CLIFFORD ANDRE**

Mersi Mr Speaker. Bonzour Mr Speaker. Bonzour tou Manm Onorab. Bonzour tou dimoun ki a lekout. En bonzour spesyal pou nouvo Sef D’Eta Mazor Lafors Defans.

Mr Speaker mon remerisi ou pou donn mwan sa loportinite e koman Chairman Komite Defans ek Sekirite dan Lasanble Nasyonal, mon ti a kontan felisit Kolonnell Jean Atala pou son promosyon

koman Sef D’Eta Mazor Lafors Defans Sesel.

Kolonnell Atala ti ganny son promosyon Zedi pase e sa in fer lafyerte bann manrmay ‘70 ki parey nou dir ki mon enn ki enkli ladan. Alors ankor enn fwa mon oule felisit Kolonnell Atala mon asire ki i pou fer en travay formidab.

E mon osi oule felisit bann lezot zofisye ki'n ganny promosyon enkli *Lieutenant Kolonnell Arissol* ki vin *Acting Commander* kot *Coast Guard* e bann lezot 3 zofisye ki'n ganny promosyon. Alors mon sir ki sa zenn lekip pou fer fyer pep Seselwa.

Egalman Mr Speaker, mon ti a kontan ankor enn fwa lo lapar Komite Defans, felisit Ms Domingue koman nouvo *CFO* kot *SFRSA*. E dan sa menm laliny, mon ti a kontan osi felisit Mr Madeleine pou son promosyon koman Depite *CFO*.

Alors avek sa latasman ki zot annan pou fer, nou koman Lasanble e Komite Defans, nou dir zot kontinyen kont lo nou sipor. E letan Bidze i vini nou pou travay dir, pou fer sir ki zot ganny bann zouti nesesser pou perform zot travay. Avek sa Mr Speaker mon ti a kontan remerisi ou. Mersi.

**(APPLAUSE)**

**MR SPEAKER**

*Thank you.* Mersi Onorab. Mon krwar ki Lasanble an antye i a dakor avek mwan pou donn en sipor pou sa mesaz felisitasyon. Mersi, Madanm Clerk nou annan en *First Reading Public Bill* silvouple.

**MADAM CLERK**

Mersi Mr Speaker. Bonzour Mr Speaker. Bonzour tou bann Manm e bann *staff* Sekretarya e osi bann dimoun ki pe ekoute dan lakour.

*This Act may be cited as the Constitutional Appointees and Emolument (Amendment) Bill, 2022.* Mersi Mr Speaker.

**MR SPEAKER**

Mersi Madanm Clerk. Nou travay ozordi i lo Mosyon. Mon'n anvoy en mesaz pou bann *Leaders* bomaten, pou enform zot ki nou annan 2 Mosyon an relasyon avek travay ki *HIV/AIDS Committee* in anmennen pou sa semenn.

Me selman lo enn zot in demande ki nou *defer* sa Mosyon, e sa se Mosyon limero 2 lo *Order Paper* - ki nou *defer* sa Mosyon pou zot kapab pran dan zot largiman bann lenformasyon ki zot in gannyen avek Minister Lasante yer.

Alor mon prosede avek lezot Mosyon annord lo *Order Paper*. E nou a komans avek Mosyon anmennen par Onorab Audrey Vidot.

**HON AUDREY VIDOT**

Mersi Mr Speaker. Bonzour Mr Speaker. Tou Manm Onorab, tou travayer Lasanble prezan zabitan Roche Caiman e tou manm piblik ki a lekout. Mr Speaker Mosyon i lir *comme swivan*;

Lasanble i demann Gouvernman, atraver Minister Lasante, pou desantraliz servis *Communicable Diseases and Control Unit (CDCU)* avek bi:

- a) Ogmant tes depistaz pou *HIV*
- b) Donn plis akse pasyan dan en fason alez e dan plis konfidansyalite e redwir stigmatizasyon
- c) Ogmant nivo *compliance* anver zot tretman e swivi. Mersi Mr Speaker.

**MR SPEAKER**

Mersi. Onorab mon a demann segonnman apre ou a kapab prosede avek ou prezantasyon. Mon a ganny en segonnman pou sa Mosyon silvouple? Onorab Labonte.

**HON ANDY LABONTE**

Bonzour Mr Speaker. Bonzour tou Manm koleg Onorab. Bonzour tou dimoun ki a lekout. Mr Speaker mon pou segonn sa Mosyon e mon pou kit mon drwa pou mwan koze apre ki loter Mosyon in koze. Mersi.

### **MR SPEAKER**

Mersi. Onorab Vidot ou a adres ou Mosyon.

### **HON AUDREY VIDOT**

Mersi Mr Speaker pou donn mwan laparol. Mr Speaker Sesel in progrese dan lalit pou konbat *VIH/SIDA* depi deklarasyon Lagreman Nasyon-z-Ini lo epidemik viris *VIH/SIDA* an 2001 e akse iniversel an 2006. Swivan sa, Sesel in angaze avek en varyete linisyativ, pou asire ki pei i donn lenportans e langazman dan programm prevansyon, tretman, soulazman e rehabilitasyon.

Sa langazman in osi swiv par en plan stratezik Nasyonal lo *VIH/SIDA* pou 2005 a 2009, avek bi donn gidans mannyer pei atraver nou sistenm swen lasante e son bann partner kle, pou reazir dan nenport sirkonstans kot i konsern epidemik viris *VIH/SIDA*.

Parey bokou pei, Sesel in osi rankontre bann sitasyon

kritik dan sa lalit prevansyon tretman, soulazman e rehabilitasyon kot sa viris. E sa in konsantre lo bann risk kot aktivite seksyel i ganny pratike san proteksyon, e bann dimoun ki servi sibstans drog atraver sereng ki'n deza ganny servi.

Zot a dakor avek mwan, ki i bezwen annan bann dyalog e diskisyon serye e ki san dout kontansye, pou ki i annan nouvo lapros pou ranforsi lo prevansyon e pran desizyon kolektiv dan lentere popilasyon. Pour ki nou vwar la kantite ka lenfeksyon desann parmi nou popilasyon, ki anviron 100mil dimoun ozordi.

Mr Speaker apre ki bann nouvo desizyon i ganny pran avek bi ranforsi bann programm prevansyon e tretman, lanfaz i osi bezwen ganny mete pou soulaz e reabilit bann ki lo tretman. I regretab pou dir ki i annan rezistans parmi popilasyon pour vin devan, e fer bann tes neser pou konn zot kondisyon lasante, pou konfirman si zot annan sa viris ou non.

Sa i senpleman akoz stigmatizasyon. Nou rekonnnet ki kreasyon e partisipasyon bann Lorganizasyon Sosyete Sivil, pe osi ede dan sa lalit menm si zot osi zot in rankontre bokou defi. E nou lans en lapel

avek zot, ki nou apresye travay ki zot pe fer e nou dir zot pa dekouraze akòz sa size i konsèrn nou tou pe enport kot ou ete e kot ou ale.

Alors i enportan, ki mesaj i ganny pase klerman pou edik nou popilasyon ki nou bezwen tou dimoun, tou dimoun ansanm pou pran responsabiltè e donn koudmen lalit kont viris *VIH/SIDA*, par vin devan fer zot tes pou konn kondisyon lasante, swiv program prevansyon, pran ou tretman si ou pozitif, e lalit pou aret stigmatizasyon.

Mr Speaker nou rekonnèt ki *CDCU* i ofè plizyè lezot servis e mon konnen ki lezot mon bann koleg lo Komite Lasanble, pou tous lo sa pwen.

Me plis lanfaz sa Mosyon ki devan nou Lasanble pe konsantre lo lenportans desantraliz servis maladi transmisib e *Unit Kontrol*, pour ki i annan plis tes depistaz pou *VIH* avek bi kontinyen sa kanpanya detekte bann ka boner e fasilite program tretman pli vit posib.

Soulaz bann pasyan ki ganny detekte e donn sa reabilitasyon pou reaziste zot stil lavi, pou permet zot viv pli lontan e kondisyon zot pou debout for pou lalit kont stigmatizasyon. Akòz nou

rekonnèt ki i kontinyelman annan en pti group dimoun dan nou sosyete, ki difisil parfwà pou sanz zot *mindset* lo sa size.

Mr Speaker, Minis in fer resòti ki *VIH/SIDA* i reste en defi lasante piblik pou Sesel e i rekonnèt ki i pou bezwen an nouvo resers pou met azour kont vre kontèks sityasyon sa viris, dan diferan group nou popilasyon ozordi. Statistik ki'n ganny donner par Minis, dan kantite lanmò par lannen i varye ant 10 a 29 par lannen dan sa bann dènyen 5an. E pli o kantite ti lannen 2021.

Dan sa dènyen 5an, lanrezisteman nouvo ka par lannen in varye ant 59 a 120. E rapor in montre ki pli gran kantite ka in an 2018 avek 120 nouvo ka. Menm si Sesel in fer bokou sikse lo prevansyon ek tretman, malerezman Sesel pa ankor ariv lo tou target ki lemonn in mete. E nou pa tousel dan sa sityasyon.

Se dan sa loptik ki sa Mosyon pe demann Gouvènmàn, pou konsider desantraliz servis ki ozordi pe ganny santralize e fer ki sa lokasyon i tro sere bokou travayer osi enkli kliyan, pe servi sa servis laba kot *CDCU*. En servis byen desantralize pou kre loportinite donn plis akse pasyan, donn en fason alez e

dan plis konfidansyalite e met lenportans dan redwir stigmatizasyon.

Mr Speaker i annan plizyer dyalog konsiltasyon e vizit ki Komite Lasanble pou maladi transmisib *VIH/SIDA*

e lasante reproduktiv in fer avek bann departman kle dan Minister Lasante, *National Aids Council (NAC)* ek Sosyete Sivil pou pli byen konpran ki travay zot pe fer e konn zot bann defi.

Sa bann menm defi, in ganny eksprimen avek bann Manm nou Komite Lasanble par Manm piblik ki'n resevwar e servi servis kot *CDCU*.

E parmi in fortman annan demann pou desantralizasyon sa servis pou plizyer rezon ki mon asire mon bann koleg lo Komite pou fer resorti pli an detay dan zot deba.

Sa pou ed nou Lasanble pli byen konpran nesedit sa Mosyon, pour ki Gouvernman i analiz byen bann konsern ki pe ganny souleve avek gidans nou bann profesyonnel lasante kapab pran en desizyon lo demann sa Mosyon. Mr Speaker lanfaz pou osi ganny mete pour ki Minister Lasante, i ogmant nivo *compliance* anver zot tretman e swivi, i bezwen osi pe ganny ranforsi.

Nou rekonnet ki pandan ki *COVID-19* in kapab amenn

serten defayans dan servis e in kre sityasyon kot nivo servis ki lasante e menm Sosyete Sivil in ganny afekte, pou elev nivo donn tretman e konsiltasyon prenon kont ki servis ki santralize.

Mr Speaker Minis in dir ki deza in annan serten servis ki deza pe ganny desantralize, me dan de kalite lanpler. Tel koman tes ledikasyon prevansyon, pe ganny ofer dan bann program *outreach* dan kominote klinik e menm dan klinik prive. Nou rekonnet ki program *outreach* lo baz kominoter i ede pou ogmant kantite tes e bokou lanfaz i ganny mete lo prevansyon e edik piblik avek otan lenformasyon.

Malerezman avek ankor sityasyon *COVID-19*, en kantite sa bann program *outreach* in ganny redwir konsiderableman e plis latansyon in vin anver *COVID-19*. Si desantralizasyon maladi servis transmisib *VIH/SIDA* i bokou travay pou fer e merit en bon striktir pou fer li, parey Minis in fer resorti dan Lasanble, alors akoz pa komans avek sa legzersis?

Nou Komite Lasanble, pe demande ki nou pa zis ganny dir ki i annan bokou travay pou fer pou desantraliz konpletman sa servis. Me vwar zefor pe

ganny mete pou komans fer li, si non naryen pa pou ganny bouze.

Alors desantralizasyon sa bann restan servis ki pa ankor ganny en striktir byen ankadre, i merit omwen ganny travay lo la anver sa bann dyalog e konsilyasyon avek tou partner neserer kot Minister Lasante, pou kapab konsider omwen en baz rezyonnal, pou kapab adres sa presyon ki in annan dan letan sa lasante piblik ti pe donn piblik bann, ti pe minimiz piblik bann mouvman.

E koman bann mezir prevansyon pou anpes propagasyon *COVID-19*, annou pa les lezot oubyen okenn pandemik viris parey *COVID-19* met otaz e fer desann nivo servis lezot maladi, ki ozordi i ganny fasilite lo tretman dan nou lasante santral ki baze Mont Fleuri.

Se lo sa pwen Komite Lasanble pou Maladi Transmisib e *VIH/SIDA* e Lasante Reprodiktiv, i demann Lasanble Nasyonal pou kontribye dan deba e donn sipor sa Mosyon, avek bi ranforsi servis nou bann sant rezyonnal dan pei ki serten sa bann servis i a fasilite nou popilasyon.

Ekip sa bann travayer e sant lasante pou donn en servis

pli pre, e tou kliyan ki dan prose a ganny sans benefisyè e osi met lanfaz pou ki nou lalit kont stigmatizasyon nou bann pasyan.

Lo sa not mon oule dir mersi Mr Speaker pou donn mwan laparol pou prezant sa Mosyon. Mersi.

**(APPLAUSE)**

**MR SPEAKER**

Mersi Onorab. Onorab Labonte ou'n pare pou pran laparol la?

**HON ANDY LABONTE**

Mersi Mr Speaker. Ankor enn fwa mon a dir bonzour a tous tou dimoun ki a lekout.

Mr Speaker sa Mosyon pe demann Gouvernman pou fer zis en keksoz, e se sa pou desantraliz servis ki *CDCU* pe delivre. *CDCU* i en brans pou en *unit* anba Lasante, ki pe fer en travay vremen enportan e esansyel. E la mon anvi pran sa lokazyon pou felisit tou travayer lasante espesyalman bann travayer ki pe travay dan sa *unit CDCU*.

Akoz nou bezwen rekonnet ki pou plizyer lannen *CDCU* pe delivre en servis alaoter, e pe tret bann pasyan osi pe ede kontrol bann maladi parey *HIV/AIDS*, sifilis, e bokou bann lezot maladi ki ganny

transmet par *sex*. Me zot osi donn *advice*, fer *counselling* e anpese ki plizyer lezot maladi ki pa neserman transmet par *sex*.

La mon mazin parey ler en endividi ki pe vwayaze dan bann pei kot i neser pran bann vaksen tel ki lafyev zonn, *malaria* e lezot ankor. Kot avan ki sa endividi i vwayaze, i swa pran son vaksen e bann lezot medikaman ki neser.

Alors sa i enn bann rezon akoz ki personnelman, mon krwar ki an desantraliz sa bann tel servis, bann zabitan ki reste dan diferan distrik parey Takamaka, Baie Lazare e lezot bann distrik dan sid, zot pa pou bezwen vwayaze tou sa zistans ziska Mont Fleuri pou resevwar en tel servis.

E dezyenman, lavantaz i pou tir en pe presyon lo sa *unit CDCU* li menm. Akoz mon konnen ki kot *CDCU* Mont Fleuri, bann travayer i travay anba bokou presyon pou kapab satisfè son bann pasyan. Mr Speaker permet mwan pou mwan bouz lo dezyenm parti sa Mosyon, malgre ki sa Mosyon pe demann zis en keksoz e i annan 3 bi ki sa Mosyon pe pran kont.

E sa pou anmenn plizyer rezilta. Premyerman ogmant tes depistaz pou *HIV*. Mr Speaker

nou bezwen realis ki pandan bann lokazyon spesyal parey le 1 Desanm ki Zournen pou *HIV/AIDS*, ler Minister Lasante i fer bann program *outreach*, bouz son bann servis kot bann tes i ganny fer dan bann diferan lokasyon, swa dan latant dan bann distrik, ou dan bann landrwa travay plizyer tes i ganny fer.

E sa i ede ki plizyer dimoun i finalman konn son stati e la i ava li fasil e plizyer dimoun ki merit ganny met lo tretman, i kapab komans son tretman pli vit avan ki i devlop sida oubyen son ka i agrave. Dan sa lespri mon pou dir ki sa i pou ede ki plis nou popilasyon pou vin an bonn sante.

Legzanp i devan nou, akoz dan letan *COVID* plizyer bann sant atraver pei ki ti ede pou fer tes e konnen si en dimoun i pozitiv oubyen i negativ anver viris *COVID*. E sa in ede alors pour ki plizyer dimoun in kapab konn son stati e in anpes sa maladi propaze. E lo sa laliny, i mote nou ki desantraliz bann servis ki *CDCU* pe donner i pou anmenn en lefe pozitiv.

E dezyenm bi se donn plis akse pasyan dan en fason alez e dan plis konfidansyalite e redwir stigmatizasyon Mr Speaker. Akoz nou bezwen rekonnet ki wi nou popilasyon

in vin plito toleran e bann size parey *HIV*, in nepli en *taboo*, me kantmenm sa i ankor annan stigmatizasyon parmi serten nou bann zabitan.

Parey mon'n dir avan, malgre ki *CDCU* i fer plizyer keksoz, i pa zis tret pasyan avek *HIV*. Seselwa i *still* toultan afilye *CDCU* avek *HIV/SIDA* e sak fwa zot war en pasyan al kot sa servis, se tou ki pas dan zot lespri.

Ankor enn fwa mon pou pran legzanp lo *DSAPTR* ki ti apel *APDAR* lontan. Nou'n toultan afilye li avek eroïn oubyen *methadone*, malgre ki sa Departman *DSAPTR* i osi pran ka avek tou lezot adiksyon. Me servis *DSAPTR* in deza ganny desantralize. Alors akoz ki nou pa kapab desantraliz servis *CDCU* ki i osi enportan e pe zwen en rol dan pei?

E trwazyenmman i osi enportan se pour ogmant nivo *compliance* anver zot tretman e servis. Me wi, parey mon'n dir avan sa bann travayer kot *CDCU* ki pe vreman fer en bon travay, zot travay anba bokou presyon. Akoz zot bezwen fer sir ki tou pasyan i kontinyelman ganny zot tretman e zot swivi i ganny byen kalkile e kontrole.

Pou konklir Mr Speaker malgre ki nou konnen i pa pou

fasil e Mosyon pa *binding* lo Gouvernman, nou koman en Komite ki vreman serye e konsernen avek en tel size, nou pe demann Gouvernman pou pran sa Mosyon an konsiderasyon e aksyon lo la. Mon pou osi demann tou bann Manm Lasanble pou siport nou dan sa lalit pou kontrol *HIV* e donn zot sipor an anver sa Mosyon.

Avek sa 2 mo Mr Speaker mon pou demann Bondye Papa pou kontinyen anvoy son benediksyon lo nou koman en pti pei e kot lemonn antye. Mersi Mr Speaker.

**(APPLAUSE)**

### **MR SPEAKER**

Mersi Onorab. Mwan annan 2 Manm ki'n lev lanmen deza. Mon a ganny bann Manm i annan lentansyon pou entervenir pou sinyal mwan silvouple, an se moman.

Wi tre byen, mon krwar nou ase konfortab avek letan. Mon mazine bann Manm i kapab tenir otour 15minit e nou pa tro trakase. Nou a komans avek Onorab Bistoquet mon a donn ou laparol.

### **HON ROSIE BISTOQUET**

Mersi Mr Speaker. Bonzour Mr Speaker. Bonzour tou Onorab.



Bonzour tou dimoun ki pe koute. Mr Speaker loter Mosyon i demande ki Lasanble i demann Gouvernman atraver Minister Lasante pou desantraliz servis CDCU sirtou HIV/AIDS, pou ogmant tes depistaz donn plis akse ek pasyan dan en fason alez dan plis konfidansyalite e redwir stigmatizasyon.

E ankor plis ki sa, ogmant nivo *compliance* anver zot tretman e swivi. Mr Speaker sa Mosyon in ganny anmenn *part Standing Committee HIV/AIDS* lezot maladi konimikab, lasante reprodiktiv ek drwa. Sa Komite koman Manm i konpri;

Onorab Aglae koman Vis-Chair, Onorab Porice koman Manm, Onorab labonte koman Manm, Onorab Vidot, Onorab Hoareau, Onorab Adelaide e mwan menm Onorab Bistoquet koman *Chairperson*.

Sa Komite in devlop plandaksyon, baze lo azanda pou Parlmanter SADC, anba en proze ki apele gouvrenans *Sexual Reproductive Health* parmi sa 13 pei SADC pou lannen 2019 a 2023. Lobzektif sa proze, se pour asire ki sa Komite Parlmanter i promot e ki lasante reprodiktiv pa ranforsi azanda Lezislatif dan tou pei manm.

Sa i vin atraver promilgasyon *sexual reproductive health* legalizasyon, lezislasyon *sorry* kont *gender-based violence* akse ek *safe abortion*, komodite *sexual reproductive health* ouswa lasante reprodiktiv.

Non diskriminasyon e drwa bann popilasyon kle sirtou bann zenn dimoun ki servi drog, diferan oryantasyon seksyel, HIV/SIDA travayer CEPS, lansentman anba laz.

Sa bann stratezi i pou asir e promot *universal health coverage* ki tou Parlman dan SADC, i *lobby* sirtou pou progresivman ogmant Bidze donner par Gouvernman, pou asir soutenabilite pou lasante e lasante reprodiktiv parmi nou popilasyon.

Avan ki sa Komite in anmenn sa Mosyon, nou'n fer plizyer konsilyasyon parey lezot mon bann koleg in dir avek diferan kous nou popilasyon avek bann Minister konsernen, bann zenn lasosyasyon non-gouvrenmantal sirtou HASO, CDCU e Lasosyasyon Ners osi.

Nou'n osi fer plizyer konsiltasyon avek diferan groupman atraver en seminar ki ti ganny fer lannen pase kot *Savoy*. Programm medya lo televizyon pou sansibiliz bann Manm osi nou ti partisip ladan.

Sa semenn nou'n osi envit Minister Lasante parey nou'n vwar yer dan Lasanble, pou reponn kestyon lo kote Polisi stratezi *HIV* ki son Minister in met an plas, ou pou met an aplikasyon baze lo son plandaksyon.

Mr Speaker, avan mon komans mon deba les mwan osi felisit tou travayer lasante e lezot Minister *NGO* parey *HASO*, *ASFF*, Prizon e lezot ankor pou zot bon travay pour ki sa popilasyon Sesel i ganny akse avek servis lasante reproduktiv, e sirtou travayer *CDCU* kot zot in donn tou kot i konsern servis *HIV/AIDS*, e patit e lezot maladi kominikab lo kote prevansyon, sirveyans tretman sipor ou reabilitasyon.

Mersi pou zot tou pou sa bon travay. Me sa i pa vadir nou aret la. Avek devlopman nouvo maladi to lenfeksyon nouvo tretman nouvo teknik, sirtou dan domenn teknolozi, reabilitasyon lenpak lekonomi e sosyal i anmenn plis pou nou fer, pou ki nou pep i ganny akse avek meyer swen servis lasante, lafanmir, sosyal e ledikasyon ek lanplwa. Mersi pou zot tou.

Mr Speaker *global HIV statistics* Lazans Nasyon-z-Ini pou Sida, *UNAIDS* dan son rapor *global 2021* in fer sorti ki i annan 38.4milyon dimoun

globalman ki pe viv avek *HIV* an 2021. Ladan 1.5milyon i bann nouvo lenfeksyon dan sa total 36.7milyonki adilt aze ant 15an an montan. 1.7milyon i zanfan ant 0 a 14an. 54poursan total tou dimoun ki pe viv avek *HIV* i bann madanm avek bann zenn fiy.

Anviron 650mil dimoun in mor avek *SIDA* ou maladi relye avek sida pou sa menm lannen. 28.7milyon dimoun in ganny akse avek tretman antiretroviral. An total 64milyon dimoun in ganny enfekte depi ki sa lepidemi in komanse.

Mr Speaker, Sesel i siny plizyer Konvansyon. In siny plizyer lobligasyon enternasyonal e rezyonnal lo *HIV/SIDA*, anliny avek drwa imen e sa i sirtou bann konvansyon swivan;

*Universal declaration of Human Rights, and freedoms of all beings.* Sa ti ganny sinyen an 1976.

*International Covenant of the Economics and Social and Culture Rights* an 1992.

*International Covenant of Civilian Political Rights.* Sa ti ganny sinyen a 1992 ki donn egalite dan okenn Lalwa, drwa pou marye e form en fanmir avek nenport ki dimoun ki sa dimoun i anvi.

*Brazzaville Commitment* 2006 i dir lo *scaling up towards HIV universal access to HIV*, lo kote prevansyon, tretman *care* avek sipor.

En lot ankor *Abuja Declaration* 2006 Iniversel e akseler aksyon pou *HIV/AIDS*, *TB*, *Malarya* e lezot maladi ki transmet par *sex*. Sa ti fer avek tou bann pei Lafrik.

*Windhoek Namibia Declaration on Women's Girls and Gender Equality and HIV 2021*. Sa i dir nou, pa 2021, 2011. Sa i koz lo akseler progre ki mezir progre lo akse repons iniversel pou Lafrik, lo parey mon'n dir oparavan pou *HIV*, *TB*, *Malaria* avek *sexually transmitted infection*.

Isi Sesel repons Nasyonal pou sida in komans 34an pase, kot premye ka lenfeksyon kot *HIV* ti ganny anrezistre an 1987 e premye ka Sida ti ganny raporte an 1993. Depi sa lepok Gouvernman Sesel in fer en kantite zefor konserte, pou anpes lenfeksyon sida ouswa *HIV* kontrol maladi transmet par *sex*.

Premye plan 5an pou konbat *HIV/SIDA* ti devlope an 1997. Sa i swiv par devlopman Polisi Nasyonal ki ti ganny met an plas an 2012. Mr Speaker statistik 2021 prodwi par Minister Lasante, i montre ki 71

bann nouvo lenfeksyon depi 2013 a 2021 i parmi bann zonn.

29poursan parmi bann madanm ki kimilativ ka, an 2021 i 969 dimoun ki pe viv avek *HIV* ou *SIDA* parmi i annan 20 zanfan anba 15an. Ladan i annan 630zonn ek garson, *whereas* bann madanm i annan 319 avek zenn fiy anba 15an ou plis.

Dan sa group, 87 dimoun ki'n ganny enfekte i lo tretman antiretroviral. Sa sif i demontre ki zis 83poursan dimoun ki pe viv ek *HIV* ki lo tretman, ki *fall short* pou target global baze lo target *UNAIDS* ki 95poursan pou tou dimoun ki konn zot stati e stati viral ki ganny siprimen e zot devret lo tretman.

Statistik pou *HIV* i ganny ranmase e ganny *compile* dan rikord dan bann klinik konsiltasyon bann madanm ansent labank disan kot lopital Victoria, *CDCU* e osi bann tes ki ganny fer lo klinik Mahe, Praslin ek La Digue. Zis pou note an Mars 2000, premye madanm ansent enfekte ti komans tretman.

Mr Speaker malgre sa bann progre dan larepons *SIDA* isi Sesel, prevalans *SIDA* i kontinyen monte baze lo plizyer faktor. En faktor se

konportman riske ki persistan, sirtou atraver relasyon seksyèl avèk diferan partner, relasyon seksyèl san proteksyon, labi lalkol.

Menm si sa dimoun i okouran i pe pran en risk. Progre prevansyon striktire i byen targete i adekwat. Ziska ozordi 34an apre in annan zis 3 dimoun ki pe viv avèk sida ki'n *break the silence*. *Stigma* avèk diskriminasyon i persistan atase avèk stati *HIV* e sa i anpes dimoun vin devan pou rod sipor. Sa dan li menm i kre en kantite baryer pou asir akse avèk tretman.

Mr Speaker kwa ki *drive HIV* lepidemi isi Sesel? Nou bezwen mazin ki pa zis sa ki enfekte ki a risk, tou popilasyon ki pa enfekte i osi an risk. I annan plizyer faktor ki kontribye fer propagasyon *rapid* pou *HIV*, apard ki konportman an *risk*.

Lansentman anba laz e aborsyon i 2 faktor kle e problem it e enkyetan. Sesel i annan en lepidemi konsantre malgre ek prevalans *HIV* parmi ban popilasyon zeneral i 1poursan, me i annan ogmantasyon parmi popilasyon kle sirtou bann droger ki pike travayer *CEPS* e osi zonn ki fer sex ek zonn.

Dan en letid ki ti fer an 2011 - nou apel sa en *IBBS (Integrated Biological Surveillance Study)*, parmi dimoun ki ti enzekte drog ek *MSM* aze 15an a 64an. Prevalans *HIV* ti 8poursan. Prevalans Epatit *B*, ti 1poursan. Prevalans Epatit *C* i ti 35.6poursan e prevalans pou bann zonn ki fer sex ek zonn i ti 13.2poursan.

Mr Speaker avèk kontinyasyon travay dan *VIH/SIDA* e osi bann defi Minister Lasante in lans son katriyenn plan stratezi an Me 2018. Ki apele *National Strategic Plan for HIV/AIDS and viral Hepatitis 2019-2023*. Bi sa plan 5an se pour realiz tou target *HIV/AIDS*, *TB*, *Malaria* pou lannen ziska par lannen 2030, sa se pour fini sida par ogmant target pou tretman par 95,95 -95poursan.

Ogmant target prevansyon par 90poursan e kre en lanvironnman agreab pou asire ki tou sa bann target i ganny akonplir. Ler nou dir 95,95 savedir 95 dimoun i antre lo tretman, e 95 dimoun i ganny sans pou fer son tes e 95 dimoun i ganny sans pou li kapab reabilite.

Sa Mosyon demande par Lasanble, i demann Gouvernman atraver Minister

Lasante pou desantraliz servis CDCU parey mon dir sirtou lo HIV.

Dapre UNAIDS, desantralizasyon servis HIV i garanti plis e i tre byen ekipe dan provizyon servis lasante, e sa i redwir baryer ki i egziste pou akse servis santralize. Akse avek fasilite servis prevansyon, tretman swen, rehabilitasyon ek sipor, i donn plis letan en servis i ganny desantralize.

UNAIDS avek WHO dan zot Konferans Enternasyonal dan HIV STI an 2021 ki ti fer Durban Sidafrik, topik diskisyon ti vize ver diferan fason pou delivre servis HIV/SIDA, ki targete byen entegre dan kominote.

Sa 2 Lazans UNODC ek WHO, ti war sa sitasyon tre kritik pou akseler akse pou abzorb ou uptake, tes e tretman pou HIV. Mr Speaker baze lo sa bann sesyon ek meeting konsiltativ ki nou Standing Committee HIV/AIDS avek Sexual Reproductive Health in fer, e osi bann rankont fas a fas avek kliyan ki pe swiv tretman, zot ti met sa konsern devan nou.

Ki desantralizasyon tes e tretman ti a ede pou briz sa silans, kre en meyer akse avek servis avek fasilite lasante, dan en lanvironnman tre konfidansyalite. E sirtou son

stigma. Zot ti fer resorti ki sak fwa zot al kot CDCU, tou dimoun i get zot avek en lot kalite lizye.

Menm si CDCU i ofer lezot servis parey *traveler's health* pou lezot kliyan ki pa HIV pozitiv, e zot ti dir nou ki CDCU i toultan konzeste avek dimoun ki vin pran vaksen, par egzanp *yellow fever* pou zot voyaze. Sa pti git travayer lasante i toultan bizi. E zot bezwen esper en bon pe letan avan zot ganny zot servis, malgre ki zot ganny en servis ki adekwat.

Zot lobzervasyon e kritik i tonm byen Mr Speaker, akoz sa ki'n ganny konfirman sa in ganny konfirman par en evalyasyon lo aderans tretman HIV ki ti fer an 2013 par Oditer Zeneral. Sa dokiman i apel '*Assessing the efficiency of the management of treatment for people living with HIV/AIDS - Report of the Auditor General*.

Bi sa evalyasyon sete pour odit servis profesyonnel entegre pou Lasanble Nasyonal, Gouvernman e osi piblik an zeneral, pou donn plis valer amenazman finansyel Gouvernman dan deba Bidze pou HIV/AIDS pou Minister Lasante. Mr Speaker dan sa konklizyon sa rapor i *comme swivan*;

Kimilativ 37 kliyan ti *drop out* lo tretman *retroviral* an 2012. Pareyman lanmor koze par maladi relye avek *SIDA* ti ogmante par 60poursan e sa sif ti bann kliyan ki ti'n *default* ou aret pran zot tretman.

500poursan ogmantasyon bann nouvo ka *SIDA*. Par definisyon en dimoun ki ganny konsidere par *lost* ou *follow-up* se i pa'n akse servi pou plis ki 6mwan. *Drop out* se ler en dimoun pa'n pran son tretman pou plis ki 3mwan.

En lot konklizyon sa evalyasyon, sete menm si *CDCU* in fer plizyer program sansibilizasyon, me i ti napa programm spesifik pou promot konformite tretman pou kliyan ki *HIV* ou annan sida. Zis pou fer sorti Mr Speaker ler napa aderans avek tretman antiretroviral i anmenn mitasyon ouswa *mutation* selil *HIV* ki son rezilta se rezistans avek latizann.

Alor sa i fer ki sak fwa ki i annan imitasyon nouvo preskripsyon *antiretroviral* i bezwen sanze kot nou war lentrodiksyon latizann, konbilasyon latizann ki pli ser. Enn parmi lezot rekomandasyon for se ki *CDCU* i bezwen etablir aköz i annan ogmantasyon dan la kantite

kliyan pozitiv ki an defayans lo tretman.

Sa ti pou ede pou revwar zot plan travay dan en fason pli efektiv. E travay lo febles non aderans. Sa ti osi ede pou redwir kou pou aste latizann, ki parfwa nou trouve i vin pli ser pou ranplas preskripsyon ki annan rezistans.

Pareyman Mr Speaker, malgre Sesel in fer en kantite progre dan lasante *maternal health* ouswa lasante maternel pou bann madanm ansent, me ziska prezan bann madanm ansent ki ganny *HIV*, i ganny difikilte pou ganny en servis entegre.

Sa i baze zisteman aköz sa bann madanm ansent ti annan en evalyasyon ki ti ganny fer pou zot *WHO* an Out 2018, e sa dokiman i apele *The Joint review of HIV hepatitis, PMCT Programs in Seychelles in August 2028*.

Mr Speaker en programm efektiv pou prevansyon transmision *HIV* ant manman ek zot baba prevansyon, ki nou apel sa *PMTCT*. I neser ki en manman i ganny akse avek tretman *antiretroviral*, pratik nou bann nesans baba san danze e osi pratik apropiye pou dan baba tete.

Nou tou nou konnen ki swen lasante maternel isi Sesel

i tre o pandan plizyer lannen, kot 99poursan bann manman ansent i al konsilte. 100poursan nesans baba i fanny fer par en profesyonnel lasante ou sarz fanm, e laplipar manman i donn tete zot baba.

Tou manman in ganny ofer tes *HIV* pandan lansentman, e laplipar i fer zot tes. Si i pozitiv zot ganny met lo tretman e zot baba i ganny swivi apre nesans.

Malgre sa bann progre, sa rapor in osi fer resorti defi konsernan sa prevansyon *to mother to child transmission* ki bezwen ganny adrese, pou konsolider, mentenir sa bann progre. Pou elimin transmisyon *SIDA* dan bann tes *HIV* pou bann madanm ansent i ganny fer dan klinik dan zot distrik. Tou tes i ganny anvoye kot laboratwar Viktorya menm lezot tes Praslin ek La Digue.

Sa ners ki'n fer disan ouswa ki tir disan dan klinik ler sa Madanm i vin *booking*, i ganny rezilta zis pou tes ki negativ. Sa ki pozitiv rezilta i ganny anvoye kot *CDCU* par laboratwar.

Vi ki sa tes i pran 2 semenn pou ganny rezilta, sa madanm ansent pa ganny sa loportinite pou ganny sa *post-test counselling*, akoz *CDCU* i *call* sa madanm pou fer tretman

laba avek *follow-up*. Sa i ganny fer apre ki tes in vini apre 3 semenn.

E an plis ki sa, *CDCU* i fer sa madanm vin kot klinik pou li kapab fer son konsiltasyon. E konmela tou konsiltasyon bann madanm ki ganny baba i ganny refer kot sa *at risk clinic* kot lopital Victoria.

Pandan lansentman *CDCU* i kontinyen swiv sa madanm ansent zis pour fer *HIV therapy* e sa ners dan klinik pa pe ganny okenn lenformasyon. I pa kontinyen avek konsiltasyon parey mon'n dir dan son klinik. Sa rapor i osi fer resorti ki i annan bokou *stigma* ek diskriminasyon anver bann madanm ansent ki *HIV* pozitiv.

Alors sa ki sa Mosyon pe demande, se ki ler i annan desantralizasyon sa madanm ansent ki pe viv avek *HIV* ou *SIDA* i a kapab ganny en *one-stop shop service* kot son klinik pou son konsiltasyon, *counselling*, tretman, menm apre ki in ganny son bann ki nou apel sa peryod *postnatal care*.

Mr Speaker en lot defi se lenfeksyon Epatit sirtou Epatit C parmi bann dimoun i servi drog eroin ou kokain dan lavenn. An 2020 la kantite ka ki ti annan i ti lo *peak* ki nou ti

trouve, an 2017 e ti annan apepre 38 ka. Be an 2019 i ti annan 77 ka e an 2020 ti 91. La mazorite ka ti bann zonn ki ti kont pou lavalè 88 pousan.

Menm si tretman ti ganny ofer pou *Hepatitis b* ek *c* an 2016, Sesel i napa en program striktire pou zer e sirtou en striktir gouvènan santralize. Me omwen nou konnen ki *AIDS program* dan Minister Lasante i enplimant serten aktivite pandan lannen pandan peryod of *International Hepatitis Day*. Mr Speaker plan stratezi pou *HIV/SIDA* 2012-2016 ti annan en stratezi pou desantraliz servis tretman *HIV* ek *SIDA*. Me i ti napa okenn aksyon.

Mon kontan pou war dan sa nouvo plan stratezik 2019-2023, i annan sa size desantralizasyon e sa i lo paz 18 pou annan ki ti a kontan verifiye. Zis en pti ekstè ki ti dir:

*“A second critical factor was the need to decentralize services, engage all community health services sites and expand the prevention treatment and care, to meet the achievement of the 1990 targets.*

*The community is an underutilized resource in this fight, to eliminate HIV and the need to more closely coordinate facility and community activities and interactions has never been*

*more apparent.”* Mr Speaker desantralizasyon servis *SIDA* sirtou tretman pe deza ganny enplimant parey nou konnen Praslin avèk La Digue.

Minister i kapab servi sa leksperyans. Pou komans desantraliz sa servis dan rezon Mahe *CDCU* i a kapab vin en *hub* pou fer resers, anmas levidans konkret pou sipòt Gouvènan e lezot lorganizasyon kliyan dan devlopman stratezi sirtou *training* pou redwir *HIV/SIDA* dan Sesel. e *CDCU* i kapab kontinyen avèk son *travellers health*.

Desantralizasyon servis lasante *is the golden rule* pou anmenn lakonplisman dan sistenm lasante pou *HIV/SIDA*, par sa bann stratezi swivan;-desantralizasyon pou redwir non konplikasyon relye avèk *SIDA* ou *HIV*. I pou ogmant tes depistaz *HIV* par lannen, i pou ogmant nonm depistaz *HIV* pou annan madanm ansent.

I pou redwir *viral* Epatit, i pou ogmant aderans pou tretman *antiretroviral*. I pou reasir risk lanmòr ek *HIV* ou *SIDA*. I pou redwir stigmatizasyon e diskriminasyon. I pou kre en lanvironnman fezab avèk tou konfidansyalite pou servis. I pou anmenn servis pli pros



avek kliyan ek zabitan. I pou ankouraz partisipasyon kominoter e anmenn responsabilite kolektiv.

Mr Speaker mon pou resit enn de pti *quote* par de dimoun tre enportan dan lemonn pou nou refleksyon. Premye i par *Martin Luther King*. Mon pou *quote*: -

*“Injustice anywhere is a threat to justice everywhere. racism transphobia, homophobia, anti-semitism islamaphobia, sexism and all forms of bias impact health and wellbeing. Sexual and reproductive health are key aspects of the intersection of justice and health care”.* Unquote.

Avan mon konklir les mon *quote* de pti pwen ki dan *speech* ki Dr Tedros Adhanom Ghebreyesus ki Direkter Zeneral pou Nasyon-z-Ini i ti ganny elekte dan sa 75enm *World Health Assembly* ki ti fer le 23 Me 2022. I ti dir: -

*“We have looked back at where we have been we have been, we have looked down at where we are and we have looked forward to where we must go. Now I invite you to look up, how would we overcome the many challenges we face and reach the targets we set for ourselves?”.*

Avek sa Mr Speaker mon pou donn mon sipor pou sa Mosyon anmennen par *Standing Committee* atraver Onorab Vidot. E mon pou demann bann lezot mon bann koleg Manm Lasanble pou siport sa Mosyon totalman. Mersi Mr Speaker.

**(APPLAUSE)**

### **MR SPEAKER**

Mersi Onorab. Mon aprezan donn laparol Onorab Doyace Porice pou son ladres.

### **HON DOYACE PORICE**

Mersi Mr Speaker. Bonzour Mr Speaker ek tou mon ban koleg MNAs. E tou bann ki pe a lekout lo televizyon.

Mr Speaker sa Mosyon in anmenn nou lo sa Komite *HIV/AIDS* dan Lasanble, pou fer en refleksyon byen serye kot i konsern *Communicable Diseases Control Unit (CDCU)*. Kot nou ti a kontan i ganny desantralize pou permet depistaz *HIV* e osi fer nou bann pasyan santi zot pli alez pou vin fer zot tes.

Me mon pou felisit bann travayer *CDCU* e Minister Lasante, pou sa bon travay ki zot in fer pou tou sa letan ki sa maladi in egziste dan nou pti pei Sesel. Nou konnen Mr

Speaker, ki i annan serten nou ki vreman serye avek nou lasante, nou pa pou gete kote klinik i ete ouswa si i annan dimoun pe get nou.

Me i annan nou ki nou pa oule lezot dimoun i war dan ki klinik mou antre ladan, sirtou kot i konsern klinik CDCU Mont Fleuri Twa Zonn pou en rezon personnel.

Akoz mon dir sa, set aköz leksperyans in montre ki sa maladi *HIV/SIDA* i serye;- ki sa klinik CDCU ou a krwar ti fer per pou nou pasyan *VIH/SIDA*, oubyen nenport ki pasyan spesyalman nou zenn adolesan. Kot zot santi ki zot drwa i bezwen ganny respekte anver lezot.

Avek desantralizasyon pasyan pou santi zot pli alez e annan plis *privacy* pou zot fer zot tes. E osi pou zot pa ganny *disturb* ek personn letan zot pe al dan sa klinik. Parey nou konnen dan distrik, i pa parey kot sa landrwa aktyel. I annan plizyer kalite pasyan ki pou vin dan klinik e personn pa pou remarke kote ou pe ale. e sa pou ed plizyer zot vin fer zot tes *HIV*.

Parey nou konnen Mr Speaker, nou ankor annan bokou zenn la deor ki pa ankor vin devan pou fer zot tes ouswa ki bezwen en *advice* avek

zofisye ou ners ki pe travay dan sa seksyon pou ed zot pran bann bon desizyon anver zot lavi toulezour sirtou kot i konsern aksyon seksyel. Swa ek zot partner atitre ouswa ek diferan partner.

La Mr Speaker, mon pe koz pou tou kalite aksyon seksyel, nenport ki laz pou zonn e osi fanm, aköz sa maladi pa swazir ni grander e ni laz. Alor avek desantralizasyon, i pou ede ankouraz plis dimoun pou vin devan pou fer zot tes e pou osi annan plis kontrol lo sa maladi, pour ki i pa ganny propaze dan nou pti pei Sesel.

E parey bokou nou, nou konnen ki sa maladi i partou e nou bezwen kontrole, pour ki nou pei pa ganny anvair par sa maladi. Avek sa de mo mon pou siport sa Mosyon anmennen par Onorab Vidot siporte par nou Komite. Mersi.

### **MR SPEAKER**

Mersi Onorab. Laparol i ava prezan pou Onorab Sylvanne Lemiel.

### **HON SYLVANNE LEMIEL**

Mersi Mr Speaker. Bonzour tou mon bann koleg Onorab e tou bann dimoun ki a lekout. Mr Speaker desantralizasyon dan sistenm lasante, i enn ki ase

komen dan diferan pei e Sesel pa en leksepsyon.

Bi desantralizasyon okenn servis i ede anmenn sa servis pli pre avek dimoun dan en kominote. Sa i fer ki plis dimoun i kapab akse sa servis e an menm tan fer ki plis dimoun, ki bezwen en tel servis i kapab partisipe. Nou size diskisyon ozordi isi dan Lasanble, i pe demann Minister Lasante pou desantraliz servis *Communicable Diseases And Control Unit* an pti (CDCU) e anmenn li pli pre avek kominote.

Mr Speaker, nou tou nou konnen ki *VIH/SIDA* zot ankor en menas lasante piblik dan nou pei. E i ankor annan dimoun ki pe mor avek sa maladi. Yer Minis Lasante ti la dan Lasanble, in enform sa Lasanble lo kote la kantite lanmor zis lannen pase 2021 ti annan 21 ka lanmor ek 59 nouvo ka lenfeksyon *VIH*.

Sa i zis dimoun ki'n raport kot lopital avek serten sentonm, e ler zot in fer zot tes se la ki zot in dekouver ki zot pozitiv. Bokou dimoun pe viv avek diferan sentonm, me i domaz ki bokou zot pa pe apros devan pou fer bann tes. Parfwa i annan ki les tro tar, pou zot al lopital e fer tes neser pou detekte zot maladi.

Isi Sesel bokou zonn, madanm e zanfan pe viv avek viris *HIV* e bokou zot in ganny detekte boner e zot pe swiv tretman e osi konsey zot Dokter. Tou dimoun i kapab ganny akse avek en lopital oubyen klinik, ki dan bann kominote isi Sesel pou okenn problem lasante. Menm si parfwa nou konnen i annan bokou konplent an sa ki konsern servis lasante ki fodre i amelyore, me selman tou dimoun i kapab ganny akse avek swa lopital swa klinik.

Bokou osi i kapab *afford* pou zot al kot en klinik prive pou fer okenn *checkup* tes e osi tret okenn maladi ki zot annan. Mr Speaker sa ki Mosyon pe demande i annan son merit, e osi i en bon linisyativ pou desantraliz sa servis *CDCU*.

Par egzamp, nou annan lopital Anse Royale ki annan lespas pou donn diferan servis *impatient*, me lespas pe ganny okipe pou donn servis *outpatient*, aköz nou pa ankor kapab konstrir en *impatient* klinik modern pou nou kapab liber lespas.

Sa ti a fer ki lopital Anse Royale ti a kapab vin en landrwa desantralize, kot Minister Lasante ti a kapab donn bann servis desantralize

ki *CDCU* pe donnen kot Twa Zonn.

Minister Lasante ti a osi kapab ganny lespas pou desantraliz par egzanp en lot servis, servis dyaliz osi ki bann pasyan ki pe swiv sa tretman pe demande toultan. I tre enportan ki i annan bann landrwa ki byen organize, e ki pasyan i annan son *privacy* ler i pe ganny son *counselling* e tretman pou *HIV*.

Parfwa bokou dimoun ki al kot *CDCU* i konplent sa problem *privacy* e sa i dekouraz zot pou al kot *CDCU* pou kontinyen avek swa zot *counselling* oubyen swa tretman.

Mr Speaker i byen osi ki nou enform tou dimoun ki nou lasante i nou responsabilite e alors nou bezwen pran bon ka avek nou lasante. Mon lapel pou tou dimoun, se annou pran nou responsabilite. Si nou remarke ki i annan en abnormalite avek nou lekor, oubyen nou pa santi nou byen i nou devwar pou nou al kot en klinik, oubyen lopital boner pou nou ganny nou tretman.

Bann dimoun ki pe viv avek *VIH* e *SIDA* zot kapab viv ankor bokou lannen si zot pe swiv byen zot tretman e osi konsey zot Dokter. I tre enportan alors ki zot kontinyen

avek zot tretman e pa transmet sa maladi. Reste responsab e ede pou pa transmet sa maladi avek lezot dimoun.

Minister Lasante i bezwen kontinyen travay dir pou amelyor servis e travay pli dir pou fer prevansyon, fer defeksyon boner e osi kontinyen donn tretman koman en stratezi prevansyon pou lezot ki pa ankor ganny afekte.

Mr Speaker nou tou nou konnen - yer Minis ti fer resorti, ki i annan en dokiman ki *SADC* li menm in demann tou pei ki dan *SADC* li menm, pou annan en *sort of* lendis ki nou bezwen pe tanzantan fer zot konnen ki zistans nou Sesel nou'n arive. I en kart evalyasyon kot i tyek lo kote to mortalite dan pei, to mortalite nouvo ne si in redwir.

E osi i annan en seksyon lo kote *VIH/SIDA*. E yer Minis ti enform nou ki *VIH/SIDA* i pa merite sa i en target ki *SADC* li menm in *set* kot *VIH* ek *SIDA* i merit nepli en menas lasante piblik par 2030.

So alors i pou tre enportan ki Minister Lasante e ansanm avek son bann lezot partner, pou travay ansanm e ki nou fer sir ki nou Sesel nou *achieve* sa ki *SADC* li menm i pe demann Sesel e osi lezot pei ki form parti dan sa groupman *SADC*, pou nou kapab *achieve*.

So an gro Mr Speaker mwan mon pa vwar okenn problemm avek sa Mosyon ki'n ganny anmenn par Onorab Vidot de lapar sa Komite ki i lo la ozordi. E mon pare pou mwan donn mon *full* sipor sa Mosyon. Mersi Mr Speaker.

### **MR SPEAKER**

Mersi Onorab. Mon a pas laparol Onorab John Hoareau.

### **HON JOHN HOAREAU**

Mersi Mr Speaker. Bonzour tou dimoun a lekout. Mon pou ekstremman kourt lo sa size parske bokou in ganny dir *ce matin*.

La nou pe get statistik global Mr Speaker, 38.4milyon dimoun ki'n globalman ki pe viv avek *HIV*, 1.5milyon nouvo ka an 2021, 650mil ki'n mor an 2021. Sa i montre ki sa pandemik *HIV* i ankor tre for o nivo mondyal e i montre osi ki i pou kontinyelman annan en lenpak lo nou sistenm lasante, e lo sistenm lasante mondyal.

Mr Speaker mon pou siport sa Mosyon ki pe demann Gouvernman pou desantraliz servis *CDCU*. Mon konnen ki Minister Lasante pe deza fer bokou dan ka desantralizasyon, par rapor avek lenformasyon ki Minis in donn Lasanble an

repons bann kestyon ki nou ti demande yer.

Ozordi par egzanp tes *VIH/SIDA* pe ganny fer dan bann sant lasante dan distrik, program lesanz sereng dan la kominote i en lot legzanp. Sa pe anmenn plis sa bann servis pli pre avek la kominote e definitivman sa pou ogmant la kantite tes ki pe ganny fer o nivo nasyonal.

Sa i anliny avek stratezi *UNAIDS* pour ki 95poursan nou pep i ganny teste e 95poursan dimoun ki ganny teste pozitiv i ganny tretman, e 95poursan dimoun ki lo tretman i reste angaze pou li pran son tretman ki a lafen son *viral load* i vin *minimum*. Alor i pa kapab transmet sa maladi, sa viris.

Si nou ariv lo sa target globalman lemonn pou menm kapab met sa viris anba kontrol, dan en fason ki *HIV* pou nepli vin en pandemik mondyal. Mr Speaker desantralizasyon i anliny avek *SDGs* limero 3, ki koz lo lasante iniversel pour ki tou nou pep, oubyen tou dimoun osi ganny akse avek bann swen neseler dan lasante.

Souvandfwa i annan diskriminasyon e mazinasyon akoz dimoun pa konpran byen sa maladi. Sa i fer ki drwa imen sa bann dimoun ki malad pa

ganny respekte e sa osi i annan en lefe lo tou sa bann dimoun ki malad. I fer ki zot pa tro angaz zot lo zot tretman, akoz zot per sa bann stigmatizasyon ki annan deor. Parey nou dir i fer *compliance* reste ba - nivo *compliance* reste ba.

Mr Speaker pou nou anmenn en servis pli pre avek la kominote, i pou osi annan en lenpak bidzeter Resours Imen e resours materyel. Alor koman manm Lasanble, mon pe fer en pledwari ki tou Manm espesyalman Lopozisyon pou zot osi vot Bidze Minister Lasante ler i vini. An prensip si zot dakor avek sa Mosyon zot devret fer li.

Mon pe egalman demann Minister Lasante pou pa les nou tonbe e fer le neserer pou kontinyen donn nou valer pou larzan. Nou bezwen osi travay pou retir bann baryer legal, ki zisteman i koz serten prezidis lo bann dimoun ki pe viv avek sa viris. Par egzantp bann tes medikal ki pe demann dimoun ki *HIV* pou fer, si zot negativ zot ganny sa travay me si zot pozitiv i annan dout ki zot pa ganny sa travay.

Osi menm pou zot akse en *loan* avek en labank. Sa i fer ki i anmenn sa size prezidis e stigmatizasyon. Mr Speaker i mon swe pour ki bann *NGOs* osi

ki konsernen avek sa size, i konsantre en pe zot zefor dan la kominote zot osi zot desantraliz zot zefor. Ki mon oule dir par sa, se ki souvandfwa nou vwar ki nou bann *NGO* i pa bouz ase dan distrik.

E zot pa ede osi avek pas lenformasyon, oubyen menm serten lentervansyon parey *counselling*.

Zot plito angaz zot lo en nivo santral avek Minister Lasante. Alors si zot osi zot kapab ede dan la kominote, sa i pou fer bokou plis sans. Mr Speaker avek sa mon a remerisi ou.

### **MR SPEAKER**

Mersi Onorab. Mon a donn laparol Onorab Aglae.

### **HON EGBERT AGLAE**

Mersi Mr Speaker. Bonzour tou Manm Onorab e tou dimoun a lekout. E en bonzour osi spesyal pou tou Seselwa ki pe viv avek sa viris *HIV/AIDS* isi dan Sesel.

Mr Speaker avan mon komanse mon pou met lo rikord ki nou lo sa kote *US* kot i konsern Bidze pou tou servis esansyel dan sa pei, nou pou touzour siporte e donn nou sipor lo la. Mr Speaker Lartik nou Konstitisyon prensipalman

Lartik 29(1) i lir *comme swivan* ki;

*“Recognize the right of every citizen to protection of health and to the enjoyment of the attainable standard of physical and mental health. To ensure that its right is respected the states undertakes the step to ensure free primary healthcare and take measures to prevent, treat and control epidemic pandemic and other diseases, and reduce infant mortality to promote the health development of the child. Importantly the State to the constitution undertakes to promote responsibility of individual for their own health”.*

Sa i Lartik nou Konstitisyon date depi 2004 Mr Speaker, ki fer ki nou rekonnèt responsabilite Leta anver lasante son popilasyon, me osi site ki i annan en responsabilite sak endividi pou li kapab protez e promot son lasante.

Mr Speaker i bon konstate, lo ki mannyer nou'n arive ozordi ki i annan sa demosyon dan Lasanble Nasyonal. Depi 2016 atraver Sizyenm Lasanble, Komite ki ti la ti komans travay lo Mosyon atraver program dirize par *SADC PF* anba program ki ti pe ganny *sponsor* par en lakonpanyen - en donater ki

krwar ki lo novo *SADC*, i merit annan plis zefor par bann pei pou pran sa size lenfeksyon *HIV* e osi lasante reprodiktiv lo en lot nivo, e osi ede kot Bidze en Gouvernman pa kapab soutenir ouswa *meet* bann program, zot kapab ganny sa sipor.

E se la ki travay ki ti komanse avek Komite pou nou kapab anmenn Mosyon dan Lasanble, pou nou kapab debat lo la e osi siport Minister e Departman konsernen ouswa bann *NGOs* ki travay an relasyon avek sa viris. Ki nou kapab briz en pe bann sityasyon kot parfwa dan domenn medikal Mr Speaker bann eksper, zot doue dan serten volonte sirtou kot i konsern tretman. Me dan lot kote ou pou annan politisyen ki li ki asir bann regilasyon bann Polisi ki pa neserman zot vwar dan nen direksyon.

E se la mon krwar kot bann nide lapartaz e ban Manm ki'n koz avan mwan in sit bann diferan sityasyon, bann rekomandasyon osi in ganny sorti, e se la kot mon krwar bann refleksyon i demann en pti pe pli profon pou get ki direksyon ki nou pou ale baze lo sityasyon ki nou ladan.

Mr Speaker, i bon konstate ki program Sesel i annan i pa en program ki'n

sorti dan nyaz. I en program ki'n ganny derive atraver Nasyon-z-Ini sirtou atraver *UNAIDS*, sa *body* ki responsab pou dil avek sityasyon *VIH/SIDA* e ki son lorgann prensipal se *World Health Organization*.

Sesel in bezwen pe war li pe swiv bann diferan komitman. E i annan 10 komitman prensipal kot i relye avek sityasyon *VIH/SIDA* lo en baz mondyal e osi lo en baz lokal. Mon pou pas lo enn de bann komitman ki mon krwar i enportan Mr Speaker, e sa i ganny trouve sa ki anvi fer son resers lo *Seychelles Country Progress Report* date 2017.

E premye komitman ki Sesel in bezwen pe swiv e ariv lo serten target se pou asire ki dan sa monn global 30milyon dimoun ki pe viv avek *HIV/AIDS*, zot kapab ganny akse avek bann tretman. E sa ti ganny swiv atraver en target 90/90 ki i sipoze *by* 2020, me ki mon konpran ki i annan serten amannman ki'n ganny fer, aköz nou'n fini zot sa target 2020.

E osi sete met lanfaz lo konn ou stati apartir sa target. Me nou kapab konsyan poudir bokou sa bann target, nou ankor i annan bokou pei ki ankor lwen e Sesel osi i pa

ankor kapab 100poursan ariv lo sa target.

E komitman limero 2, se pou elimin lenfeksyon *HIV* atraver nou bann zanfan e osi pou asire ki sa plis ki 1.6milyon zanfan ki pe viv avek *HIV*. E la ler non pe koz zanfan i pou plito bann zanfan ki'n ne avek *HIV* e osi i annan bann zanfan ki pe grandi ozordi avek *HIV*. An vi ki i annan serten sityasyon ki mwan mon pa pou al an detay e i pa mon rol pou nou al dan detay ki zanfan in kontrakte viris.

E komitman limero 2 i fer sir ki sa bann menm zanfan osi, i bezwen kapab ganny akse avek tretman pou zot kapab zouir en lavi normal parey tou zanfan.

Komitman limero 3, se ki pei in bezwen asire ki diferan akse ek bann diferan mezir prevansyon, bann lentervansyon medikal ki enkli bann metod kontraseptif pou bann msye ou madanm ouswa bann zenn adolesan ki a risk dan popilasyon pou kontrakte sa bann viris.

E komitman limero 4, se pou elimin tou bann form *gender inequalities*, inegalite e aret tou form diskriminasyon vyolans anver nou bann madanm, nou bann fanm, nou



bann fiy e nou bann zonm osi ki pe vov avek a viris *HIV/AIDS*.

Komitman limero 5 se ki asire ki 90poursan nou zenn popilasyon i annan konesans in ganny sa *skills*, e osi kapasite pou protez zot lekor kont *HIV* e ki zot ganny akse avek bann osi bann swen lasante reproduktiv. E se sa ki yer mon krwar Minis in tous en kantite lo sa bann pwen se ki nou, nou pe *entamer* tase ki plis lanfaz i ganny fer e size *PSE* i enn bann size ki kapab anmenn sa komitman limero 5 anver son realizasyon.

Komitman limero 6 se ki asire ki plis ki 75 dimoun ki pe viv avek *HIV* ou a risk lenfeksyon ki zot benefisy e avek en proteksyon anba nou sistenm sosyal, an term en sipor pou zot kapab soutenir en lavi normal. E komitman limero 7 se ki asire ki *by 2020* ki nou'n fini pase ki tou servis *delivery* atase avek *HIV/AIDS* i ganny anmenn dan la kominote.

E se sa ki Mosyon ki la devan nou pe demande, menm si i annan serten komansman ki'n ganny arive, me nou santi ki i annan plis zefor, plis travay pou nou kapab anmenn li lo sa nivo ki nou pe demande.

E komitman limero 8, se ki i asire ki resours ki atase avek bann program pou

*HIV/AIDS* atraver nou sistenm Bidze ki nou bezwen vit lo la, i ogmante e ki osi i ava annan en sonm dan Bidze. E sa zot in met apepre 6poursan osi pou al bann diferan partner ou endividi ki pe konpany dan sa lalit, pou konbat propagasyon *HIV/AIDS* e pou anmenn bann diferan nivo *awareness* sirtou atraver nou bann zenn popilasyon.

E komitman limero 9 se pour *empower* nou bann dimoun ki pe viv dan popilasyon a risk pou zot konn zot drwa pou zot kapab protez zot prop lekor, e osi pou kapab vin devan kan zot war okenn bann form ki pe met zot a risk lasante.

E dernyen komitman se komitman limero 10 se ki en langazman i ganny mete dan sa komitman sa bann komitman ki i vin pli azour e pli ouver anver bann program ki pli santre ver lasante e avek bi amelyor nou *universal health coverage* avek tou kalite e form tretman ki disponib. E sa i enkli ban tretman ki deza la a e osi bann nouvo zenerasyon tretman ki pe ganny met a laporte pou nou servi.

Prezan Mr Speaker mon anvi koz en pti gin lo sityasyon ki nou annan isi Sesel anver bann dimoun ki pe viv avek

*HIV/AIDS*. E dernyen statistik i bon osi fer resorti ki bann statistik ki pli resan mon krwar ki nou bezwen, e enn bann faktor ki *challenges* ki'n ganny site dan rapor se, pour mon kapab met nou bann statistik azour.

Akoz ler nou pe get bann dernyen resan se 2018, ki fer i nou annan en gap omwen apepre 4an devan nou, ki bann statistik resan pa ankor ganny bibliye. E sa i pou rol Minister Lasante pou li kapab donn sa bann rapor e ki i ava vin dan domenn piblik osi.

E i fer referans avek sa 843 dimoun ki'n ganny enfekte depi deteksyon an 87 e ladan ti annan 515 zonm e 328 fanm ki pe viv avek *HIV*. E an se moman i annan 592 ki enkli 358 zonm e 234 fanm. E ladan letan nou pe get kantite ki pe swiv en tretman i zis 62poursan ki fer ki i annan anviron 38 poursan sa bann fanm e zonm, ki pa pe *comply* avek en tretman.

E ladan Mr Speaker Minister li in met en target pou 2023, ki dapre rapor pou zot kapab *meet* ki nou kapab ganny *at least* 90poursan nivo *compliance*, avek tou bann pasyan ki pe viv avek *HIV/AIDS*. E ladan zot in fer resorti ki 242 ki pa ti pe swiv tretman zot in kapab re komans

angaz zot e idantifye zot pou zot kapab retourn lo bann tretman antiretroviral.

Mr Speaker i bon mansyonnen osi ki i enportan ki okenn ki pe viv ek sa viris e la mon fer resorti kler pou zot reste lo zot tretman, e si ou pa ankor al pran ou tretman ouswa *enroll* lo sa program, vin devan aköz i annan benefis medikal. E in prouve lasyans in prouve ki plizyer ki lo la ozordi i kapab viv en lavi an bonn sante parey en dimoun normal ki pe vov san sa viris.

E zot pou viv osi bokou letan parey en dimoun i normal an vi ki bann tretman ki osi azour ozordi, i anpese ki sa viris i devlope plis. Sa i fer ki ou *viral count* i reste vreman *low* e i annan menm resers ki'n montre poudir nivo, si zot kapab fer desann sa nivo *viral load* dan en dimoun ki'n prouve i annan gran posibilite ki li osi i pa *pass on* sa lenfeksyon avek en lot dimoun. E resers in prouve.

*Now*, Mr Speaker letan nou koz lo desantralizasyon servis e *compliance* mon kre ri enportan osi pou get bann konsern ki atase ki'n ganny met devan, avek ban dimoun ki pe viv ek sa viris.

E ler ou koz ek zot bann rezondet ki zot met devan ou, se zot santi poudir la fason ozordi

ki servis, ki zot pe pran sirtou atraver *CDCU* son lokasyon li menm li i fer li zot napa sa *privacy* ki zot ti a swete e sa i redwir en pti pe sa konfyans pou zot leve, bouze e al devan pou zot akse sa servis.

E osi zot dir poudir letan zot al laba zot war poudir zot pa tousel. Premyerman i annan bann diferan *staff* lasante ki la e prensipalman bann *noncore services*, ki osi zot bat avek. E ou konnen Sesel avek en pri popilasyon nou tou nou preski konn tou dimoun, i fer ki pou zot sa i poz en serten konsernan lo zot stati. E sa i kapab kree demen bann stigmatizasyon, ouswa bann lezot mers mon kapab dir, ki i dan nou li menm li, pou nou kapab koz lo en endividi dan en fason ki pa neserman apropiye.

So enn bann rekomandasyon ki nou, nou pe demande se desantraliz servis. E letan nou pe koz desantralizasyon servis *CDCU*, nou. Pa pe dir anmenn li dan tou klinik, non pa koumsa aköz i pou vin avek son kalite lot form mank konfyans ouswa stigmatizasyon i kapab leve.

Akoz si mon ki reste Port Glaud mon konnen mon annan sa viris, mon pou al kot mon klinik e tou dimoun Port Glaud i konn mwan e dek ki mon pou

akse servis dan en fason zot pou konnen. So nou, nou swete ki lo en baz rezyonal, sa i kapab ganny anmennen dan sa 4 kwen, nor, was, sid e dan les i ava fer li en pe parey sistenm i ete ozordi.

Kot bann klinik i ete ki deservi en bann pwenn rezyonnal, me la fason ki nou pou akse servis ou koman en pasyan, mon pa krwar i devret pe ganny met ansanm avek nenport ki, ki vin akse sa bann servis.

E se la ki mon santi ki poudir kot konfidansyalite i kapab antre e ki i a kapab relev sa nivo *trust*. Byensir i pou annan en kou ki pou antas avek. Me si nou kapab met resours dan bann diferan domenn e lasante i en domenn enportan aköz en pep ki an bonn sante i asire ki progresyon, e devlopman i kontinyen nou kapab ganny resours adisyonnal ki asir resours mendev pou kapab travay dan sa seksyon li menm.

E pa neserman i bezwen en servis 24 lo 24, ouswa en servis Lendi ziska Dimans, non! I pou annan so bann zour apropiye. Aköz letan nou pe get la kantite dimoun ki pe viv avek viris i par anba mil. Konpare avek nenport ki, ki nou war ki al klinik lo en baz Lendi ziska

Dimans zis dan en semenn li menm li i fini desot sa nivo.

E nou ti war statistik ki ti ganny prezante mon rapel Sizyenm Lasanble ki en popilasyon avek 90mil dimoun nivo konsiltasyon i preski sote 500mil par lannen. E sa pti group dimoun ki annan mwens ki mil ki mon santi i *manageable*, lo en baz lapwentman i kapab ganny akse ek bann servis lo bann dat spesifik dan sa bann rezyon dan en fason konfidansyalite.

E la zot ava pran zot tretman premyerman e osi ganny sa *counselling* neseler pou zot santi zot en pti pe pli alez. E si nou kapab anmenn li lo sa nivo mon krwar i pou kapab annan plis dan sa 62poursan ki kapab ogmante, e fer ki sa apepre 38poursan ki pa pe swiv tretman i a santi zot alez.

*Now* i annan en lot group osi Mr Speaker ki, pou bann diferan rezon dan sa 38poursan pa pou neselerman pe *comply*. E nou'n war poudir i annan en group ki lo sibstans ki pe abiz sibstans, ki zot annan sa volonte e sa bann travay mon krwar en pti pe pli dir mon bezwen dir- i bezwen kapab ganny fer avek zot p zot osi aköz zot bezwen annan sa sans responsabilite dan zot.

E osi nou pou annan en pti group petet ki'n fini deklar sa maladi dan en faz, *full* parey nou dir *full blown*. E zot, zot pa neselerman annan sa mon mobilite dan zot pou zot kapab akse e se la osi li osi dan klinik i annan sa ki nou apel bann vizit ki ganny fer dan kominote ners ek dokter ava kapab target zot.

So Mr Speaker pou konklir e pou sipor pou Mosyon ki la devan nou, *CDCU* i en servis enportan ki bezwen ganny donnen, aköz i pa zis dil avek donn tretman antiretroviral, ouswa vwar bann pasyan avek *HIV/AIDS*. I osi annan son konponan kot i pe zer bann lezot malad parey *Hepatitis* e osi bann lezot form medikaman parey si ou pe *travel*, *Malaria* bann lezot ankor ki ava la.

Son *core* fonksyon i la pou reste li. Sa ki nou, nou pe demande se ki sa ki dan sa lansanm lobzektif ki li i annan, mon santi poudir sa seksyon kot i konsern *HIV/AIDS* son fason fer i merit petet vwar en pti gin e anmenn li ver en sistenm desantralizasyon parey mon'n site. So avek sa Mr Speaker mon pou dir ou mersi pou donn mwan laparol e mwan mon pou siport sa Mosyon. Mersi.

**MR SPEAKER**

Mersi Onorab. Nou a pran en poz la e nou a rebran 11er 10. Mersi.

***(BREAK)***

**MR SPEAKER**

Mersi. Onorab Esparon wi?

**HON REGINA ESPARON**

Zis pou avèti ou ki napa en *quorum*.

**MR SPEAKER**

Madanm Clerk nou annan en *quorum*? Tre byen. Pou nou kontinyen deba lo Mosyon mon ava apel Onorab Samynadin.

**HON KELLY SAMYNADIN**

Mersi Mr Speaker. Mr Speaker malgre son pti popilasyon, Sesel i en pei ki pa'n ganny eparnyen avek propagasyon bann maladi transmisib. I annan plizyer maladi transmisib tel ki *HIV/SIDA*, Epatit *A, B, C*, Larouzol, *Syphilis*, *Genital Herpes*, *Chlamydia*, Kovid-19. Ensi ki bann lezot diferan *form influenzas*.

I osi annan plizyer fason par ki zot kapab ganny transmet, parey in deza ganny mansyonnen oparavan. Sa i

kapab atraver nennen, labous, lizye oubyen lanmen.

E sa bann bakteri i ganny propaze lo nou lanmen. Swa letan nou eternen, touse, oubyen letan nou frot nou lizye. E la sa dimoun enfekte i propaze dan son lanvironnman imedya, oubyen avek son pros. E enn bann fason pli kontazyè par ki lanfaz pe ganny mete ozordi, se atraver kontak seksyèl.

Mr Speaker, malgre ki nou pa pe tro koz lo la si frekaman ozordi, an vi propagasyon plizyer lezot maladi ou pandemi ki pe frakas lemonn, maladi *SIDA* oubyen *HIV* i touzour osi fatal ki ti ete, letan ki nou ti pe koz lo li pli souvan 5an ou 10an pase.

Plizyer dimoun i ankor pe kontrakte sa viris, me zot per pou vin devan. Enn bann rezon prensipal, se akòz landrwa kot sa servis maladi transmisib i ganny donnen.

Mr Speaker, mon santi ki wi, parey Onorab Vidot in fer resorti, ensi ki lezot Manm Onorab ki'n entervenir, i vremen enportan ki sa servis i ganny desantralize.

I annan bokou dimoun ki ti a voudre akse sa servis dan en fason pli pros, e sa i dan zot klinik respektif ou rezyonal. Zis parey klinik *Family Planning* i

ganny provizyonnen dan bann klinik, servis maladi transmisib ki egalman enportan, i devret osi retrouv son plas dan nou bann kominote.

Efektivman parey mon ti'n dir pli boner, *HIV/SIDA* i ankor pe ravaz nou sosyete e akoz napa ase sansibilizasyon sa ki konsern servis tes debistaz, dimoun pa pe vin devan.

Mon pe demann avek Minister Lasante pou travay lo en plandaksyon lo kiman yer pou re angaz sitwayen lo danze ki sa maladi i ankor pe enpoze lo nou sosyete. Tel ki danze lo bann nouvo ne ki kontrakte sa maladi. Son bann lenpak lo lafanmir lakominote, ensi ki danze ki stigmatizasyon i anmennen lo en endividi, ki porter sa viris.

Mon ti a osi swete ki nou bann klinik rezyonal atraver Minister Lasante, i angaz zot en pe plis dan ledikasyon lo bann maladi transmisib lo nou bann kominote.

Angaz zot en pe plis avek bann distrik pou organiz bann aktivite, par ki bann sitwayen i kapab edik zot lekor lo danze *HIV/AIDS*, ensi ki bann lezot maladi transmisib. Ki mannyer sa bann maladi i kapab ganny transmet. Kwa ki zot kapab fer pou anpese ganny sa bann maladi. E si malerezman zot in

ganny afekte avek transmisyon sa bann maladi, kote ki zot kapab ale pou resevwar servis medikal pou bann maladi transmisib.

Minister Ledikasyon osi atraver sinerzi avek Minister lasante, i devret pe osi entansifye zefor lo ledikasyon maladi transmisib avek nou bann zenn. Nou tou nou konnen ki bann zenn pe angaz zot pli bokou ki avan dan bann aktivite seksyel non proteze, san pran kont bann risk ki zot pe ekspoz zot lekor avek.

Nou bann formater i devret osi azour avek bann lenformasyon lo sa size, pou ki an retour nou bann zanfan ava pli byen edike lo sa size.

Mr Speaker, en lot fakter ki nou bezwen pran kont se, sa laspe konfidansyalite e stigmatizasyon. Kot akse pou servis lasante maladi transmisib i ganny donnen.

Mon santi ki Minister Lasante i devret travay pli konvenableman avek nou bann profesyonnel lasante, lo la fason ki zot tret e zer lenformasyon lo nou bann pasyan ki vin akse sa servis *CDCU*, ki mazoriterman i tre sansib.

Parfwa mon demande kote serten lenformasyon lo kondisyon medikal en dimoun i ganny met deor a laporte piblik,

si i pa sorti kot sa sant servis li menm.

Avan mon terminen Mr Speaker, mon ti ava voudre felisit Minister Lasante pou sa travay formidab ki zot pe fer lo rezo sosyal. Lenformasyon lo tou sort size lasante i aksesib pou lepep. Sirtou lo servis lasante transmisib.

Me par kont mon santi ki sa pti gous popilasyon ki napa akse avek rezo sosyal, zot osi zot pa merit ganny kit deryer. E en konsantrasyon davantaz i devret ganny fer dan sa direksyon. Avek sa Mr Speaker, mon konfirm mon sipor pou sa Mosyon. Mersi.

### **MR SPEAKER**

Mersi Onorab. Mon a pas laparol Onorab François Adelaide.

### **HON FRANCOIS ADELAIDE**

Mersi Mr Speaker. Bonzour tou dimoun. Dabor mersi Onorab Vidot pou ou Mosyon. Menm kantmenm nou'n fer dan en group. Me selman mon'n ekoute e ou'n vreman fer en bon deba ki nou vreman apresye.

Mr Speaker apre, komansman mon oule dir, mersi pou tou bann travayer lasante. Menm ki ozordi zot topik nou deba ozordi. Me pa krwar nou pe zis kraz zot. An

menm tan petet nou pe rod en pe lipou. Me nou anvi nou osi koman en Lasanble sey ede, sey anmenn nou sipor mannyer nou kapab, pou ed zot dan sa travay ki en pe difisil e menm par fwa kot bokou dimoun, petet zot perdi en pe konfyans.

Me nou, nou la pou koze. Pou abord sa topik menm ki si i en pe kontansye. Pou ki a lafen dizour nou ava kapab vwar en direksyon lo ki mannyer pou bouz devan.

So, Mr Speaker sa Mosyon pe demande pou desantraliz bann servis ki *CDCU* i ofer. *Mainly* servis tes debistaz pou *HIV*. Koman sa *MNA* ki sorti Baie Lazare Mr Speaker, mon osi mon annan bokou bann dimoun ki akse bann servis lasante. E si napa dan sid, nou pou bezwen vwar zot pe desann anvil. E ki sa par ler i annan bann kou finansyel.

E petet menm ki annan bann, ki bann dimoun i tant pou dekouraze pou zot desann, akoz i pa zis finansyel, me i letan osi, e par ler nou dir poudir *time is money*. E tou dimoun i bezwen depans son letan byen, pou ki pou li vin pli prodiktiv.

Mr Speaker, ankor prezan dan sid, nou vwar bokou bann devlopman ki pe vini. Sirtou bann devlopman touristik e ki

bokou bann dimoun pe sorti dan rezyon lavil, menm dan nor e zot pe vin dan sid, petet pou vin rod en travay. Menm pou vin travay.

E si sa bann servis, sirtou *Communicable Diseases* i reste lo kote anvil, sa i pou fer ki definitivman, dimoun pa pou kapab ganny akse parey zot devret pou sa bann tel servis. Ou konnen pou dir ler ou pe deplase dan ou travay, so par ler *Manager* i tant pou tir lizye. E si ou pe perdi bokou letan pou ou vin anvil, apre pou ou tourn dan sid, i pran bokou letan e petet la i fer ki sa bann dimoun i tant pou negliz en pe lo kote zot lasante.

E plito zot *focus* plis lo travay pou zot ganny sa reveni pou anmenn kot lakour. E sa dan li menm li i kree petet en pe konstrent. Kot parey mon dir, bann dimoun i prefere al zot travay e negliz en pti git zot lasante reproduktiv Mr Speaker.

I bon osi pou note ki, parey enn mon koleg Onorab Hoareau in dir, ki nou pa met sa responsabilite lo Minister Lasante osi. I annan bokou bann *NGO* ki ganny *sponsor* atraver *tax payers money* pou zot vreman vin delivre sa servis. Pou ed nou bann dimoun.

Me i en pe tris par ler. Pa tro krwar nou pe kraz zot osi

*NGO*. Me nou pe rod fason mannyer nou pe fer keksoz bouz en pe pli devan kot nou kapab tous plis dimoun.

Mon ti a swete ki pa zis Minister Lasante ki devret ede ladan, i annan bann *NGO* ki mon krwar nou devret trouv zot dan kominote. Nou trouv zot anvil. Nou trouv zot dan bann aktivite ki ganny fer lo nivo santral. Me dan kominote nou pa vreman vwar zot. E mon krwar ki ozordi Lasanble in konmans sa konversasyon. Parey nou'n dir sa i en Mosyon.

En Mosyon savedir, i pou anmezir ki nou pou koze. I pou ganny plis lavyann lo sa lezo, pou nou gete ki mannyer nou kapab fer sa travay pli byen. E kot tou dimoun i a santi li form par ladan.

So bann *NGO* osi, pa zet zot par *au chien*. Zot osi vin *onboard* lo sa Mosyon ki nou pe dir e montre ki zot kapab osi anmenn sa diferans dan kominote.

Mr Speaker, ler sa bann, ler ou annan bann servis dan kominote parey nou dir lasante i pa zis ki ler ou malad ou al lopital. Me son premye baz i komans lo lasante primer. Kot prevansyon i vreman zwe sa rol pou ki *SIDA/HIV* pa propaze an bonnavini dan kominote. E si dan kominote nou napa sa bout



par kot nou kapab *prevent*, sa pou fer ki petet i kapab kree en lespas pou bann dimoun kapab ganny enfekte.

Me si nou konsantre lo ledikasyon e i annan sa servis dan kominote, mon krwar i pou zwe en gran rol pou fer ki bann dimoun i konpran plis lo sa size. Zot kapab ganny konsey kot zot bezwen ganny konsey. E sa i ava ede pou minimiz en pe bann maladi ki relye avek *SIDA* e bann lezot *communicable diseases*.

Mr Speaker parey mon koleg Onorab Lemiel in dir, Anse Royale nou deza annan nou en sant lasante, e mon krwar ki si nou vreman met zefor ladan, nou a kapab trouve en plas pou nou kapab fer nou bann dimoun dan nou rezyon akse avek sa servis.

E petet en pti konsey osi, pou bann dimoun ki pe fer konstriksyon, bann dimoun ki pou petet, pou *involve* dan si i annan, pou konstrir bann sant lasante ankor, ki nou kapab met sa servis. Se son *design, ok?* Ou pa kapab met tou laport en sel landrwa kot tou dimoun i trouve, kot nou tou nou pe ale.

Me manner zot ava *design* li i ava fer, ki vre dimoun i vwar ou al lopital. Be selman bann lasanm ki ou ale, zot pa ava vreman konnen. E sa mon

krwar i ava kree en pe plis sa lespas pou dimoun akse sa bann servis.

Mr Speaker parey mon'n dir, bokou bann keksoz in ganny dir lo sa Mosyon. E mwan koman en Manm lo sa Komite, mon vreman fyer ki nou'n kapab finalman anmenn sa Mosyon dan Lasanble Nasyonal. An menm tan eksprim nou sipor avek tou bann parti prenan ki pou ede pou realiz, fer sa Mosyon vin en realite e kot nou dimoun i ava benefisyé.

Parey mon'n dir Onorab Vidot, mersi bokou pou sa Mosyon e kont lo mwan - ou pou ganny mon *full* sipor, e *esperon* ki Lasanble osi nou tou ansanm nou donn Onorab sa sipor inanim. En fason ki nou montre Gouvernman ki Lasanble i vreman nou tou nou konsernen. So, sa i en demann ki nou pe fer.

Byensir parey mon pe dir i en Mosyon, nou pa pe met okenn presyon lo Gouvernman. Akoz petet lo kote finansyel, petet i a kapab annan en pti lenpak. Me selman nou pe demann zot pou zot mazin lo la. O firanmezir parey Onorab William i kapab dir, nou kapab met sa bann program dan *gear* e nou ava kapab ede pou ki nou kominote i ganny tou sa ki i

bezwen. E nou vwar en besman dan bann maladi kominikab dan nou pei a lavenir. Mr Speaker avek sa de mo, mon dir ou mersi pou ou akord mwan sa pti letan.

### **MR SPEAKER**

Mersi Onorab. Laparol pou Onorab Sandy Arissol.

### **HON SANDY ARISSOL**

Mersi Mr Speaker. Bonzour tou bann Manm. Bonzour tou bann dimoun ki pe ekout nou. Spesyalman bann *staff* Minister Lasante.

Mr Speaker, Mosyon pe demann Lasanble, pe demann Gouvernman atraver Minister Lasante pou desantraliz servis *Communicable Disease and Control Unit/CDCU* avek bi:

(a) Ogmant tes depistaz pou *HIV*

(b) Donn plis akse pasyan dan en fason alez e dan plis konfidansyalite e redwir stigmatizasyon

(c) Ogmant nivo *compliance* anver zot tretman e swivi.

E sa Mosyon in ganny prezante par Komite *HIV/AIDS* sa Lasanble Nasyonal, ki konpri Manm lo tou lede kote latab.

Mon anvi zis letan nou pe koz lo sa Mosyon - parey in ganny dir Mosyon pa *binding* lo Gouvernman. Selman i

enportan ki dimoun ki pe swiv nou, zot konpran kwa ki nou koman en Lasanble nou pe rode. Kwa ki nou koman en Lasanble nou pe propoze. Pou ki Gouvernman li, i kapab li osi ganny en nide. Ek tou bann lezot Lazans konsernen an relasyon avek sa Mosyon, pou rode kote zot kapab zwenn nou lanmwaye semen.

Kestyon ki mon ti ava kontan demande lo komansman se, eski sa Komite par egzanp, zot in ganny sans, zot in zwenn avek Minister Lasante? Zot inn annan en konsiltasyon, zisteman lo sa bann demann ki zot pe fer?

Akoz mon pe demann sa kestyon Mr Speaker? Mon pe demann sa kestyon parski, *COVID* in montre nou en keksoz dan nou pti pei.

*COVID* in montre nou poudir nenport ki moman nou *comme* en Pti Leta Zil, nou kapab ganny tape avek en pandemi ki sorti lwen dan lemond. E vin apoz lo nou pti pei, e nou'n vwar 2an pase 3an pase. E sa in montre nou poudir;

Premyerman, nou annan en mankman resours dan pei. Nou annan en mankman bann profesyonnel dan nou pei. Nou annan en mankman lo nivo Minister Lasante pou nou

kapab sey dil avek en pe de tou. E *COVID* in montre nou sa. Se pou sa rezon mon pe demande si nou annan sa konsiltasyon.

Ou konnen parski ozordi. Mon ava komans avek premye; Ogmant sa tes la, pou *HIV*. Eski nou bezwen - mon keston mon pe demann mon lekor, atraver sa Mosyon, eski nou bezwen desantraliz *CDCU* pou nou kapab ogmant tes pou *HIV*? Mon pe demann sa parski senpleman kot Lasanble Nasyonal, tou-le-z-an bann *staff* Minister Lasante zot vin isi kot Lasanble e zot fer bann tes avek nou bann Manm. Zot vin isi kot Lasanble pou fer sa.

So si bann, si nou pe promot sa tes pou *HIV*, mon santi pou dir Minister Lasante i kapab ede dan sa laliny ki sa Komite zisteman i pe demande. Pou ki bann tes i ariv en pe pli pre avek lakominote. Kot bann pos-segonder par egzanp. Dan bann kominote, par egzanp Bel Ombre. Letan i ava annan lasante pou bann msye la ki ava pe vini byento. Nou ava dir be *ok*. Annou organiz. Annou Minister Lasante get zot resours zot annan. Vin en kou dan laplenn Bel Ombre. Annou teste ek nou bann msye. Fer tes pou *SIDA* par egzanp.

Eski Minister Lasante i kapab deplwaye avek son lekip,

pou li al en kou prizon, par egzanp, pou fer bann tes?

So, mon pe dir sa parski ogmant tes pou *HIV* mon dakor, mon an faver. Parski Minister Lasante ti la. Zot in donn nou nouvo sif. Depi dernyen lannen ziska la. Konbyen zot in detekte pandan sa pti peryod letan.

So, mon an faver pou ki i annan sa tes, pou nou kapab debiste e pou nou kapab fer sa travay an relasyon avek *HIV*. Alor mon santi poudir, menm si nou pou napa en desantralizasyon, i enportan pou Minister Lasante kapab bouze, pou li al pli pre avek la kominote pou fer sa travay.

Mon pe dir ek sa Mr Speaker, parey mon'n retourn ankor lo sa pwen mon ti pe dir bomaten, se parski kapasite. Eski koman en pti pei parey Sesel, avek pti git resours ki nou annan - e parey Onorab Adelaide in dir, firamezir sityasyon ava amelyore, eski nou annan ase? Si nou dir nou annan ase lekipman.

Eski nou annan ase profesyonnel pou nou kapab zisteman travay ek sa lekipman? Travay dan sa nouvo *building* ki'n ganny desantralize, pou nou kapab *achieve* sa *goal* ki sa Komite ki pe fer sa travay kot sa Lasanble

Nasyonal pe demann nou pou fer?

(b) Pe demann donn plis akse pasyan dan en fason alez e dan plis konfidansyalite e redwir stigmatizasyon. Ozordi CDCU kot i ete pou sa bann letan. Pou sa kantite letan, mon bezwen rekonnet e aksepte koman en Seselwa, poudir in annan son servis ki in rann avek la kominote depi in egziste. In laba pou en pe letan e tou bann dimoun zot in gannyen sa servis. Parski i annan en zoli pti *hall*, kot ou vini i annan en *facility* kot ou asize.

I annan son pti resepsyon kot sa ners ava kriy ou. Kot ou ava al vwar ou dokter ou bann konsiltasyon e menm nou, enkli mwan ki letan mon pe voyaze pou al dan en lot pei, kot mon pou al pran mon *mefloquine* pou *Malaria*. Kot mon al fer mon peyman pou mwan al kolekte. Oubyen si zanmen i annan vaksen *yellow fever*, pou lafyev zonn ki ou al pran. E se laba menm kot ou ale.

E sa diferans ki nou pe koze, se ki CDCU li i ti ganny relye avek bann dimoun ki ganny enfekte, oubyen kot laba si zot al pran zot tretman. So, prezan letan Sandy Arissol i vin la dan CDCU pou li al pran son *mefloquine*, eski dimoun ki

vwar li pe monte dan peron, alor i pe al swiv son tretman parski i en pasyan *HIV* and *AIDS* li osi?

Konfidansyalite: Mr Speaker mon rapel tre byen ti annan en kanpany ki Minister Lasante ti fer, sete 'Briz sa Silans'. Zot ti fer kanpany 'Briz sa Silans' e plizyer dimoun ti vin devan. Ti montre zot figir. Ti dir "mwan Sandy Arissol, wi mon pe viv avek *SIDA*."

Be kestyon ki nou bezwen demande ozordi, apre sa gran kanpany. Oli sa bann dimoun ki'n briz sa silans? Kote zot ete sa bann dimoun ki'n vin devan onnetman, parski zot ti pe siport zisteman sa kanpany anmennen par Minister Lasante, pou li briz sa silans pou li vin devan? Oli zot sa bann dimoun? Kote zot ete? Ki zot kondisyon lavi ozordi? Ki mannyer zot pe viv ozordi?

Eski Minister Lasante in fer son konpany, e son konpany in byen pase e mwan ki'n vin devan prezan person pa rode oli mwan? Ler mon lo la, i annan sa lot bout ki vin avek Mr Speaker. E redwir stigmatizasyon. Eski sa dimoun ki'n vin devan li son stigmatizasyon in ganny redwir?

Eski letan in vin devan in briz sa silans, eski ozordi in ganny en plas travay pou li

kapab sonny son lekor? E pou li kapab sonny son fanmir? Stigmatizasyon sa. Toultan nou pe koz lo la. E dan mon distrik mon annan dimoun ozordi, ki'n vin devan in briz sa silans. Kestyon ki mon bezwen demande pou li, eski i pe ganny stigmatize? Eski i dan en lanplwa?

Mon krwar Mr Speaker tousala an relasyon avek komite ki Lasanble Nasyonal nou annan *HIV/AIDS*, e Mosyon anmennen par Onorab Audrey Vidot, mon krwar i ava enportan letan nou pe fer sa travay pou desantralizasyon, mon krwar i osi enportan pou sa Komite avek Minister Lasante, pou nou osi kapab vwar. Pou nou konnen ki zistans in arive ek tou sa bann kanpanny ki nou'n fer dan lepase.

Kanpanny lo 'Briz sa Silans'. Kanpanny lo stigmatizasyon. E pou nou annan en levanter ozordi, rode oli sa bann dimoun ki'n vin devan? Ki'n arive avek zot? Eski zot pe viv zot lavi parey nou tou nou ti a swete zot pe viv zot lavi.

Me Mr Speaker, mon retourn ankor lo sa pwen esansyel ki mon ti fer lo komansman. I pou enportan pou nou osi balanse kapasite lekipman e bann profesyonnel

ki nou annan, letan Minister Lasante nou pe demann li pou li desantraliz en pe bann servis. Ki pou dan faver tou kominote, tou dimoun. E mwan mon an faver kot nou kapab desantralize, nou desantralize.

Me koman en pti pei nou pou bezwen osi fer li byen, pou nou asire ek letan nou'n ouver *building* - pa ouver *building* napa lekipman. Oubyen si i annan lekipman, nou napa profesyonnel pou nou zisteman kapab fer sa travay dan sa *building* ek sa masin. Pou asiste nou bann dimoun ki bezwen sa servis ki Minister Lasante, ki devret ofer avek Mosyon ki pe ganny demande ozordi.

Alors Mr Speaker se pou sa rezon ki mon ti pe demande, si sa konsiltasyon. E mon asire *HIV Committee* - *HIV* Komite dan Lasanble Nasyonal zot annan bann konsiltasyon. I annan bann vizit ki toultan zot fer. I annan bann rankont ki zot fer avek bann Minister e mon asire sa in ganny pran kont.

Selman nou bezwen osi profite la pou mwan dir mersi nou bann *staff* Minister Lasante, ki pandan *COVID* zot in travay sanses. Sanses. I annan ki pa'n pran konze preski 2an - 1an. Parski zot ti met zot lavi a risk. E nou annan nou bann ser ek frer ki'n perdi

lavi. Letan nou ti pe lager kont *COVID*, pou asire ki nou, nou reste an bonn sante.

Avek sa pti mwens kapasite ki zot annan, mwens resours, zot in sey zot mye pou zot kapab ankadre nou. Fer sir ki pei ek lakominote i kapab ganny proteze. E asire ki bann swen medikal i ganny respekte. E tousala in fer ki ozordi dan pei avek *COVID* ki'n antre, i annan plizyer servis ki'n ganny redwir.

Ki'n ganny abandonnen dan en sans parski nou ti met latansyon lo *COVID*. E tousala i enn pti pe bann lendis ki ti pe ganny demande ki nou'n koz lo la, pou asire ki Minister Lasante i kontinyen fer sa travay ki i pe fer.

Alors Mr Speaker, mwan mon pou siporte Mosyon anmennen dan Lasanble Nasyonal par Komite, bann Manm lo tou lede kote latab. Be selman an menm tan letan mon pe siport Mosyon, i enportan pou nou dan sa travay ki nou pe fer, pou nou balans sityasyon byen. Pou nou asire nou konman en Lasanble, nou pa pe mont lo lipye bann travayer Minister Lasante.

Parey mon pe dir avek mwens resours, mwens kapasite, mwens lekipman ki zot annan. Me pou nou koman en Lasanble donn zot *full*

resours. Siport zot dan tou fason ki nou kapab. Pou zot osi kontinyen siport nou. E pou zot kontinyen fer sa bon travay ki zot pe fer an relasyon avek lasante. E tou bann lezot keksoz ki annan pou fer avek lasante; ki reproduktiv; ki bann maladi kontazyez, oubyen maladi kardiyovaskiler ki annan dan nou pei.

E tousala i ava ed nou koman en pep. Pou nou kapab viv an bonn sante pou asire ki pei i kontinyen bouze, prodwir e annan bann dimoun an bonn sante pou nou kapab fer sir ki nou lekonomi i kontinyen briye.

E pou nou kapab ganny plis larzan pou nou asire ki desantralizasyon, lekipman, landrwa apropiye ek bann profesyonnel, nou ava annan plis dan nou pei, pou ki sa travay i ganny fer. Zis parey Komite dan Lasanble Nasyonal pe demann nou Mr Speaker. Avek sa detrwa mo mon ti a kontan remersye ou.

### **MR SPEAKER**

Mersi Onorab. Laparol i prezan pou Onorab Vidot pou son repons e konklizyon lo deba.

### **HON AUDREY VIDOT**

Mersi Mr Speaker. Mr Speaker avek en vizyon pou ki lasante tou dimoun dan Sesel atenn pli

o nivo lasante, fizik, sosyal, mantal e spirityel, e viv an larmoni - diran sa dernyen 30an, Sesel in amelyor nivo lasante popilasyon Seselwa, par bann aksyon Polisi e atraver bann stratezi tre ekstansif dan bann program prevansyon kiratif, soulazman e reabilitasyon.

Sa krwayans dan lasante pou tou. Lasante dan tou, i montre langazman. Langazman anver travay Komite. Pou maladi transmisib, *VIH/SIDA* e lasante reproduktiv.

Komite Lasanble pou maladi transmisib. *VIH/SIDA* e lasante reproduktiv. I en Komite bipartizan. Kot menm si nou annan bann Manm sorti lo tou lede kote latab parti politik dan Lasanble ozordi, avek nou divers lopinyon, me sa ki nou annan aker se vwar en meyer swen lasante ki konpreansiv e ki de ot kalite dan bann landrwa ki ofer servis lasante.

Se lo sa not ki mon pou zwenn mon koleg Onorab Aglae, kot in konfirmen ki nou osi lo sa kote latab, kot i konsern nou pep, devlopman imen, lekipman travay. E benefis travayer Seselwa ki pe travay dir pou pei, napa rezon pou nou pa lev nou lanmen pou siporte. Oubyen pou nou lev nou lanmen pou vot kont. Mon swete sa i a soulaz en

pti pe bann konsern ki mon koleg Onorab Hoareau in fer resorti atraver ou Mr Speaker.

Mr Speaker komite Lasanble pou maladi transmisib *VIH/SIDA* e lasante reproduktiv, i ankor enn fwa remersi tou travayer lasante, e sosyete sivil dan zot travay e zot langazman ki zot pe donner avek pep Seselwa.

E nou donn nou langazman pou kontinyen travay avek zot dan sa lalit kont viris *VIH/SIDA* e kont stigmatizasyon. Parey in ganny fer resorti dan deba, Sesel i annan en lobligasyon pou aplik Lagreman ki'n sinyen e montre ki nou pe fer tou posibil pou edik nou popilasyon e donn zot sa sipor nesaser.

Statistik ki'n ganny donner diran deba, i montre nou ki viris *VIH/SIDA* e maladi transmisib, i alors enportan ki nou enn pti popilasyon, nou bezwen fer sir ki nou pran bokou ka. E nou pa pran bokou letan pou nou reazir. Nou bezwen rekonnèt ki deza Minister Lasante pe rankontre bokou defi. Nou annan manm ki'n fer resorti.

I annan sityasyon kot i annan mankman latizann. Mankman profesyonnel parey mon koleg Onorab Arissol in fer resorti. Nou annan spesyalis ki

nou ankor bezwen dan pei. E lezot servis ankor ki Minister Lasante i bezwen, pou ranforsi travay ki annan devan nou.

I enportan ki Minister Lasante i pran bann kritik dan en fason konstriktiv. Pou ki piblik i annan plis sa lespwar e soulazman ler i al rod en servis kot nou bann swen lasante. Pa bliye ki lamazorite nou popilasyon, tel ki nou menm nou isi la anndan, nou servi sa sistenm lasante Leta. Alors i nou devwar pou met lanfaz lo sa ki pa pe marse, pou ki nou amelyor nou servis pou nou osi ganny byen okipe.

Sa Mosyon ki devan nou i selman en bout travay ki annan pou fer. Me i reste en priyorite. Nou osi rekonnet ki i annan lezot faktor dan stil lavi nou popilasyon ozordi, ki met nou tou bokou a risk lo bann maladi transmisib.

Alors, i reste nou responsabilite pou nou fer tou posib, pou nou konn nou stati. Fer bann tes. Regard nou lasante e revwar nou stil lavi. Pou nou viv pli lontan e byensir, i pou ede lo bann depans. Koup lo depans ki pa neser. Parey mon bann koleg in fer resorti, demann pou desantraliz servis CDCU, pou tir presyon e soulaz bann travayer, ki travay dan sa lanvironnman ozordi, ki baze

santral, e piblik dan son lokasyon ki baze laba, ki fer vizit kot Twa Zonn, i ava vin pli pre avek bann servis lo baz rezyonal.

Mr Speaker, mon oule reponn kestyon atraver ou, mon koleg Onorab Arissol. Wi Onorab, parey mon'n fer sorti pli boner dan mon prezantasyon Mosyon, in annan plizyer dyalog kot in annan konsiltasyon e vizit par Manm Komite. Kot nou'n vizit CDCU. Nou'n menm vizit *National Aids Council*. E nou'n menm zwenn avek bann sosyete sivil, zisteman pou konpran zot travay e byensir konn zot bann defi. Se pou sa rezon ki ou'n vwar, nou nou'n vin avek sa premye Mosyon ozordi.

E sa bann defi i annan ki'n fer resorti, ki swa atraver kot travayer lasante, menm manm sosyete sivil, enkli bann pasyan, ou menm dimoun ki servi sa fasilite, Zot in fer resorti bann konsern. E i annan menm, ki'n menm met serten propozisyon kot petet Minister Lasante, i merit revwar sa bout *floor* kot *Yellow Roof*, kot pe servi pou servis klinik lizye. Pou donn petet CDCU e vwar en lot lokasyon pou klinik lizye. Tou sa i bann pwennvi sorti kot



piblik ki servi bann fasilite kot *Yellow Roof*.

Mon osi rekonnèt pwen ki mon koleg Onorab Adelaide in fer resorti, ki nouvo dan deba, se petet revwar bann striktir letan i ganny *designed* pou fer bann fasilite lasante pou donn servis. Petet ankor pou ede amelyor lo kote konfidansyalite e petet kliyan osi i santi li pli alez ler i antre dan bann fasilite sant lasante.

Nou konpran, lo sa not mon osi sipòrt e donn komitman kestyon ki Onorab Arissol in fer resorti, lo sa size stigmatizasyon, kot bann dimoun ti sorti lontan, zot ti vin devan pou donn en koudmen.

Petet sa Komite osi i ava pran not pou ki ler nou rezwenn ankor avek bann Lazans, pou nou relev ankor sa size. E vwar ki mannyer nou kapab donn zot sa sipòrt parey bann Manm pe demande.

Mr Speaker, mon konklir mon lentervansyon par remersye tou mon bann koleg ki lo Komite. E tou bann koleg Manm Lasanble Nasyonal ki'n montre lentere pou partisip dan sa deba ozordi. Nou vreman apresye e nou remersi zot pou zot kontribisyon. Akoz mesaz i kler. Pou rekonnèt ki dan sa Mosyon, demann ki nou pe

demann Minister Lasante, pou komans sa legzersis.

Annou pa zis dir poudir, wi i bezwen ganny byen striktire. I pou en diskisyon ki pou bezwen ganny fer. Me annou pa tarde pou nou komans sa dyalog, e fer li o pli vit posib. Si non, naryen pa pou bouze. So, lo sa not mon a dir ou mersi pou donn mon laparol. E mon demann tou Manm pou donn nou sipòrt anver sa Mosyon. Mersi.

### **MR SPEAKER**

Mersi Onorab. E mersi bann Manm pou zot kontribisyon. Nou ava rapel bann Manm pou vot lo Mosyon. Manm ki an faver lev lanmen silvouple? Mersi mon krwar tou Manm in vote. Okenn Manm ki'n kont?

Vot lo Mosyon anmennen par Onorab Vidot ki devan zot, 30 Manm in vot pour, 0 kont e 0 abstansyon. Alors mon annan plezir anonse ki in aprouv sa Mosyon avek inanimite e mersi pou travay Komite *HIV/AIDS* lo sa size.

Byen mon krwar nou ava regard lot Mosyon ki lo nou *Order Paper*. Parey mon'n dir nou pou sot Mosyon nimerò 2, e mon ava al lo Mosyon 3. Dan non Onorab Clifford Andre.

### **HON CLIFFORD ANDRE**

Mersi Mr Speaker. Bonzour Mr Speaker. Manm Onorab e dimoun ki a lekout. Mr Speaker sa Mosyon ki la, i en Mosyon ki pou administrativman re nonm en *Select* Komite ki nou'n fer. E sa Mosyon i lir koumsa.

Aprè ki Lasanble in kree en komite sektoral, mon pe *move* ki sa Komite i ganny nonmen koman swivan; 'Sekirite Alimanter e Devlopman Soutenab. An angle i pou *'Food Security and Sustainable Development'*.

Mr Speaker, Onorab Adelaide ti anmenn en Mosyon, pou nou kree en Komite ki pou vwar enn pti pe bann devlopman laspe lagrikiltir, sanzman klima, ki pou ganny fer lo diferan zil. E ki mannyer nou koman en pei nou pou annan sa laspe sekirite alimanter e soutenabilite, dan bann devlopman ki pe arive dan nou pei.

E nou'n formaliz sa Komite e lenstriksyon se pou nou fer sir ki i annan en nom ki anvlop tousala. E nou'n fer nou mye pou nou vin avek sa non. E mon ti a kontan soumet sa avek Lasanble. E swivan sa Mr Speaker, mon ti a kontan envit nou *Chief Whip* pou li osi nomin bann Manm ki pou servi lo sa Komite. E alors, mon pa pou long. E sa i en Mosyon ki pa

devret long. Alors mon ti a kontan soumet sa Mosyon avek Lasanble pou konsiderasyon. Mersi.

### **MR SPEAKER**

Mersi. Mon a ganny segonnman lo sa Mosyon silvouple? Onorab Adelaide.

### **HON FRANCOIS ADELAIDE**

Mr Speaker mon annan plezir pou segonn sa Mosyon. Mersi Bokou.

### **MR SPEAKER**

Mersi. I annan Manm ki pou adres sa Mosyon? Onorab Arissol.

### **HON SANDY ARISSOL**

Mr Speaker, mon pa anvi adres Mosyon. Be mon anvi zis ankor enn fwa, letan Mosyon ti ganny prezante dan Lasanble Nasyonal, lot kote latab ti dir ek nou zot pa pou partisipe. E nou ti *extend* lanmen. E menm dan *ABC* mon ti *remind* lot kote pou zot sey soumet bann nom, si zanmen zot annan. So, la i ankor en loportinite.

Letan non in ganny rearanze pou redrafte, si zanmen bann Manm lot kote latab zot ti ava kontan zwenn sa Komite, zot ti ava les nou konnen. Akoz aprè mwan mon ti ava kontan, zisteman kapab

prezant nom bann dimoun lo nou kote, ki enterese pou travay avek sa Komite. Setou ki mon ti a kontan dir. Mersi.

**MR SPEAKER**

Mersi. Onorab Waven William.

**HON WAVEN WILLIAM**

Mersi Mr Speaker. Mr Speaker mon pou siport osi sa propozisyon anmennen par Onorab Clifford Andre pou sa Komite. O non sa Komite, Mr Speaker parey ou konnen, ou avek mwan nou fek sorti partisip dan en *forum* enternasyonal kot sekirite alimanter avek sa size devlopman soutenab.

I pe pran en plas vreman enportan e pivotal dan bann diskisyon ki pe ganny fer o nivo mondyal, sirtou an fas avek bann lensertitid. Mon pa oule dir tro bokou lo la, akoz mon annan en Mosyon ki al anver kreasyon sa Komite, e anver bann lensertitid ki nou pe fer fas avek mondyalman. E osi dan konteks Sesel.

Alors mon anvi dir ki i byen ki Lasanble pe *form* li sa Komite, akoz i pou en Komite ki pou vreman enportan, pou asire ki fason fer dan bann plizyer sekter, ki annan pou fer avek garanti sekirite alimanter avek souverennite. Ki ganny

mentenir dan en direksyon ki soutenab. Avek sa de pti mo Mr Speaker. Mon anvi remerisi ou. Mersi.

**MR SPEAKER**

Mersi Onorab. Napa lot lentervansyon. Mon ava apel bann Manm pou vot lo sa Mosyon. Manm ki an faver lev lanmen silvouple? Mersi. Manm ki kont?

Lo Mosyon prezante par Onorab Clifford Andre, 22 Manm in vot pour, 0 Kont e 8 Abstansyon. Alor sa Mosyon in prouve par Lasanble. Mersi.

Onorab Arissol ou'n ganny apele pou nonm bann Manm ki pou pran par lo sa Komite, avek lenvitasyon pou lot kote osi si zot anvi zwenn zot ava fer Lasanble konnen. Onorab Arissol.

**HON SANDY ARISSOL**

Mr Speaker, kekfwa mon ti ava kontan demann *Chief Whip* lot kote. Kekfwa avan mon fer okenn prezantasyon, si zot ti a kontan nomin okenn Manm lo sa Komite ankor enn fwa. Kekfwa i ti ava donn nou en konfirmasyon si wi oubyen non. Avan mon fer okenn prezantasyon. Si i *ok* avek ou?

**MR SPEAKER**

Onorab Lemiel. Ou oule pran laparol?

**HON SYLVANNE LEMIEL**

Mersi Mr Speaker. Mr Speaker pou le moman nou *Coccus* nou *maintain* ki nou pa pou partisipe lo sa Komite, e si an ka i arive ki nou desizyon i sanze, nou ava fer zot konnen. Mersi.

**MR SPEAKER**

Mersi. Onorab Arissol, ou kapab kontinyen.

**HON SANDY ARISSOL**

Mersi Mr Speaker. Lo nou kote bann Manm ki enterese pou et lo sa Komite. Parey nou ti dir Mr Speaker, depi o komansman letan Mosyon ti ganny prezante dan Lasanble, i en Komite ki napa finans avek ki atase avek. E zis en travay ki sa Komite pou fer avek bann responsab an relasyon avek sekirite alimanter.

Nou annan Onorab Andre, Onorab William, Onorab Adelaide, Onorab Loizeau, Onorab Larue, Onorab Esparon e osi Onorab John Hoareau. Mersi Mr Speaker.

**MR SPEAKER**

Mersi Onorab. Komite in ganny formen e mon swet zot bon travay. Bon avek sa nou pres

pou ariv midi ki normalman i ler ki Lasanble i devret pran poz. Alors mon ava tenir lanmenm pou le moman e nou ava re kontinyen avek Mosyon apremidi 2er.

Nou ava pran poz la e nou ava rezwenn 2er. Mersi.

***(BREAK)***

**MR SPEAKER**

Bon apremidi tou dimoun, bann Manm dan lasal, nou *staff* e nou piblik. Ankor enn fwa nou ava rebran travay lo Mosyon e nou pe pas lo en Mosyon dan non Onorab Waven William. Onorab prezant ou Mosyon silvouple.

**HON WAVEN WILLIAM**

Bon apremidi Mr Speaker. Mr Speaker. Mon annan gran loner pou prezant sa Mosyon ki lir *comme* swivan;

Prenon kont sityasyon lensertitid mondyal, konfli zeopolitik lager ant Larisi e Ikrenn, ki pe ganny anplifye par zot bann alye, bann tansyon mondyal, vizavi bann menas. *Bomb* nikleer e ankor ravazan pandemi *COVID*, Mr Speaker, mon pe demande ki Gouvernman i konsider revwar stratezi ki annan pou fer avek sekirite alimanter. Mersi.

**MR SPEAKER**

Mersi Onorab. Wi Onorab Aglae ou annan -? Wi?

**HON EGBERT AGLAE**

Mr Speaker, bonn apremidi. Mon oule zis klarifye si in annan en lamannman avek Mosyon, akoz baze lo *Order Paper*. E mannyer Mosyon in ganny lir, eski i annan en nouvo lamannman ki nou, nou pa'n okouran? Ki pa'n ganny sirkile?

**MR SPEAKER**

Annefe, wi Onorab. Ou Mosyon pa egzaktaman parey *wording* lo *Order Paper*. Eski ou annan en diferan ..?

Si i annord avek ou, mon ti ava prefere ou lir *wording exact* ki lo *Order Paper*. Ou a relir silvouple.

**HON WAVEN WILLIAM**

Mr Speaker, Mosyon i lir *comme swivan*;- Prenon kont sityasyon lasertitid mondyal, konfli zeopolitik e latak pandemik ek reperkisyon global ki zot in anmenn avek zot, Lasanble i demann Gouvernman pou revwar stratezi, pour garanti en serten nivo sekirite alimanter nasyonal soutenab. Mersi.

**MR SPEAKER**

Mersi Onorab. Sa i annord. Mon a ganny en segonnman pou Mosyon. Onorab Adelaide i a segonde.

**HON FRANCOIS ADELAIDE**

Mr Speaker, avek plezir mon oule segonn sa Mosyon anmennen par Onorab William. Mersi.

**MR SPEAKER**

Mersi Onorab. Onorab William i adres son Mosyon.

**HON WAVEN WILLIAM**

Ek en gran loner ki mon prezant sa Mosyon. Ki tonm byen pandan ki Sesel in komans selebre zournen sekirite alimanter, ki'n komanse depi le 16 Oktob e pou ale ziska ler 22 Oktob.

Mr Speaker, i osi en gran plezir pou mwan remerci nou Bondye Tou Pwisan pou son gidans, pou son benediksyon, pou son faver e lagras lo nou pei. Tou loner, louanz e laglwar i pou li tousel Mr Speaker. Mr Speaker mon pe testifye ki son mirak i ariv toulezour, pou sa ki konpran son fason travay.

Sa ki'n arive Sesel depi sanzman Gouvernman ti pou arive. Sesel pe viv en mirak progre ekonomik enkrwayab, pandan ki plizyer pei zot krwasans ekonomik zot pa

sitan zoli, ouswa zot tonm dan ran negativ.

Mr Speaker, san dout bann desizyon mezir ekonomik san gidans Bondye, nou ti pou *fail* Mr Speaker. Nou bann dirizan in ganny gide ek lasazes e pridans, pou pran bann desizyon, menm si zot pa popiler. Menm si Lopoziyon in sey tou pou derout nou atraver plizyer mannev politik popilis, Mr Speaker, nou'n kapab fer sa parkour ziska kot nou ete ozordi.

Ler Bondye in dir wi, lekel ki kapab al kont son dezir Mr Speaker? Seselwa i annan rezon pou selebre Mr Speaker. Lo non nou Bondye, Rezon pou selebre, konfyans dan nou bann dirizan, i annan tou rezon pou selebre, dan bann zour ki pe vini Mr Speaker.

Mr Speaker, Mosyon i lir *comme* swivan; me selman mon pou al lir li dan en fason pli elabore la;

'Prenon kont sityasyon lensertitid mondyal, konfli geopolitik lager ant Larisi e Ikrenn, i pe ganny anplifye Mr Speaker, akoz ou annan bann alye tou lede pei ki pe koste pou kapab ed kanmarad, ki fer Mr Speaker ki sityasyon mondyal i vin pli enserten, letan ou pran kont sa ki pe arive.

Mr Speaker, alors Mosyon pe demann Gouvernman pou revwar stratezi ki mars, ki an mars pou garanti en serten nivo sekirite alimanter soutenab pei.

Mr Speaker, letan mon pe dir ki sa ki pe arive, i pa akoz lasans isi dan sa Lasanble, e dan pei, mon pa ti pou ekspekte ki mon ti pou koz lo sa Mosyon ozordi. Mon pa ti pe ekspekte ki Komite sekirite alimanter e devlopman soutenab ti pou ganny formen e prezante ozordi Mr Speaker.

Mr Speaker, parey ou konnen, dan travay ki nou'n sorti fer laba *Rwanda (IPU)*, mon'n prezant en rapor Sesel, kot mon'n mansyonnen ki sa Mosyon pe al ganny pase. E ki sa Komite Sekirite Alimanter avek Devlopman Soutenab pe al ganny formen, ki i byen.

Mr Speaker, Minis Lagrikiltir ti annan en lentansyon fer en *statement* lo sekirite alimanter, me pou en rezon ou en lot i pa'n kapab vini. Pe enport moman in tomb byen pour Lasanble fer en deba e aprouv sa Mosyon.

Mr Speaker mon demann gidans Bondye pou ed sakenn de nou, pou fer bann kontribisyon pozitiv. Fer bann kritik konstruktiv pou edifye sa pep koman konsonmater, bann diferan akter dan sekter

prodiktiv agrikol, E dan sekter, donn valer azoute.

Mr Speaker, ou ki'n fek diriz en delegasyon dan 145enm Lasanble Zeneral Linyon Enter Parlmanter *Kigali Rwanda*, sirman e san dout atraver bann diferan konsern mondyal, an term size ki'n ganny aborde, ou pou osi agree, ki wi Sesel depi yer sa revizyon stratezi pou garanti en serten nivo sekirite alimanter soutenab, i le moman.

Mr Speaker, realite ozordi se ki toulezour atraver medya, nou temwanny lefe sanzman klima, ki anmenn bokou pert, an term propriyete e lavi. Resaman, dan linondasyon Pakistan, linondasyon Nizerya. E mon fek tande dan nouvel taler, *Nicaragua*, parmi lezot pei, dife lafore ki ravaz bann pei tel parey Lostrali, Lanmerik, parmi lezot, lefe pert sosyoekonomik atraver tou sa bann diferan lensidan, Mr Speaker, i afekte, i afekte kapasite pou sa bann pei prodwir.

Mr Speaker, ki pe kree baz pou entansifye kriz manze, lenerzi e lezot fournitir ki Sesel, koman en pti pei bezwen enporte pou sirviv ekonomikman.

Mr Speaker, bann dirizan bann pei afekte, zot dirizan zot

toultan admet ki zot pa tin byen prepare pou bann tel evantyalite. Nasyon-z-ini in rekonnèt ki linaksyon i kout ser. I kout lavi. I enspir zonn pou vin pli proaktiv.

Mosyon pe demann Gouvernman pou reste relevan. Reste proaktiv. Pou touzour revwar realite leta sekirite pei dan konteks, tandans devlopman lensertitid global.

Sa Gouvernman, swadizan novis dapre Lopozisyon i paret novis pou zot. Me pe ganny gide ek faver ek lagras Bondye pou delivre Mr Speaker. Ki 2an pli tar apre sanzman pe ganny met lo rikord koman eksepsyonnel dan performans, e pou sorti lafen lannen avek '*Distinction*' Mr Speaker.

Mr Speaker, sa pa mwan ki dir. Sa se nou bann partener kolonyal ki ankor pe kontrol nou dan en fason modern, *every step of the way*. Sirtou Mr Speaker, dan konteks globalizasyon ouswa mondyalizasyon. E entergregasyon rezyonal.

Zot ki *set the bar* e zot ki dikte. Menm si ou en pei endepandan ouswa souveren. Ennler ou demande eski vremen nou endepandan? Kestyon prefere lo la.

Mr Speaker, alors sa Mosyon pe demann plizyer aksyon ganny fer dan en fason pli enkliziv, pou asir partisipasyon tou akter konsernen e asir en nivo sekirite alimanter soutenab dan pei.

Annan en balans ant prodiktivite nasyonal e lenportasyon, kot i posib pou ranforsi sa rezilyans, Dan ka okenn evantyalite. Kot Sesel i pou bezwen depay son difil li tousel, ziska ler led posib dan larezyon ouswa enternasyonalman i ava ariv kot nou laport.

Mr Speaker, koman en apranti dan domenn lagrikiltir, mon dir en apranti aköz toulezour Mr Speaker, sa ki onnet e pare pou admet, ou aprann nouvo keksoz toulezour Mr Speaker.

Dan letan ki mon ti komans mon karyer dan sekter lagrikiltir Mr Speaker, mon ankor annan serten regre e konsern. Regre e konsern aköz letan ou fer en tourdorizon lo nivo ki sekter lagrikiltir ti ete sa lepok, bann aki ki nou ti annan, nivo ki nou ti'n arive, kalite travayer profesyonnel ki nou ti annan, pandan en peryod 25an mon konesans mon'n temwanny en regresyon.

Dan nivo kalite profesyonnel, lenstitisyon e aktivite, ensi ki son lekol Mr Speaker. Plizyer bann desizyon lo en baz politik ti ganny pran Mr Speaker. Ki ozordi nou pe vwar son lefe. Mr Speaker pa vedir ki tou ti mal. Me selman nou ti'n kapab fer pli byen.

Mr Speaker ozordi dan tou dimansyon, ou konstata ki ti annan lespas pou fer pli byen, si konsiltasyon enkliziv, ti ganny fer a sa bann lepok e moman. I enportan ki mon pa ganny vwar pe sinyale ki tou keksoz anba ansyen Gouvernman ti mal. Ki mon retenir - ki mon retenir Mr Speaker, ki pozitiv, atraver sa tranzisyon, se ki sa ki mal, nou ava korize e amelyor lo la. E kot i byen ki'n ganny fer, i rol en nenport Gouvernman ki sarz me pa fou;- pou repete, mon repete - ki sarz me pa fou, pou anbelir lo sa bann keksoz ki byen Mr Speaker. Ki ozordi sa Gouvernman. Sa nouvo Gouvernman pe anbelir.

Alors sa zafer zot nide ki Gouvernman pe enplimante, politisyen in ler pou sezi realite lavi, aköz napa okenn Gouvernman *au monde*, ouswa okenn endividi ki annan monopolizasyon lo lide. Me sa ki nou a tonm dakor se respekte



pwennvi kanmarad, san ki nou bezwen maltret kanmarad.

Mr Speaker, dan konteks sa Mosyon, mon anvi fer sa bann rekomandasyon swivan;

Enn, mon pou demann Gouvernman pou fer tou sa ki nesese pou travay tou akter konsernen dan sa rol koman fasiliter, pou promot en devlopman soutenab alimanter nasyonal.

E pou koup lo lenportasyon manze kot i posib pou garanti en serten nivo sekirite alimanter e souvrennte.

Dezyenmman, Pou travay avek tou parti prenan pou anmenn linite dan sekter lagrikiltir, lapes. E donn valer azoute pou plis rezilyans dan sa sekter, kont okenn evantyalite enprevwar.

Trwazyenmman, Konsilte en akter dan sa sekter, pou idantifye pwen feb e pwen for, pou travay lo la dan sa partenarya Gouvernman e piblik.

Katriyenmman, Revwar ankor dan konteks ozordi, fas ek lensertitid bann Lalwa pou fasilite lavi sa sekter. Pa pou son detriman, me pou son progresyon.

Senkyenmman, Dan konteks pratik Sesel e kad aktivite sosyoekonomik dan sa sekter, i rekomandab ki

teknoloji modern i ganny targete pou plis efikasite, anba kouvertir kot devlopman i kapab vertikal lo bann morso teren pli pti ouswa dan montanny.

Sizyenmman, Sa size *agroforestry*, nou'n tann tro bokou koze lo la. In ler pou lazans konsernen pou seryezman ek sekter prive, pou eksplwat li dan tou son lanplir Mr Speaker. Akoz sa pou donn plis lavantaz e plis valer azoute, e plis larises.

Mr Speaker, nou annan en bann lespes plan e plan fri ki vin byen Sesel, pou ogmant prodiktivite, e donn valer azoute. Ki nou'n temwannyen, ki potansyel i la. Par le fe i mank kad lankadreman. Akoz i mank kad lankadreman? I reste pti dan tou kwen zil.

Mr Speaker, nou'n temwanny sa dan sa aktivite ki ti fer laba Val Den Dor. Mr Speaker, ki Gouvernman dan lespri manifesto, i fer tou sa ki posib pou sa sekter transformen pli vit posib. Pou ganny sa nivo sekirite alimanter soutenab, par met bann target anbisye anyel. Met a dispozisyon resours nesese e kordin aksyon avek efikasite.

Wityenmman, Ki sa eleman kle, kredi, bann kriter i ganny revwar ankor parey dan

Mosyon ki mon ti prezant resaman devan Lasanble. Ki bann kondisyon lanvironnman biznes ki'n sanze. Ki antreprenner ouswa investiser pa vwar zot kwense, zis aköz kriter i reste rizid dan konteks lensertitid mondyal. Mr Speaker. I annan sa nesesite pou revwar sirtou dan konteks ki nou ete ozordi.

Nevyenmman, Seselwa koman sa pep inik dan lemonn, i *ride* lo sa *narrative* travay dir. Pran responsabilite koman sa *mantra*, pou plis kreasyon larises e prosperite personnel.

Dizyenmman, Nou zefor inifye in prouv avek nou, menm pandan sa 2an sakrifis, travay dir pou redres lekonomi, frer e ser Seselwa, zot in solider. Nou pe vwar fri nou travay dir. Ki wi, wi, ou ek mwan, e nou tou, nou annan tou rezon pou selebre sa reisit.

An konklizyon Mr Speaker, Sesel kategorize koman en *high middle income country*, in *attend* preski tou bann target devlopman soutenab. Mr Speaker, dan e klendey Sesel i kapab osi perdi tou.

Mosyon pe demande ki Gouvernman i revwar stratezi pou garanti en nivo sekirite alimanter soutenab, ki kouver plizyer sekter dan son lansanm.

Akoz zot enterkonekte e depan lo kanmarad pou maksimiz reveni.

Mr Speaker, target nimerò 8 devlopman soutenab ki koz lo *decent job* pou prosperite ekonomik personnel e pei, i santre dan size sa Mosyon. Ler okenn pei pa kapab soutenir target devlopman soutenab nimerò 8 Mr Speaker, lezot target i ganny afekte e riske pa ganny zwenn.

Annou fer li pou Sesel, pou ankor plis rezon. Pou kontinyen selebre ozordi e pou touzour e pou zenerasyon apre zenerasyon.

Mr Speaker annou mazine ki, letan nou anpes serten progres, i vedir osi limitasyon lo progre lezot. Mersi. *I beg to move.*

**(APPLAUSE)**

**MR SPEAKER**

Mersi. Mon a ofer Onorab Adelaide pou kontinyen.

**HON FRANCOIS ADELAIDE**

Mersi Mr Speaker. Bonn apremidi tou dimoun a lekout. Mr Speaker, napa keksoz ki fer mwan pli fyer, ler mon tann nou Lasanble pe diskit bann tel topik parey sekirite alimanter. Sirtou la ler nou tou nou konnen ki pe pase otour

lemonn, *in regards* to sa zafer manze.

Mr Speaker, ankor i fer mwan pli fyer akoz se mon sa MNA ki pe reprezant pli gran popilasyon fermye dan Sesel an zeneral. E si mon pa pran sa loportinite pou mwan koz enn pti git lo zot non, mon krwar mon pou en pe ipokrit lo mwan menm.

Mr Speaker, Dimans pase nou tou nou ti vwar, kot menm nou bann Minis, malgre zot vremen *busy*, nou ti kapab vwar en group zot ki ti mont anler Val Den Dor pou zot temwanny louvertir manze Kreol dan leo.

Mr Speaker sa ti fer mon vremen fyer. E depi ler mon Baie Lazare zanmen mon'n deza vwar o tan Minis parey Dimans. E mon dir zot mersi pou akonpany mwan e pou montre sa bann dimoun Val Den Dor e bann dimoun an zeneral, ki nou Gouvernman i siport zot! E nou pou sey tou fason pou nou kapab ankouraz zot. Sirtou dan sa moman ki vremen, ki nou apel, i vremen enserten.

Mr Speaker, parey mon pe dir, Val Den Dor i vremen berso sekirite alimanter. Parey tou kou mon ti dir zot. En fwa mon ti bat avek en touris. Ki ti demann mwan, i dir mwan, ou sorti Sesel? Mon dir li wi. I dir

mwan Sesel vremen paradi lo later.

Mon pa ankor demann li akoz Mr Speaker. I ti dir mwan sa bann keksoz swivan, I dir mwan en Seselwa, ler i get nou, I kapab pa travay. Me selman sa nou dekouraze, nou oule tou Seselwa travay.

Me selman lo son konteks i dir mwan, isi deor nou bezwen travay, akoz nou bezwen peye pou ganny delo. Sesel i annan bokou larivyer ki dimoun i ganny delo mannyer zot anvi. I ti dir mwan poudir isi manze fodre nou aste. Me ler i get Sesel sa ta pye fri. Tou keksoz isi Sesel ou kapab manze. E tou keksoz kot ou mete i kapab pouse.

Mr Speaker, i dir mwan, be deor laba kot mon reste mon pa kapab dormi deor. Bann zannimo feros i kapab manz mwan. Be i dir mwan Sesel ou kapab dormi kot ou anvi laport ouver. Napa sa bann zafer ki pou petet, ki pou kapab fer ou per ouswa manz ou kan in ariv aswar.

Mr Speaker, apre bokou konversasyon ankor mon ti remarke, wi Sesel i vremen en paradi *terrestre*. E ozordi letan mon pe koz lo sa Mosyon, i fer mwan bokou plezir, ler mon pe nonm mon pei avek sa leker kler, mon vremen soulaze ki

Onorab William in kapab anmenn sa Mosyon dan sa Lasanble ozordi, pou nou kapab donn nou sipor.

Mr Speaker ler ou pe gete, tou keksoz i tonm an plas. Sa semenn, i semenn sekirite alimanter. E parey mon ti dir Val Den Dor Dimans nou'n konmanse. E la ozordi nou'n kapab kree sa Komite dan Lasanble Nasyonan ki pou annan manda sirvey. Tou bann keksoz otour sekirite alimanter e apre sa Mosyon i vini, pou ki nou kontinyen *beef up* lo nou bann langazman ki nou annan. E Mr Speaker, ankor sa i fer mwan en gran plezir.

Mr Speaker, malgre nou pe amelyore, tou kou mon paran ti dir mwan, ou konnen mon boy, lontan dan letan kolonyal ti annan en pratik ki tou dimoun ki annan en later ti bezwen plant en pye friyapen. E sa in fer ki ler ou pou gete o toultour Mahe partou. Menm Praslin La Digue, pye friyapen i annabondans. Me selman en lot keksoz ankor ki mon oule dir, ki mon krwar ki lotorite i devret get sa osi serye. Akoz sa osi pe ede menas nou sekirite alimanter.

Nou vwar poudir partou, tou nou bann pye fri pe ganny anvair par bann gran, gran lalyann ki pe touf nou bann pye

fri avek bann pye friyapen parey nou dir, e i pe anpes zot devlope. E mon krwar poudir in ariv ler, pou si nou vreman serye. Nou bezwen met tousala o kler, e les nou bann pye fri kontinyen raporte. Pou ki zanmen nou ava kapab mank fri e legim dan nou pei.

Mr Speaker, mon sot enn pti kou lo lagrikiltir. Mon vin en kou lo lapas. Mr Speaker, nou antoure par lanmer antye. Nou lanmer i plis ki nou later e byensir nou resours ankor i pli bokou dan lanmer, ki lo later.

Mr Speaker, gete ki mannyer ankor nou beni. Si ou bezwen en pwason, ou kapab pa al aste. Me ou a rod ou en nilon, avek en laliny avek en lanmson. Ou al lo en ros. Ou kapab ganny enn pti bouyon pou ou. E pou ou fanmir. Me Mr Speaker, nou bezwen pran sa ka serye. Akoz dan Lasanble tanzantan mon'n koz lo la, e mon ankor pe dir, si Lotorite konsernen pa pran aksyon avek bann ekspatriye ki vini, ki ronz nou bann brizan. Avek zot lasenn, avek zot laliny, avek zot baget, Mr Speaker, sa pou fer ki nou sekirite alimanter lo lanmer pou ganny afekte.

Baie Lazare ti'n komanse. Me mon vwar poudir i pe amelyore. Me nou pa devret les nou lebra tonbe lo ler i konsern

sa topik. Akoz, ki manner nou kapab vwar empower nou zanfan, pou petet pran sa bann metye, kan menm ler pou komans monte, pou li komans *practice*, i napa sa loportinite akoz nou brizan in fini ganny epwize avek bann *expat* ki pe abiz lo nou sistenm.

Kan mon krwar Lanplwa i fer sir ki zot bann sef i annan ase manze pou donn zot, ler i vin anploy zot pou vin travay Sesel.

E mon krwar Lotorite i devret pran sa serye, e get ladan ki manner nou kapab *at least* dekouraz sa bann tel pratik. Pou ki nou brizan i ava *replenish* e byensir nou stok pwason i ava vin an bonn sante ankor. Kot nou ava ganny bokou pwason a lavenir, pou nou protez nou sekirite alimanter.

Mr Speaker, i annan sa zafer *aquaculture* ki pe vin plizanpli popiler e mon ler mon'n ganny sans koz avek enn de dimoun. Avan mon nide mon ti en pe kont, me selman ler anmezir ou'n koze, anmezir ou aprann nou trouve poudir *aquaculture* i kapab sa lot fason ankor kot Sesel i kapab fer bokou larzan e menm garanti nou sekirite alimanter, *in regards to* bann zafer fri demen avek pwason.

Byensir ler nou pou koz sa, bann peser pou demande poudir be ki sa boug pe dir laba dan Lasanble?

Mr Speaker. Nou Kominote Peser artizanal Sesel, mon panse petet sa i mwan nide - pa zour mwan laba deor. Mwan osi mon fer pase mon nide. Akoz bokou dimoun i koz ek mwan. Lo kote peser artizanal. Vreman nou annan bokou, me selman nou napa bokou relev. E akoz mon panse ki petet Lekol Maritim i devret get sa size o serye.

Ki manner nou pou ankouraz nou bann zenn pou antre dan sa domenn lapas - Sirtou artizanal. Ki sa i ava fer ki nou ava kontinyen ganny peser, si nou vreman anvi al dan - petet fer plis pou ki Seselwa i kapab ganny son pwason lo son lasyet toulezour.

Me sa ki sa bann dimoun in fer mon konpran Mr Speaker, se ki konmela lapas artizanal i rezerve pou Seselwa. Me lapas *longline* etranze i kapab antre ladan. E petet zot pe ankouraze pou ki Gouvernman i ava ekout zot. Akoz zot annan enn de bann bon pwen e bann sizesyon ki zot kapab anmenn devan. Ki manner zot kapab ede, petet pou fer ki sa sekter i vin pli profitan. E kot Sesel i kapab anmas bokou reveni.

Mr Speaker, mon tourn ankor en kou lo lagrikiltir Mr Speaker. Ler nou pe koz lo lagrikiltir, i annan bokou keksoz ki mon vwar pe fer, e anmezir mon swiv Minister lagrikiltir dan son bann program.

Mon remarke ki petet, mannyer nou kapab fer sa sekter bouz pli devan parey Onorab William in dir. Mon panse ki, petet sa i mon nide ankor en kou - mon panse ki Minister i devret ouver son laport avek tou bann dimoun. Tou bann dimoun ki annan lentere pou zot devlop sa *field* lagrikiltir.

I annan dimoun in koz avek mwan Mr Speaker ki dir, zot santi zot pwen pa pe ganny ekoute. Petet wi, petet non. Me mwan mon pa ti ava kontan vwar kot dimoun son bann pwen pa pe pase. E kot petet, si i ti ganny ekoute. Menm pa pran tou, me selman nou ti kapab petet pran detrwa nide met ansanm pou nou kapab fer ki sa sekter i bouze.

E la mon pou petet demann Gouvernman pou ekout tou konsey ki annan deor. Napa okenn lopinyon ki parey nou dir, tou lopinyon i en lopinyon. E si nou pran sa bout ki pozitiv ladan, mon krwar nou pou kapab fer en bon pe keksoz

pou nou pei e pou nou dimoun an zeneral.

Mr Speaker, ler mon lo sa size lagrikiltir, avek sa size lapas, i enportan pou nou reflexir byen lo tou sa ki pe arive otour lemond e met Sesel - pran Sesel annou gete tou bann keksoz ki nou kapab eksplere. Pou ki nou ava kapab fer nou pei bouz devan. E ki kot dimoun pa santi i annan lensertitid. Menm ki sa bann sityasyon deor pe kontinyen, pe kontinyen evolye e petet par ler i pe vin efreyan.

Mr Speaker la petet osi en lot pti keksoz ankor ki nou kapab kontribye, pou ki sekirite alimanter pa ganny kopromize dan nou pei.

Ti annan en rafal Mr Speaker kot nou ti tann sa zafer *backyard farming*, kot tou lakour ti ganny ankouraze pou petet plant zot pti legim se zot. Sonny zot pti zannimo se zot. Pou ki zot vin otosifizans pou zot lakour, e menm sa ki anplis nou ti kapab partaze.

Mon konpran ki konmela bokou dimoun pe sorti dan bann rezyon parey Baie Lazare, zot pe al reste dan flat. E sa byensir i koz bann pti konstrent ki petet zot pa pe kapab plante parey zot ti ava anvi.

Me i enportan mon krwar ki tou bann NGO, parey mon'n

dir, nou pa pe koz zis pou Minister. Nou pa pe koz zis pou Gouvernman. Mon krwar osi i enportan ki sekter prive zot kapab antre ladan. Menm bann *NGO*, ki parey mon pe dir bomaten ankor, ki ganny *tax payers money* pou zot anmenn en diferans pozitiv dan lavi Seselwa. Pou ki zot kapab eksperimant sa dosye.

E *why not* reentrodwir sa zafer *backyard farming* avek bann dimoun ki vremen ki zot kapab petet pe vremen antre dan sa sekter e ede. Menm kantmenm parey mon pe dir zot pa vann li lo en baz komersyal. Me selman i ava *still* en keksoz pou zot lakour. I ava en keksoz ki kapab redwir en pe zot depans. E sa i a fer ki zot ava annan en pe plis larzan dan zot pos.

Mr Speaker, parey mon'n dir, mon vremen apresye ki sa Mosyon in pase ozordi dan nou Lasanble. E parey ler mon ti anmenn sa Mosyon, pou nou kree sa Komite Sektoryel. Pou nou kapab get sa size. Byensir dan mon latet ti sa bann keksoz sekirite alimanter, ti en keksoz ki ti pe pre okip mwan.

E parey mon dir mon dan en distrik agrikol, ler ou tann ou bann dimoun pe koz avek ou, zot pe petet zot pe partaz ou nide. Mwan koman zot lavwa

mon ti pe vwar li vremen enportan pou ki mon kapab anmenn en keksoz dan Lasanble. Pou zot kapab vwar poudir mon pe siport zot. E mon pe ekout zot. E nou oule ki keksoz i bouz devan.

Mr Speaker, parey Onorab i sorti dan en distrik lagrikiltir. Mon panse ki i annan ankor mon bann lezot koleg Onorab ki'n ganny koze avek bann fermye. E osi bann peser lo sa topik. Mon krwar zot trouve poudir sa Mosyon, i en Mosyon ki vremen enportan. E mon pou demande pou zot siport mwan.

Pa mwan, siport Onorab William.

An menm tan donn mwan sa sipor an vi ki mon annan mazorite fermye e peser dan mon distrik Baie Lazare, pou ki nou a vremen fer zot lavwa tandé. E zot ava ganny sa lankourazman pou zot kapab fer sir ki nou sekirite alimanter pa zanmen ganny konpromize. *No matter* ki evantyalite i arive dan lemond. Sesel i ava reste lo bon semen e nou dimoun zanmen i ava mor lafen. Menm si deor nou konnen ki pou annan sa bann konstrent *in regards to* sekirite alimanter.

Onorab William mon dir ou mersi e kont lo mwan pou siport ou Mosyon. E fotespere nou tou nou siport sa Mosyon

pou ki nou donn Sesel le meyer. Mr Speaker mon a remerci ou pou sa pti letan. Mersi bokou.

### **MR SPEAKER**

Mersi Onorab. Bon mon ava demann bann manm ki oule entervenir pou lev lanmen silvouple, pou mwan kapab ganny en plan. Byen, nou ava komans avek Onorab Roucou.

### **HON MICHEL ROUCOU**

Mersi Mr Speaker. Bonn apremidi tou mon bann koleg Onorab. Bon apremidi spesyal bann zabitan Mont Fleuri. Mr Speaker mon annan mwan gran privez pou mwan kapab koz lo sa Mosyon. Menm mon pa sorti dan en distrik agrikol, parey Onorab Adelaide in dir. Me selman mon vwar li i enportan akoz sa Mosyon i pe tous nou pei antye.

Mr Speaker, Mosyon ki Onorab William in anmennen, ozordi i fer nou realiz serten keksoz. Ozordi nou Nasyon Seselwa, nou'n vin en nasyon ki vremen prese, *busy*, ki annan nou souvandfwa, nou pa ni menm ganny letan pou arete, pou gete ki pe pase otour nou.

Be la sa Mosyon i pe endik nou poudir sek ki i sa moman pou nou realize poudir, keksoz ki pe arive eksteryer ozordi, i kapab ariv devan nou laport.

Mr Speaker, *COVID* i enn. *Tsunami* osi tou. Ki ti pase ti en lot ankor. Ki bann keksoz ki nou ti vwar dan lepase, nou, nou it get dan nouvel. Ozordi Mr Speaker, ler ou pe fer *visit*. Dizon mon pe pran mon distrik, akoz souvandfwa mon marse dan distrik. Rarman ki ou pou vwar en dimoun ki i pe plant kot li. Ouswa, swa i annan en pti kabann poul, ouswa i a pe sonny en koson. Rarman Mr Speaker. Ki'n arive akoz ki bann dimoun nepli pratik sa kot zot?

Mr Speaker, mwan dan mon letan lanfans, mon ti grandir avek mon granmanman la anler dan leo Rochon. Tou le lannen, mon granmanman ti donn mwan en pti larzan. Ti dir mon al aste en pti koson pou nou sonnyen. Ek kondisyon ki son lavyann i vin pou li, mwan mon ganny mon larzan pou mon al lekol ler i vann.

Be konmela ler ou pas kot bann lakour Mr Speaker, ou nepli vwar. Eski i annan kek Polisi ki'n ganny mete ki ozordi ki pe fer nou pep la deor per pou zot kapab ozordi, swa sonny 2 pti poul, ouswa menm en koson li menm li kot li? Ki sa demen i a benefisye dan son kominote.

Mr Speaker, Onorab Adelaide in byen dir *backyard farming*. Ozordi nou bezwen ankouraz nou pep pou zot antre



dan *backyard farming* Mr Speaker. E souvandfwa, mon annan en zanmi ki dir mwan poudir i annan en landrwa Langleter ki ler ou pase, ou fasil konnen poudir i annan Seselwa ki reste, akoz ou bezwen vwar en ti pye bred mouroum deor. Be nou isi Sesel nou bezwen pran sa serye.

Mr Speaker, mwan dan mon visit dan mon distrik, i annan en msye ki apel Joseph Almaze. En msye ki reste li pli o dan leo nou distrik Mr Speaker, ki ler ou al kot li i for bann keksoz organik. Ou al kot li ou pou vwar li sonny son poul. I plant son gro manze. I sa bann keksoz ki nou, nou bezwen ankouraze la deor.

E mwan mon panse dan sa Mosyon Mr Speaker ki ler nou pou anmenn sa kot Gouvernman, nou bezwen vwar si i annan okenn Polisi la deor ki pe anpese ki fer en dimoun per, si demen li i anvi sonny 2 koson ouswa 2 pti poul. Nou bezwen rode si i annan kek Polisi.

Ouswa si vreman i annan keksoz pou fer avek *Public Health*. Petet avek modernizasyon ki pe arive, nou bezwen, Minister Lagrikiltir, petet travay avek *Public Health*, kot sa i ava ede pou ankouraz bann dimoun ouswa pou edik

zot, pou zot fer *backyard farming* kot zot. Ouswa menm pou sonny en pti zannimo Mr Speaker.

Mr Speaker Onorab Adelaide osi in dir pou dir se ki bokou dimoun, pa zis Baie Lazare, petet dan nenport ki distrik, ki zot pe bouz dan bann *housing estate*. Mon annan en propozisyon la. Akoz ki ler bann *housing estate* i ganny kree, nou war souvandfwa kot bann nouvo *housing estate*, bann nouvo flat i ganny fer, i annan bann bout later o bor.

Akoz ki nou pa vin avek en Polisi kot nou ankouraz enn sa bann zabitan. Pou zot swa plante, ouswa fer serten, ou kapab dir sonny bann zannimo? Pa pre ek flat. Petet en serten zistans. Si nou kapab idantifye sa bann bout later. Sa osi pou ede. Akoz bokou dimoun zot pe reste dan bann *block flat*.

E sa i ava ankouraze demen si okenn keksoz i arive, kot nou konnen poudir isi dan nou pei la, nou annan nou bann Seselwa ki kapab *provide* bann gro manze, bann fri, legim, pou nou bann zabitan. E osi ler ou fer en pti vire Mr Speaker, lo laplipar bann laferm ozordi, ki ou vwar? Ou vwar i annan bokou etranze ki pe travay.

Be *COVID* in montre nou poudir se ki ler nou ti pe antre dan *COVID*, bokou etranze ti kit Sesel pou zot al ek zot fanmir. Pou zot osi pou al gete poudir zot fanmir i an sekirite. Be nou Sesel, i nepli tan pou nou asize. Swa nou asize lo *ghetto*, ouswa nou asize lo lezot landrwa kot nou santi nou dan konfor.

Nou bezwen mazine poudir demen, okenn maladi ki tap Sesel. Nou nou'n pare la antre nou. Nou annan ase *manpower*. Pou nou kapab ede, pou nou antre dan bann plas kot bann etranze i ete. Akoz sa i vremen - i vremen enportan Mr Speaker.

E ozordi la Bondye in beni nou avek en zoli pei. Nou annan delo a labondans. Nou annan delo sale, tousala. Kot nou annan nou bann peser ki al lapas Mr Speaker. E nou, nou bezwen ankouraz nou bann zenn deor. E ler nou pe dir ankouraz nou bann zenn. I pa zis Gouvernman ki devret pe ankouraz nou bann zenn.

Nou, bann paran kot lakour, nou bezwen pe komans asize pe koz ek nou bann zanfan, poudir sa bann travay pou al plante lo laferm, pou al lapas, Mr Speaker, i bann louvraz ki vremen enportan. I anmenn manze pou nou Nasyon, pou nou pep. E nou,

nou bezwen ankouraz nou bann zenn. E nou bann zenn osi ki antre dan bann lekol. Pou zot vin bann fermye demen. Nou bezwen ankouraz zot poudir demen ler zot fini zot letid, i annan landrwa pou zot kapab al travay, pou zot kapab kontinyen devlop sa *skill* dan plante, ouswa lapas Mr Speaker.

Mr Speaker, mwan mon vwar sa Mosyon ki Onorab William in anmennen i vremen, i vremen enportan la. Akoz parey mon'n dir, bann lensertitid ki i annan ant bann lager deor - *Ukraine*. Lager ki kot li laba Mr Speaker. Ki demen ler sa lenpak i kapab ariv isi Sesel, nou konnen poudir nou, nou'n fini pare. E parey Onorab William in dir, ti annan en letid dan lepase kot tou zabitan ti ganny demande pou zot plant en pye friyapen.

Be akoz nou pa al pli lwen ki sa? Nou annan nou kanbar. Nou annan nou mayok. Sa osi tou nou devret ankouraz plis. Nou bann zabitan pou zot fer, Mr Speaker. Zis dan mon pe vir vire dan distrik Mr Speaker, mon pas kot en Madanm. Madanm Peggy Khan, sirpriz mwan Mr Speaker. Mon vwar sa madanm in plant bann zoli plan tomat kot li. Ki mwan menm mwan ler mon ti ale mon ti byen

pase. Mon ti ganny detrwa pti zafer mwan osi pou mwan al avek kot mwan.

Be sa i ankourazan Mr Speaker. Akoz i ti a labondans ler ou pe gete. Ti pe tonbe. Be nou bezwen ankouraz plis bann lakour Mr Speaker, ankor pou zot fer parey. Pou zot plante. Nou annan bann dimoun ki reste dan bann landrwa dan leo, nou bezwen ankouraz zot Mr Speaker.

Parey mon'n dir lo komansman, nou bezwen vwar si i annan bann Polisi ki'n la, pou bokou letan. Ki petet si en dimoun i mazine i dir, zot mon ava sonny en pti poul ouswa en pti koson. Ki demen, swa i pou vwar *Public Health* devan son laport, kot i pou ganny anmennen Ankour. Nou bezwen vwar bann keksoz koumsa.

Mr Speaker, mwan mon pou donn mon sipor sa Mosyon ki Onorab William in anmennen ozordi dan nou Lasanble. Onorab William, kont lo mwan mon osi. Mon pou donn mon sipor sa Mosyon. Mr Speaker, mon dir mersi. Mon swete ki Lepep Seselwa la deor nou kapab pran sa bann parol ki nou pe dir ozordi. Nou tou zwe nou rol, pou nou fer sir poudir demen nou pa vwar pou dir nou pe kontinyen depan lo bann

larestan pei, pou nou ganny bann keksoz ki nou, nou deza annan. Mersi.

### **MR SPEAKER**

Mersi Onorab. Bon mon adres en pti git kestyon letan bann ... Onorab Roucou in pran 10minit. Bann Manm ki'n lev lanmen premye, mon pou donn zot 15 minit. Bann Manm ki'n lev lanmen apre, mon pou *limit* li pou 10 minit. E silvouple, pa donn mwan tro bokou sirpriz a lafen, avek kantite lanmen ki pe leve. Mon ava apel Onorab Loze pou son diskour.

### **HON JOHAN LOZE**

Mersi Mr Speaker. La ou pou al ganny lanmen ki leve menm la Mr Speaker. Akoz la sa enn ki fek leve la, si mon pa koze...

### **MR SPEAKER**

Ou annan 15 minit. Zot pou ganny 10.

### **HON JOHAN LOZE**

I pou napa en *speech* li. Mon pa bezwen 15 minit Mr Speaker. Selman mon pou zis *point out* ki i annan dimoun ki ganny peye zis pou reponn mwan dan sa Lasanble. I napa en *speech* li. I bezwen mwan koze pou li koze sa pti garson. Mr Speaker, (Eskize, Onorab pti garson. Sekreter zeneral.)

Mr Speaker, en laspe ki nou bezwen konsantre lo la avek sa Mosyon se finansman. Si i annan en group dimoun ki pli martirize dan sa pei pou ganny akse avek finans, se nou bann agrikilter. E i pa antyerman zot fot. I annan bann defi enstitisyonnèl ki ganny mete dan zot semen ki azir koman bann kaspèye. Ki pa permet zot posiblerman ganny akse osi fasilman ki bann lezot biznes.

E bann Onorab letan i koze souvan in refer lo lagrikiltir koman en biznes. Refer lo bann agrikilter koman *businessmen*. E lezot biznes par kont i pase, me zot, zot pa pase. E zot, zot annan gro demann de fwa zot. Akoz letan ou kalkil zot bann *inputs* ki zot bezwen. Lekipman ki zot bezwen servi pou teren, ki bezwen ganny reabilite pou fer prodiksyon li menm, zot annan bann difikilte reel.

Be annou get en moman nou bann agrikilter. En kantite zot, zot vreman bon dan zot metye. Zot konn later par ker. Zot konnen kan mannyer pou pran zot lanmen, kares li, fer lanmour ek later. E fer li prodwir sa ki i bezwen prodwi pou nou konsonmen. Me sa ki zot fay lo la par kont, se sa ki nou tou nou pe dir zot ete, bann

*businessmen*. Zot fay lo sa kote biznes. E zot fay lo sa laspe biznes.

E nou a menm dir ki zot napa letan petet. Pou al aprann. Zot napa letan pou al lir en liv. Zot napa letan pou lir. Mwan mon sey lir mon en *minimum*, 6 liv par an. *Minimum*. Me si mon kapab mon fer li 1 par mwan. Ki fer mwan 12 par an. Me en dimoun ki vreman *busy* lo later i napa letan pou fer sa Mr Speaker.

I annan sa *neufangled word* zot kontan servi la 'edifye'. Napa letan pou edifye li. So, kwa ki nou met an plas pou fasilite e pour lev nivo nou bann fermye. Pou fer zot vin lo nivo bann lezot dimoun lo sa kote biznes. Sa enn. Premye.

Be dezyenm, kwa ki kapab ganny fer fas avek nou bann lenstitisyon pou fasilite akse avek kredi pou nou bann dimoun? Nou bann fermye. Nou bann dimoun ki pe fer sa travay later la. Sa prodiksyon manze?

Eski i annan keksoz ki nou, nou kapab fer koman en pei? Ouswa nou bes lanmen, nou tou nou dir be, *that's it*, nou *give up*. E sa i vin en defi sirtou pou bann pti fermye, e pou bann zenn ki pe fek komanse.

E ki ou pe vwar lo kote bann zenn. Zot, zot bann ki pe

pli enterese avek teknolozi. Zot pe pli enterese avek sa bann keksoz ki zot pe aprann lo *YouTube*. E i annan sa zafer ki *LDS* ti obsede avek en letan. Plant pwason. Mon krwar i apel *aquaponics*. E ozordi ou vwar kot en kantite nou bann zenn i enterese avek *aquaponics*.

Kot ou *breed* pwason pou li kree langre pou plant ladan. Selman nou isi, nou pa konsonm tilapya vreman *anymore*. Mon pa konnen ki pou fer avek sa pwason. Selman normalman, tradisyonnelman bann kiltir ki'n perfeksyonn *aquaponics*, zot konsonm sa pwason osi.

So, la petet i ava ed Onorab Adelaide rezourd en pe sa bann problem bann etranze la ki pe raz son brizan. Akoz i annan en kantite zot ki konsonm tilapya. Petet zot ava aste.

Be selman sa bann zenn ki zot, zot inovativ. Zot enterese. Zot devoue. Be zot napa sekirite. Zot napa sekirite pou depoze zot. Zot napa sekirite pou mete zot. Zot napa tou sa bann *hoops* ki labank in met an plas. Bann lenstitisyon finansyel in met an plas. Pou fer zot *jump through*. Zot pa kapab. Zot pa pe *meet* bann kriter.

Mon konnen resaman nou'n koz lo *DBS*. Nou'n koz lo

bann lezot sityasyon otour sa. Me selman, mon krwar ki koman en Lasanble, nou pou bezwen asize fer bann refleksyon serye lo ki nou fer. Pa kapab lannen ale, lannen vini i koumsa.

Mon konnen i annan serten dimoun ki'n al dan sa bann biznes ki zot in ferm en pe laport zot menm. Mon konnen i annan bann fasilite ki'n ganny met a zot dispozisyon dan lepase ki'n ganny mal servi. Be sa i serten. I en leksepsyon. I pa tou. Nou pa kapab pini tou nou bann agrikilter akoz enn ou de in fer for.

So, mwan mon pou vreman enterese annan en partisipasyon aktiv, si nou kapab bouz dan en direksyon kot nou kapab sey sort out sa zafer kredi pou nou bann agrikilter silvouple. Sa i enteres mwan. Mon anvii partisip la dan sa enn. So, si en keksoz i kapab ganny fer kot nou koman bann Lezislater, nou kapab bouz keksoz. Donn en kout pous. Ede rezourd sa. Sa mon pou vreman apresye.

Mr Speaker, en lot pti keksoz mon ti oule mansyonnen ozordi. I paret mwan ki ozordi Onorab William, mon pa konnen si in ganny dispit. Selman ou a krwar in ganny ase avek nou pe

siport son bann Mosyon. Mon krwar in devlop en alerzi avek nou pe siporte, koz an faver, lev lanmen.

E ozordi *shots fired* depi koman in komanse, in politiz son Mosyon li menm. E in kree en sityasyon kot nou trouv nou ladan, la a se moman vizavi son Mosyon. Be selman mwan mon rezim sa tre senp. Ou pa bezwen mon sipor. *So, it's ok.* Mon'n siport ou dan ou bann dernyen ki ou'n anmennen, *that's fine.*

Mr Speaker, i annan en keksoz ki'n ganny dir bomaten la ki'n enteres mwan. Lekonomi pe fer byen. Eksepsyonnelman byen. Nou pe *roar ahead.* Be mon kontan. Madanm Shirin osi PS in eksplik nou bann keksoz dan sa *genre* lo televizyon yer. Mon kontan.

Be ler lekonomi pe fer byen, ki nou fer? Nou pa partaze? Nou pa redistribye? Nou pa donn en pe? Lekonomi pe fer byen, prezan? Nou asize nou tou nou dir lekonomi pe fer byen, e nou pran nou *allowance* palto? *That's it?* Ler lekonomi pe fer byen, en Gouvernman responsab i redistribye. I partaze.

En Gouvernman responsab, i redistribye en pe benefis ki pe antre. En Gouvernman responsab i rapel

poudir li menm li in met *burden* lo sa ki pli feb, e i ankor pe met *burden* lo sa ki pli feb.

En Gouvernman responsab i rapel pou dir sa menm Minis ki ti vin lo ogmant pri bis, li menm li ki ti vin eksplik *allowance* Minis!

En Gouvernman responsab i bezwen kalkile e aksepte *burden* ki logmantasyon pri bis in met lo bann fanmir ki pli feb. Silvouple. Annou redistribye e partaze.

En Gouvernman responsab i bezwen rapel ki zot in fer koman galon in antre STC. Le moman ki galon in antre STC, *subsidy* in ganny tire.

*(Interruption)*

### **HON JOHAN LOZE**

Galon mon'n dir. Ou mon pa konnen ki ou pe dir ou Onorab Larue. Mon'n dir galon.

*(Interruption)*

### **MR SPEAKER**

Silvouple. *Order!*

### **HON JOHAN LOZE**

Mr Speaker. *Subsidy* in ganny tire lo marsandiz. E mansonz ki ti ganny dir Gouvernman pe *subsidize* marsandiz dan STC.

Gro mansonz. *STC* ti *cross subsidize* marsandiz lo son letazer li menm.

E letan zot in tir *subsidy* kot *STC* pou swiv teori Onorab Afif, in kree en leksplozyon dan pri atraver pei. Akoz Onorab Afif zot ava rapel ti toultan dir nou poudir *STC* i kree pri ki tou marsan i kal anba la. E li i ti dir sa i kree en pri lavi o.

Be ler zot in tir tou *subsidy*. Zot in les tou konmisyon lo letazer *STC* eksploze dan pri, tou marsan in fer parey. Zot in swiv. Zot in kal zis anba. Parey zot in toultan dir.

Zot aksyon iresponsab direkteman pour sa leksplozyon dan pri lavi dan sa pei! Prezan ozordi antre par laport deryer avek pri kontrol. Avek en *S.I* ki pou vin *regulate* patati patata sepa kwa. Zot ki'n kree sa problem! Zot in met *burden* lo ledo sa pep!

En Gouvernman responsab, ler lekonomi pe fer byen, i bezwen rekonnet ki in fer!

### **MR SPEAKER**

Onorab. Eski mon kapab *remind* ou pou koz lo Mosyon?

### **HON JOHAN LOZE**

Mosyon in dir poudir lekonomi pe fer byen. Eksepsyonnelman

byen. Mosyon in maltret Lopozisyon ...

### **MR SPEAKER**

Non-non. Mosyon i lo *food security*.

### **HON JOHAN LOZE**

Mosyon in sorti lo *food security* depi loter Mosyon. Mon pe zis swiv. Onorab Adelaide felisitasyon, ou'n koz lo Mosyon.

Mr Speaker, nou bezwen rebalans keksoz dan faver nou pep dan sa pei. Nou pa pou kapab kontinyen parey nou pe ale. Nou pa pe kapab kontinyen avek sa lekonomi la vorasite ki nou annan. Kot sa ki pli bezwen pe ganny mwens. Sa ki pli annan pe ganny *allowance*.

E nou kouver tousala avek en *icing* mansonz ek mesanste, kot nou kontinyelman kontinyen tronp sa pep. Pou fer li krwar sa ki li i pe pas atraver. I pa sa ki li i pe pas atraver.

3 milyon i tro bokou pou vye dimoun ki dan lakaz vye dimoun. Selman en pti 3 milyon i *ok* pou nou al lo zil. 3milyon i tro bokou pou vye dimoun. Nou fek donn 63 milyon *ACCS*. Selman 3milyon nou pa kapab tire dan sa 63 la. Nou bezwen al tir mil Rroupi dan pos sa vyeyar.

Be bon Mr Speaker, mon ava terminen. Mon konnen mon

pe lev migrenn. Mon ava terminen an dizan sa. Lekonomi pe fer byen. Donn sa pep en logmantasyon saler. En logmantasyon saler lo en nivo ki i a kapab viv konfortableman siport son zanfan.

Donn sa pep son trezyenmman saler ki zot, zot drwa li. Donn li. Pou li sa. I pa pou zot sa. Donn li son logmantasyon saler. Onorab Doyace Porice reste ou trankil.

*(Interruption)*

**MR SPEAKER**

Silvouple.

**HON JOHAN LOZE**

Donn sa pep ...

**MR SPEAKER**

Adres mikro silvouple.

**HON JOHAN LOZE**

Donn Seselwa ...

*(Interruption)*

**MR SPEAKER**

En moman, en moman. Silvouple mon pa oule ki Manm i komanse avek adres kanmarad. Sirtou *challenge* zot dan en fason provokasyon. Silvouple fer ou komanter. Mersi Onorab.

**HON JOHAN LOZE**

Mersi Mr Speaker. Mon kontan ou'n rekonnet ki zot pe *challenge* mwan avek provokasyon. Mersi.

Mr Speaker *long service allowance* nou bann ners ki nou kontan. Nou bann *teachers* ki nou cherie. Nou bann polisye ki gard lord ek lape dan sa bann kondisyon difisil. Nou bann solda ki nou'n met lo semen.

*Long service allowance*. Donnen. Pou zot sa, pa pou LDS. Donn zot sa ki apel pou zot! Rann. Pa ti donn zot pou fer palto sa? *Long service allowance*, donn Seselwa son *long service allowance*.

Mr Speaker, ou vwar zot pe *challenge* mon ek provokasyon. Onorab Bastienne.

Mr Speaker, le moman ki nou'n *settle* det ki nou annan anver sa pep, la prezan nou ava kapab vini dir lekonomi pe fer byen. Be ou pa kapab annan ou en lekonomi ki performan, be pe perform zis pou serten. I pa pe perform pou la mazorite.

Ou pa kapab annan en lekonomi performan apre ou dir R10 goute par tet zanfan dan lekol. Be lekel ki krwar ou kapab nouri en zanfan lo en goute R10 la. I annan okenn nou la ki sitan fou pou krwar sa? Be ou pa kapab annan en



lekonomi performan apre ou *limit*. Ou dir goute en zanfan en lavalè goute pou en zanfan i R10!

Selman *still* nou oule lekonomi performan nou menm, apre nou oule donn en zanfan zis R10 goute. Nou oule lekonomi performan nou menm, selman nou bann vyeyar nou pa pou *héberge* zot dan sa dinyite ki zot bezwen!

Selman lekonomi performan. Bon. Sa lekonomi performan la. En fason ou en lot, i pou bezwen *cater* pou sa pep ki apel Seselwa. Zot pou rann sa pep tou sa ki pou li *post-haste*. E la mon pa pe koz zot ni menm 25 la. Zot pou donn sa pep sa ki pou li. Mwan Johan Loze ki pe dir zot. *Sooner or later* zot pou donner, mon'n dir zot donner! Mersi Mr Speaker.

**(APPLAUSE)**

**MR SPEAKER**

Mersi Onorab. Mon ava donn laparol Onorab Esparon.

**HON REGINA ESEPARON**

Mersi Mr Speaker. Bonn apremidi tou dimoun a lekout. Mr Speaker mon pou tenir lo Mosyon ki Onorab William in anmennen.

Mr Speaker, sekirite alimenter i toultan en size enportan, ki nenport ki pei i bezwen toultan fer en revi lo la. E toultan revwar son stratezi ki mannyer i pou ed bann prodikter.

Parske i toultan annan bann eleman ki kapab destabiliz sa sekirite alimenter en pei. Tel ki parey lager, lafamin. E la parey nou'n vwar pandemi *KOVID* 19, sanzman klima, ki kree sa lenpak negativ ki kree sa lenpak negativ lo sekirite alimenter.

*E Dieu* mersi koman en pei Sesel. Pti-a-pti. E nou vwar lemonn osi pe rebran. E nou priye ki en lot vag pa debarke pou afekte progre ki pei pe deza fer.

Tout an prenon kont, sa ki pe pase lo nivo mondyal parey Mosyon pe demande. Mr Speaker, mon swe se ki atraver sa Mosyon, bann deba i pou en pozitiv a ganny fer resorti kot sa Komite ki fek ganny formen a ganny bann pwen depar pou demar son travay.

Mr Speaker ozordi sa bann eleman ki afekte sekirite alimenter parey nou'n mansyonnen - parey mon'n fer resorti. I pa toultan bann eleman ki zonm i annan kontrol lo la. Me dan la pratik, nou toultan bezwen pe met nou pare

avangard, pou nenport ki evantyalite, ki kapab destabiliz sekirite alimanter.

Nou sanse ki ziska prezan koman en pei nou napa lafamin. Me malgre parfwa lasesres i afekte prodiksyon. Me fermye i kapab redrese. Mr Speaker i annan en lot eleman ki afekte bann fermye ek bann dimoun dan lagrikiltir, sa se sa konpetisyon prodiksyon lokal e bann prodiksyon enporte.

Kot prodiksyon lokal i ankor o e fermye i toultan vwar zot an konpetisyon avek sa ki pe enporte. Sa i en keksoz ki Gouvernman i bezwen revwar lo kalite lasistans ek sipor ki fermye i gannyen.

Zensek: Bann zensek parey mous fri. *White fly*, ki fermye i kontinyen ganny afekte avek. Sa lager ant sa planter ek sa ki pa plante ki rekolte. Lalwa i bezwen vin pli sever, pou ki sa enn ki pe trimouse dan gro ker soley a rekolte rezilta son travay. E sa benefis i ava al dan son pos, olye fini dan en *ghetto* drog par la.

Mr Speaker, en eleman ki toultan monte ler nou koz lo sekirite alimanter, se ki mannyer nou promot nou gro manze. Nou *roots* parey nou dir. Ki mannyer nou pas la relev ek nou zenerasyon. Sa zenerasyon *spaghetti*, *pasta*, *lasagne* la,

nou bezwen regarde ki mannyer nou kapab promot servi gro manze e lezot keksoz dan lanatir dan nou lakwizin lokal.

Mr Speaker, mon rapel lontan ti annan sa kanpany ki Minister Lasante ti fer, manz 5 porsyon, lo televizyon ki nou nepli vwar konmela. Be mwan mon sizere ki olye manz 5 porsyon, nou devret pe fer kanpany - Minister Lasante pe devret fer en kanpany, manz 5 porsyon lokal.

Sa ti ava ede pou nou zenerasyon konmans abitye avek, sa ponm, sa zanmalak, sa serimolya, sa zanblon ki'n disparet. Ki ozordi bann fri ki preski nou pa vwar konmela. Promot sa bann keksoz lokal. Annou pa esper zis festival kreol, pou nou promot nou katkat bannann. Nou kari koko latet karang.

Annou fer li pli souvan, tou dilon lannen, pou ki sa zenerasyon ki pe monte ava abitye avek nou *roots*. Ler i annan demann, sa i pou osi ed fermye pou prodwir plis e nou ava pe koup lo lenportasyon. Nou ava pe konsonm plis lo bann prodiksyon lokal.

Mr Speaker, lo kote lanmer. Mon kontan ler mon tann koz lo lapes soutenab. E la mon fyer pou mon dir ki lasosyasyon peser Glacis in

adopte lapes soutenab koman enn son moto.

E petet nou'n devret pas plis ledikasyon pou nou bann fermye avek nou bann peser. Ki ler i annan keksoz annabondans, pa bezwen zete. Partaze. Ler karang i tonbe, annou pa zis pran an voras apre nou anter sa bann ki nou pa kapab servi.

Be nou kapab servi li. Pas avek bann lenstitisyon parey Ste Elizabeth. Parey letan i tro bokou. Olye ki nou atrap kantite. Atrap sa ki nou pou kapab konsonmen. Pa akoz i a labondans ki nou atrap an kantite, ki apre nou pa servi, kot nou vwar sa gaspiyaz.

E Mr Speaker, mon pou dakor letan Onorab Adelaide i dir ki Gouvernman i bezwen met en kontrol ek bann etranze, ki detri nou brizan. Sa laspe ledikasyon i enportan. Kot nou bezwen edik nou pep dan sa domenn konservasyon. E sa i bezwen ganny fer resorti. Sa Komite ki fek ganny formen a ganny bann pwen ...

Mr Speaker, nou rekonnet ki Gouvernman pe fer bokou pou ed nou bann fermye e peser. Be sa ki demande se ki tanzantan i annan sa konsiltasyon ek sa 2 sekter, pou ki zot bann problem ava ganny ekoute. E ansanm zot

ava rod solisyon. Mr Speaker avek sa de mo. Mon pou donn sipor sa Mosyon.

### **MR SPEAKER**

Mersi Onorab. Mon ava pas laparol Onorab John Hoareau. Mr Speaker, ler nou pe get sa Mosyon ki Onorab William in anmennen, i koz lo bann sityasyon zeopolitik e pandemik, e bann reperkisyon global.

Savedir ler nou pe analiz sa Mosyon. I neser ki nou kree en etadelye, pou vwar en pti pe ki sa bann konfli politik ki pe annan lenpak lo nou pei.

Mr Speaker, ozordi zour lager lerop pe fer ki Larisi koman sa pei, si oule, ki'n agres *Ukraine*, li i pe vann son petrol en pe pli ser. I pe benefisyé. I deza annan *income* li. Lanmerik pe vann son zarm. Li osi i deza annan *income*. E i annan lezot keksoz. *Ukraine* sa pti pei ki'n ganny agrese, li i pe soufer en destriksyon total. E ler nou get *Ukraine*, li i en pei ki dominan - koman ou kapab dir sa - i ganny dominen par bann sekter lagrikiltir.

Alors, son prodiksyon *sunflower* avek son prodiksyon dible, pou fer delwil ek lafarin in tonbe. E sa in met en presyon lo tou bann pei, ki enport sa bann komodite. E ki depan lo la. I fer

ki pri in ogmante e tous plafon. Me pa sa *verbal diarrhoea* ki sa Onorab avan mwan in koze, in dir nou. Se pa Prezidan Ramkalawan ki pe fer monte pri. Se pa *STC* ki pe zis volonterman fer monte pri. I annan en problem mondyal. E nou tou deor la nou konnen. Alors sa bann politik bonmarse pa marse sa!

Rezilta mankman petrol lo marse mondyal, pe fer ki bokou pei lerop ki depann lo Larisi osi, pe bezwen pey ser pou sa bann prodwi. E lemond antye in predir ki pe antre dan en resesyon mondyal. Sa se Prezidan World Bank ki'n fer resorti tou resaman.

Nou koman en pei ki fortman enport preski tou nou manze, nou lenerzi e sa bann *price hike* pa'n eparnye nou. Alors nou osi nou bezwen pey bann keksoz enormeman ser. Menm sa, avek sa lensertitid ki i annan dan lemond aktyel, nou pe menm mazin si sa resesyon ki'n ganny predir pou komanse lannen prosen. Ki kapab diri ziska menm 2an.

Nou pe menm kalkile si nou lendistri touris pou osi performan dan bann lannen ki pe vini. Akoz nou konnen poudir ler i annan en resesyon mondyal, sa osi i afekte pouvwar pou bann dimoun,

bann etranze, pran en vol pou vin pas vakans dan nou pei.

Mr Speaker, sekirite alimanter alors i en nesesite reel. Sanfwa, nou pou vwar nou standar lavi i desann. E tou sa bann travay ki nou'n fer pandan sa 2an, e tou nou bann aki osi i kapab ganny enteronpe. I kapab ganny redwir. I kapab ganny presyon lo la.

Mr Speaker, sekirite alimanter, e devlopman soutenab in vin en *buzzword* otour lemond ozordi. Akoz se pa zis nou ki bezwen reveye avek sa realite. Me tou pei lemond i bezwen fer fas avek sa bann kalite fleo.

Alor i nesese ki nou revwar nou stratezi. Nou stratezi petet ler ti ganny fer. Ti adapte a moman letan ki nou ti pe viv ladan. Be la i annan en nesesite reel pou nou revwar nou stratezi. E se sa ki kree sa merit dan Mosyon Onorab William. Se pou revwar ki fason nou kapab fer pou fer ki nou pa antre dan en sityasyon, kot sa bann fleo mondyal i enpakte nou tro bokou. Apre tou, parey sanson i dir, *a hungry man is an angry man*. Akoz si nou pa fer atansyon, petet nou dimoun pou *angry*. Alors i nesese pou nou regete.

Mr Speaker, konsep sekirite alimanter pa devret ganny gete an izolasyon avek devlopman *human capital*. Devlopman resours imen. Nou bezwen revwar nou stratezi pou nou devlop bann nouvo zenerasyon agrikilter e peser. Sa nouvo zenerasyon i bezwen vin pionye sa revolisyon dan lagrikiltir. Nou devret tret sa size serye aköz nou nouvo zenerasyon agrikilter, i devret ganny ankadre dan en fason kot prodiksyon lagrikiltir, i ganny fer dan en fason *intensive* isi Sesel.

Akoz nou napa lespas. E lespas ki nou annan i annan en gran konpetisyon avek lezot sektè;- parey lakaz, parey devlopman. Lezot kalite devlopman ki pe pase. Alor Mr Speaker, bann size parey *verticulture* kot dimoun i kapab plant vertikalman.

I devret bann keksoz ki nou etidye o pli o profon e nou *promote* dan lagrikiltir. *Hydroponics system*, kot nou kapab annan en *system* kot nou plan i ganny nouri par bann kemikal artifisyel. Kot zisteman i kontrole dan en fason ki i pran zis lakantite ki i bezwen. E son prodiksyon i a *maximum*.

Mr Speaker, *farmers* osi i bezwen bann *businessmen*. E

sa nou bezwen rekonnèt. Parske i nepli tan, ozordi nou dir en dimoun pran en pyos, ale fer defonse mayok. Esper 6mwan avan ki i kapab rekolte sa mayok e vann.

Alor, tousala i bezwen ganny ankadre koman en stratezi, en Polisi nasyonal ki pou fer ki nou bann dimoun, nou sa nouvo zenerasyon, ki pou anmenn sa revolisyon agrikiltirel, i pou vin sa zenerasyon ki pou anmenn nou pli devan.

Mr Speaker, i annan en keksoz ki mon pou akseptè ki lo kote Lopozisyon zot in fer resorti ozordi, se akse avek larzan par bann labank, pou sa bann fermye kapab pran bann *loan* a bann to lenterè favorab. Aköz ozordi zour en fermye pa pou kapab pran en *loan* a 18poursan pou li met manze lo latab lezot dimoun.

Sa fodre i bokou ganny redwir, e fodre ki Gouvernman i annan bann fason kot i kapab ed bann labank. Dizon depandan lo kantite *tax* ki zot peye. Petet si zot annan bann prodwi pou lagrikiltir, Alors zot *tax* ki zot peye lo zot profi, sa i desann e zot pas sa profi, petet avek sa bann agrikilter. Aköz en to a 2 ou 3poursan se sa to favorab pou kapab lev nou

*system* lagrikiltir e nou *system* lapés isi Sesel.

Mr Speaker, parey mon'n dir. I en sekter kot i annan bokou risk. E i en sekter ki souvandfwa napa bokou prodwir banker ki al dan sa direksyon. Akoz zisteman sa kantite risk ki avek. Alor la mon pe lans en pledwari ek Gouvernman pou revwar en pe stratezi dan sa laliny pou kapab ed sa bann ferme, ganny pli bon akse avek loan ki pou zot kapab fer prodiksyon.

Mr Speaker, avek sa mon pou sipòrt sa Mosyon ki Onorab William in anmennen. Akoz mon krwar i pe al dan bon direksyon. E i pe anmenn sa ki nou apel en *wakeup call* pou nou revwar en pti kou sa stratezi. E re anmenn en revolisyon dan lagrikiltir e dan lapés. Ki nou bann zenn zenerasyon i a vwar sa koman en metye atiran. E nou tou koman en pep nou ava epanouir. Nou ava vwar pou dir nou nivo sekirite alimanter i ava remonte. Mersi.

### **MR SPEAKER**

Mersi Onorab. Bon mon'n ariv lo *second round*. Alors, bann Manm ki pou koze la. Mon ava donn zot 10 minit. Onorab Larue.

### **HON FLORY LARUE**

Mersi Mr Speaker. Bonn apremidi Mr Speaker. Bon apremidi tou dimoun dan lakour. Mr Speaker, prodiksyon manze i labaz sekirite manze. Nou vwar definisyon pou *food security* ki'n ganny deklare par FAO ki lir koumsa e mon pou lir li an Angle.

*“Food security is a situation that exists when all people at all times, have physical, social and economic access, to sufficient safe and nutritious food that meets their dietary needs and food preferences for an active and healthy life”.*

Nou pe ganny dir ki dimoun i bezwen ganny akse avek manze. E la nou pe demande ki nou revwar stratezi. Ki nou kapab donn plis sa garanti, akse avek nou manze lokal isi Sesel par nou pei menm. Nou reste soutenab e nou garanti nou popilasyon en serten nivo sekirite pou ganny akse avek manze.

Manze i ganny prodwir par nou bann ferme. E nou bann peser. Nou'n ganny dir par bann dimoun ki'n koz avan, ki i vre ki nou annan en diferan persepsyon isi dan nou popilasyon. Ki nou met lo sa bann kalite travay. Nou pa donn li ase valer, e nou pa donn

sa bann dimoun ki annan konesans dan sa travay, menm kredibilite ki nou donn en Dokter, ouswa en Avoka.

Me par kont sa bann dimoun dan sa sekter se zot ki soutenir nou, pou nou kapab leve toulezour. Pou nou kapab fer nou travay. Akoz se zot ki prodwir nou manze.

Mr Speaker, nou'n ganny dir ki nou annan serten defi, ki vin avek sa garanti ki nou oule donner. Sirtou lo kote grander later ki nou annan disponib pou fer sa bann devlopman. Sa i enn bann keksoz ki nou koman sa nouvo Gouvernman in vin an plas. Nou bezwen revwar stratezi ki mannyer later lagrikiltir i ganny devlope. Sa bann keksoz i kapab ganny fer atraver *training* bann dimoun ki annan akse avek sa bann later, lo ki mannyer zot kapab promot ouswa fer diferan kalite prodiksyon, pou maksimiz sa later ki zot annan.

Enn lot pwèn ki nou'n tande, se finansman. Letan nou pe koz finansman, nou pa koz lo zis akse avek sa finans. Nou pa koz zis avek sa fon kote i pou sorti. E pa zis lo kote bann to favorab. Nou bezwen koz lo finansman spesyalize.

En legzanp ki mon kapab donner letan mon pe sey eksplik sa. Se en *system* labank

ki egziste an Frans ki apel Kredi Agrikol. Sa labank ki ti ganny formen an lannen 1900, ti en labank ki ti ganny formen spesifikman par en group dimoun, sa letan ti kontribye larzan ansanm, pou zot kapab devlop sekter lagrikiltir pou garanti egzakteman ki nou pe demande, prodiksyon manze.

Ant lannen 1900 e 1930, i ti grandi e sa group dimoun ti ganny rekonnet koman en labank. E preske tou bann kominote, bann komin ti annan en reprezantan ki ti kapab akse sa finansman avek.

Ozordi Labank Kredi Agrikol i en labank ki ganny soutenir e ganny *run* par dimoun spesyalize dan sa sekter. Ou pou vwar souvan si en dimoun i antre dan sa labank pou akse finans, son bankye, sa dimoun ki pou vwar li, pou donn li larzan e pou get son dosye, il zeneralman en dimoun ki'n spesyalize, ki'n fer letid dan *field* lagrikiltir spesifik.

I fer ki, nou tou nou konnen ki en ferme, ouswa en peser, ouswa en dimoun ki pe devlop lo kote prodiksyon, son ranman i pa pou direk e toudswit, e alors sa dimoun ki donn li finansman, i pa parey en menm dimoun ki pou donn ou finansman pou en loto, pou

en lakaz, ouswa pou mont en biznes.

Akoz ou *bottom line*, letan ou pe get ou rannman, ou pa pou parey. E sa labank i en labank ki'n akonpany en dimoun pandan plizyer lannen. I pa espekte li fer en profi ozordi pou mwan prosen. I akonpany li lo en plan, lo en vizyon. E avek en kad vreman spesifik.

Nou osi vwar ki son fason donn *loan* i pa ditou parey nou bann labank ki nou vwar isi. Kot si ou aste en loto ou vin avek son valer loto, i donn ou zis pou sa keksoz. I pare pou donn ou plis ki sa ki ou kapab kontribye, akoz i regard sa prodwi final ki ou kapab met lo *market*.

Par egzanp si en dimoun i pe fer en prodiksyon pwason, parey mete i pe *repackage* en prodwi pwason, i pou ganny ase finansman pou li fer en faktori ki lo en nivo enternasyonal. Ki sa prodwi ki ganny sorti dan sa faktori, i annan li en nivo ki kapab vann direktman lo en *market*.

Ki demen si sa dimoun i *fail* dan son biznes, i revann sa faktori, ou vwar ou avek en faktori ki annan en prodwi enternasyonal toudswit. Ki i fer ki sa sekter ki ganny sa finansman i pe kapab prodwir

bann prodwi ki en serten nivo garanti.

Sa i fer monte standar prodwi dan sa sekter. *Be it*, lagrikiltir, ouswa lo kote lapes. E sa kalite fason regard finansman, sa i en keksoz ki nou bezwen seryezman konsidere, si nou anvi donn nou agrikiltir ek nou bann peser en lipye ekstra pou zot kapab fer biznes lo lasenn enternasyonal dan larezyon, e menm lo kote mondyal.

Akoz se enn sa bann keksoz ki pe anpes zot pou devlop sa lot kote, si ou anvi al sa zistans. La nou pe regard direktman isi lokalman ki mannyer nou kapab garanti en serten nivo sekirite nasyonal soutenab. Me solman son reperkisyon si nou pran bann bon desizyon lo kredi, i kapab annan en lefe ki nou bann prodikter zot sorti lo sa nivo zis en dimoun avek en pyos ek en bouret. Me selman in vin en vre *businessman* ki nou kapab respe li. Akoz i pou annan en kantite fasilite pou li kapab fer larzan.

Nou bezwen osi dan nou stratezi reget tou bann dimoun ki akonpany bann dimoun dan sa sekter. Parey lasirans. Souvan nou'n tande ferme in dir ou koumsa letan lapli i tonbe i annan *flooding*, i pa



kapab ganny akse avek lasirans pou kapab kouver son *loss*.

So, tousala nou bezwen regarde lo ki kapasite. Ki mannyer fodre zot groupe, pou zot kapab annan sa garanti ki kapab soutenir zot, letan en dezas i arive. Ouswa letan en *failure* i arive dan lanatir. Letan nou pe koz lo sa. En keksoz ki osi en febles. E nou bezwen fer bann stratezi konkret pou nou ankouraze, se bann groupman. Nou vwar ki nou annan en *weakness* isi kot dimoun pa oule asosye.

E letan mon pe redonn legzanp sa Labank Kredi Agrikol, son lafors ti komans par lefe ki dimoun ti asosye. Bann dimoun ki ti dan menm sekter ti asosye e zot ti kapab *trust* kanmarad. E se sa lyen ki ti kapab fer ki zot ti kapab grandi ansanm.

I enn bann sekter ki si dimoun pa groupe pou zot fer bann lasosyasyon, zot pou toultan annan en gran *weakness*. Akoz Gouvernman son larzan ki i annan i pa san fon. I ava soutenir. I a ede. I a gide. Me bann fon i pa toultan sorti kot Gouvernman pou kapab fer ki sa sekter li menm li i vin en sikse.

En lot keksoz ki nou kapab fer Mr Speaker letan nou pe get nou stratezi, se

ankouraze ki dimoun i pran en *pride* ouswa i fyer ki zot pe manz lokal. E nou pe konsonm en keksoz ki pou Sesel. Ki'n ganny rekolte isi.

Nou vwar ki nou annan poul ki sorti Brazil Mr Speaker. Brazil i en pei ki 11mil 736 kilomet zistans avek nou. Me par kont nou plifere aste en poul sorti Brazil ki en poul lokal.

Wi i annan sa kou. Me selman nou tou koman en kominote, nou bezwen sey sanz nou *mindset* e regarde ki mannyer nou kapab soutnir prodiksyon. Par si nou tou nou garanti pou nou aste nou prodwi ki fer lokalman. Sa osi i en lot fason ki tou dimoun i kapab kontribye dan sa stratezi, pou nou konsonm lokal.

En lot stratezi ki nou kapab regarde lo kote Gouvernman. Bann Lazans ki travay direkteman dan lanvironnman ki fer bann lanbelisman. Ki nou kapab reget nou stratezi plant. Bann keksoz dan lanatir.

Par egzanp, dan lavil, dan kominote, dan bann lekol. Se pou plant bann plant lokal. Parey zoranz, santol, ponm lokal, zanmalak. Bann pye ki pous ase fasilman. Me selman ki donn en rannman. E sa osi i

ava kapab sanz en pe nou fason ki nou regard nou prodwi lokal. Lo nivo ...

**MR SPEAKER**

10 minit Onorab.

**HON FLORY LARUE**

Mersi Mr Speaker. Nou bezwen osi dan sa kote nou plan ki otour nou lo kote kominoter, regarde ki mannyer dimoun ki annan en pye mang kot li. Pa bezwen fye lo sa pti menn ki vin kas son pye, pou tir tou son mang lo la. Me ki mannyer nou kapab join bann *supply chain* pou dimoun ki fer *jam, juice*. Bann keksoz koumsa.

Letan mon pe konklir Mr Speaker, mon ti ava kontan ki la ki nou serye, ki nou dan sa Lasanble, nou'n deside pou nou fer en Komite pou regard sa bann size, me nou le dir pep Seselwa gard antet ki parti *US* pa oule form par sa Komite pou asiste nou, pou reget sa bann stratezi pou nou bouz devan pou soutenabilite en serten nivo sekirite manze, lo nivo nasyonal.

Ki dimoun i gard sa an tet ki sa se pe ganny fer lo kote *LDS* atraver en Komite ki personn son Manm pa pou ganny peye. E mwan mon en Manm lo sa Komite.

Mon ti a kontan dir Onorab William ki mwan mon pou siport son Mosyon e atraver travay Komite, mon ti ava kontan remerisi li ki'n anmenn sa Mosyon. Pou donn nou en komansman. Pou nou mazin lo bann problem ki pei i kapab pe rankontre, anmezir ki nou pas atraver tou sa ki pe pase dan lemonn. Mersi Mr Speaker.

**MR SPEAKER**

Mersi Onorab. Mon krwar nou kapab pran en poz la. E nou a rebran deba 4er.

***(BREAK)***

**MR SPEAKER**

Bon, Onorab Aglae, ou ladres.

**HON EGBERT AGLAE**

Mersi Mr Speaker. Bonn apremidi tou ki ale kout. Mr Speaker size ki devan nou, pe koz lo sekirite alimanter. Fas a bann sok mondyal mon kapab dir ki kapab leve detanzaot. E i pa fer premye fwa ki lemonn i pas dan bann diferan sok. Ki swa lager, ki swa bann kalamite natirel. Ki fer ki i annan lenteripsyon dan marse mondyal. E lenteripsyon dan bann *supply chain*. Sa i en fakter ki egziste, e i pou touzour la avek bann diferan levennman.

Me pou sa Mr Speaker. Mon krwar sa ki enportan, e ler mon'n ekout bann diferan entervansyon lo Mosyon, nou bezwen konpran en pti pe pli *in-depth* lo bann fakter ki ede e kontribye, pou kapab asir ki nou annan en nivo sekirite alimanter ki akseptab.

E osi nou bezwen osi get sa de *coin*. De fas sa de *coin*. I annan sa konponan, mon krwar lokal, ki i annan son lenportans. E osi i annan sa konponan global enternasyonal, an vi ki Sesel i pa kapab prodwir tou son manze ki i bezwen pou sekirite son pep. Sa i enn bann fe.

E Mr Speaker, *FAO* i annan en prensip ki'n partaz avek lemond global lo 4 dimansyon kot i konsern sekirite alimanter. Enn se, pou annan *availability* bann prodiksyon manze. Ki swa lokal ouswa enternasyonal. Ki ava kapab antre dan sa *supply chain of demands* ki egziste, pou ariv kot bann konsonmater ki bezwen.

Dezyenm se, aksesibilite. Sa i fer referans avek sa prodwi - sa manze ki ariv kot sa konsonmater. E osi mwayen pou li aste. Akoz ou kapab annan otan manze ki ou'n stoke, me si ou napa larzan pou

aste sa komodite, byensir ou pa pou manze.

Trwazyenm, se sa abilite. E osi sa abilite pou ou konsonm en prodwi ki lo en baz sen e sof. Sa i vedir ki dan en fason i pou pli bon pou ou lasante e ki i adekwat. Kot ou ganny ase pou ou manze. Pou ou kapab reste an bonn sante. E pou ou viv en lavi prodiktiv.

E dernyen se i koz lo sa stabilite ek soutenabilite ki anglob lo lafason ki bann pei i devlop sa abilite pou zot kapab soutenir zot pep atraver sa *food chain supply*. E letan osi ki ou donnen pou ou kapab fer fas avek letan ek mezir pou ou donnen, pou ou kapab fer fas avek okenn sok e evantyalite.

Tousala i en mayon ki bezwen mars ansanm ki garanti, sekirite alimanter. E dan lepase Mr Speaker, Gouvernman ki ti la oparavan. Bokou diskisyon in ganny fer dan sa laliny. Bokou koze in ganny koze. E ler nou'n pas dan diferan evantyalite sok, nou'n kapab vwar ki nou kapab soutenir en nivo sekirite alimanter. Menm si i pa ti lo sa nivo ki nou ti pou aksepte ki pep i mor lafen.

E enn bann pwen enportan ki mon krwar nou'n fer byen ladan, se ki proteksyon nou lanvironnman. E kot tou sa

ki nou konsonmen, byensir i sorti dan en lanvironnman, si nou pe manz pwason, i dan en lanvironnman. Si nou pe manz legim fri, i dan e n lanvironnman. E mon kapab dir 99poursan labaz manze i sorti dan nou lanvironnman. Ki swa lo later, ki swa dan lanmer.

E pou sa kapab ganny kontinyen, ou bezwen annan en Polisi ki gid pou annan sa proteksyon, sa lanvironnman pou ou kapab annan sa bann eleman ki kree labaz lo manze.

Bokou souvandfwa in ganny koz lo la sirtou kot i konsern nou lanmer. Nou lanmer e sa nou koz lo *blue economy*, ki malgre letan ti pe lanse, Lopozisyon sa letan, zot ti pe kritike. Zot ti riye. E menm i annan zot pa ti krwar dan son prensip.

La Vandredi nou pe ganny envite lo *aquaculture*. Ki annan menm ozordi ki Minis pa ti krwar dan sa kalite prensip. Me ozordi nou vwar poudir se zot menm ki pe promot sa travay ki nou, nou ti komanse. E kot i konsern sa, Mr Speaker, sirtou kot i konsern nou stok pwason. Si nou pe koz lo sekirite alimanter dan *blue economy*. I enkli proteksyon sa stok pwason.

Menm si nou pe ouver nou laport avek bann diferan

investiser pou fer sa leksplwatasyon, nou pou bezwen annan en balans. Pou kapab gard en stok rezonnab ki si demen nou konnen nou pa pe kapab sot lo lot kote porsyon lemonn, nou konnen nou ava annan ase pwason pou kapab soutenir.

Lot kote i konsern nou later. Nou later se bann agrikilter, ki bezwen pe kiltive pou kapab met manze, legim ouswa fri. E ler mwan mon'n get dan Mosyon, mon pa'n vwar personn pe vin devan poudir. Be, kot i konsern bann polisi ki bezwen ganny revwar. Se pou garanti fas a devlopman demann ki annan ozordi. E rapidite ki devlopman i pe demande, nou osi bezwen gard en stok nou later pou kapab garanti kiltivasyon. Garanti ki nou bann agrikilter i bezwen kontinyen prodwi manze.

San sa, nou pou napa legim, nou pou napa fri, lo sa nivo ki nou ti ava swete. E osi nou bezwen mazin nou bann zil. Ozordi, e mon pou dir ki yer, ti en size kontrovansyon. Ti en size kontroversyal. Ti en size kritik. Ozordi nou bann zil in vin enn bann zouti ki mon vwar bokou pe mazin pe al ver lo la. E zot pe regard en pe.

E mon vwar bann nouvo keksoz ki ti deza egziste, ki pe

repran lelan. Menm si ti ganny kritike dan lepase. Me pou mwan pa sa ki enportan. Pou mwan se resours ki disponib a sa pei, i merit ganny servi dan en fason ki pou kapab benefisyè pep an zeneral. Pa zis en pti group endividi, ki pou fer larises lo la, me pou Seselwa.

Me la ler mon pe koz lo la Mr Speaker, bann diskisyon ki ti ganny fer lo devlopman nou bann zil. Ki ti ganny dir pou annan serten eksklizivite ladan, kot bann ki anvi investi. Sirtou Seselwa pou kapab al devlope al plante, e menm bann lesey ki'n ganny met devan pou al plant bann zengredyen.

Ti mansyon nou parey zot kapab fer lay, zenzanm. Menm ponmdeter, i annan Seselwa ki pare pou investi, me loportinite akse lo sa zil i ankor reste en problem. E sa i en bann *challenge* ki mon pou met dan lanmen LDS pou zot atraver zot Komite Sektoryel, ki zot in dir nou, nou pa pe partisip lo la, nou, nou'n annan nou rezon, *ok?*

Enn bann pwen mon krwar ki enportan ozordi se ki ler 2020 ti arive, zot ti pran zerans gouvènan. E nou ler nou, nou ti koze dan sa Lasanble, nou ti pe met nou bann pwen devan. Zot ti dir zot ki pou dir ki pou fer. Zot ki dir

ki pou fer. Atraver ou Mr Speaker, Onorab Arissol ti dir sa tre klerman. Onorab Sandy Arissol.

E nou, nou devwar koman Manm Parlman se, pou *oversight* lo sa ki Gouvènan i annan pou fer. E sak fwa ki nou'n kestyonn zot. Zot in rod tou fason pou kasyet lenformasyon ouswa pou ridikiliz nou lo sa kote. Lasanble Nasyonal li menm li Mr Speaker, i Lasanble i sipoze endepandan. I pa sipoze en lekstansyon Legzekitiv. Ki fer ki ler ou pe kree en Komite, i vedir ki Gouvènan, sa ki zot in met la ozordi, i annan en problem dan son program pou egzekisyon. Pou mwan mon pe get li koumsa. E se Manm Lasanble ki bezwen ale al antre pou al dir zot ki pou fer. I pa sa nou rol.

So, Mr Speaker, se sa rezervasyon ki nou nou'n garde. E nou'n dir si nou vwar keksoz i amelyore, nou ava akord nou kontribisyon dan sa laliny.

Mr Speaker, ou'n dir mwan 10 minit, mon pou tous en size mon krwar ki enportan. Se lenportasyon. Nou depan lo lenportasyon kot i konsern manze. Tan ki nou pa kapab prodwi bann *basic*, parey diri, ponmdeter, delwil, bann *basic ingredient* ki nou bezwen, pou

nou kapab kree en bon alimantasyon, nou pou bezwen pe kontinyen enporte. I vre nou napa ase lespas pou fer bann *mass production*, kot i konsern bann gran plantasyon. E nou pou bezwen lenportasyon.

Ki fer ki Gouvernman i bezwen mazin e reflesir lo direksyon si i ariv bann sok ekonomik. Kot nou bann pei tradisyonnèl, kot nou fer nou bann lenportasyon, i difisil pou akse. I annan pei larezyon, sirtou dan *SADC* kot i annan sa bann prodwi ki nou, nou pa pe akse sa marse. E enn bann eleman ki'n ganny met devan se sa *shipping route* pou kapab anmenn sa *cargo* anler e a tan pou nou kapab gannnen.

So, Mosyon ti ganny met devan osi pou nou kapab anmenn en laliny *cargo* ki kapab akse sa larezyon pli fasil. Ki si lager i eskale Lerop ouswa lo en lot kontinan lo bordaz, nou, nou konnen nou kapab akse *within 2* zour, 3 zour sa bann pei, pou nou kapab ganny serten sa bann prodwi ki nou santi nou bezwen. So sa i enn bann diskisyon enportan dan sekirite alimanter, akoz nou pa pe kapab prodwi tou keksoz Sesel.

Dezyenmman se, Gouvernman i bezwen kree kondisyon favorab. Sirtou tarif

avek taksasyon, kot i konsern nou bann prodwi. Sa ki nou pou enporte i enportan osi. E osi sa ki nou pe prodwi lokal.

E lot kote se annan en gidans serye kot i konsern nou kominote, kot i konsern kiltivasyon. Nou'n koz *backyard farming*. Nou'n koz osi lo *agroforestry*, i bezwen annan keksoz ki vini kler pou kapab asire ki, okenn endividi ki antre dan sa bann kalite aktivite, i pa pe ganny persekute avek en lot lotorite. Ki pou vin dir li ou pa kapab fer sa. Ou pa kapab fer sa.

Si prensip global ki nou pe mazin en se sekirite alimanter. Byensir i bezwen an koerans avek Lalwa lanvironnman. Ouswa Lalwa ki egziste avek proteksyon.

So, Mr Speaker, dernyen se kot i konsern lo *storage* kapasite. Nou annan en defayans. E *STC* son *CEO* ti vin isi, in fer resorti ki i annan defayans pou *store* lakantite manze ki kapab ganny stoke, pou en long peryod letan, san ki i garde. Akoz nou konnen poudir tou manze, tou keksoz i annan son *lifespan*.

So, eski bann konversasyon osi bezwen ganny fer avek sekter prive, pou antre ladan pou osi gard - sirtou nou bann stok, ki neser. Pou nou

kapab annan si dan evantyalite sok mondyal ki vini. So avek sa Mr Speaker, nou bann ferme I bezwen ganny bann *incentive* neserer pou zot kontinyen prodwi e gard sa soutenabilite dan *supply chain*.

E si zot lanmen en kote ou dir li, mon larg ou lanmen me ou lipye pa anmare, ou pa pou kapab. Zot pa pou kapab bouze. So, avek sa, bokou refleksyon lo sa Mosyon Mr Speaker. E mon swete ki keksoz i ava al pli profon pou analiz sityasyon sa Pti Leta Zil ki nou vin ladan, ki nou bezwen keksoz laba deor avek lemonn global. Mersi.

### **MR SPEAKER**

Mersi Onorab. Onorab Loizeau.

### **HON NORBERT LOIZEAU**

Mersi Mr Speaker. Bonzour tou dimoun, bonzour tou dimoun a lekout.

Mr Speaker Sesel koman en pti zil i depan plizoumwèn lo lenportasyon ki nou *export* keksoz. Plizoumwèn nou enport keksoz pou nou kapab servi isi lokal pou nou kapab konsonmen.

E osi koman en pti zil. sel de keksoz ki nou ti pe konsantre lo la dan nou lekonomi se touris avek lapès. Me plizoumwèn nou ti konsantre plis lo touris. Me

avek larive *COVID* nou'n aprann en leson ki zanmen depan lo zis en keksoz.

Me sa letan ler *COVID* ti vini, ti osi ti en moman kot ti pou annan en eleksyon. E dan eleksyon *LDS* ti ganny laviktwar. E ler nou ti rantre dan Gouvernman Mr Speaker, keksoz pa ti fasil. Akoz enn;-nou lekonomi ti'n tonbe senpleman akoz Gouvernman avan pa ti pe mazine mannyer nou pou drese me plito ek *COVID* zot ti panik zot ti pe plito prete e donn bann biznes.

Zot pa ti mazine mannyer nou pou fer biznes rekomanse. E nou koman en Gouvernman menm si nou ti antre dan en moman parey Mr Speaker - dan sa moman difisil nou ti mazin pli lwen. E en keksoz ki nou ti fer Mr Speaker i enportan ki mon repete, nou ti fer sir ki tou nou dimoun i ganny en vaksen pou nou kapab ganny sa *herd immunity*, kot pou nou kapab relanse.

E apre ki nou ti'n donn vaksen Mr Speaker nou ti pe sey kontrol *COVID*. E ki nou ti fer Mr Speaker? Nou ti pran risk nou en Gouvernman ki pran risk nou. Nou ti ouver nou lekonomi. Nou ti re ouver nou lekonomi Mr Speaker akoz parey mon ti dir lot fwa nou lekonomi ti lo nou zenou menm

larzan pou pey travayer nou ti napa.

E nou ti reouver pou nou fer bann biznes olye depan lo *FA4JR*, re balans zot, rebouse e ozordi Mr Speaker nou lekonomi pe fer byen. E avek sa lekonomi ki pe fer byen Mr Speaker, Gouvernman ti vwar ki malgre touris ti pe antre nou pa pou kapab depans zis lo touris. Nou bezwen rod en lot louvertir. E sa ti lapas.

Nou ti ouver nou Sekter Lapas en pe pli gran Mr Speaker. Kot nou ti ankouraz dimoun, sirtou bann ki enterese pou fer bann prodwir a la baz pwason, a la baz bann prodwir lamarin Mr Speaker.

Nou ti ankouraz dimoun e bokou dimoun ti vini kot later ti ganny donner isi Ile Du Port, kot i annan bann *processing plant* ki pe ganny mete pou nou kapab bouz dan en lot nivo avek pwason Mr Speaker. Bann *cold storage* pou stokaz a en tanperatir favorab Mr Speaker. Tousala nou ti lans ladan. Akoz nou ti en Gouvernman ki serye e ki pe mazin pli byen.

E *aquaculture* Mr Speaker ki en proze ki lot kote latab i dir ki zot ki ti inisyé, avek *COVID* tousala ti'n tonbe Mr Speaker akoz ti napa larzan. Me nou avek lansman nou lekonomi, avek nou lekonomi ki ti pe

agrandi, nou ti relans li ankòr. E ozordi Mr Speaker nou pe fer byen.

Avek sa louvertir Mr Speaker, bokou dimoun in vin devan e *COVID* in fer nou realiz en keksoz ki nou isi Sesel nou kapab prodwir. E *agroforestry* in en size ki'n monte dan nou Lasanble e deor ek piblik.

E ozordi Mr Speaker, nou ti al vizite Zedi pase ou Vandredi pase, Komite *COGA* i annan 10 *plot* nou Gouvernman pe fer sir Mr Speaker ki 10 *plot* pou ganny *allocate* avek 10 dimoun. E 10 *plot*, 10mil met kare Mr Speaker pou dimoun kapab fer *agroforestry* lo en gran lesel. E sa en keksoz ki'n Gouvernman in fer.

Avek nou lekonomi ki pe bouze, nou fer sir nou pa depans zis sa ki nou pe gannyen. Nou ouver pou ki lezot dimoun osi i rantre en prodwir e ed nou dan nou lekonomi. Ede pou annan lanplwa pou nou Seselwa Mr Speaker. E tousala nou pe fer.

E La Digue par egzantp Mr Speaker Minis in dir, ki i pe fer sir ki i pou dil ek tou sa bann laplikasyon ki sa bann dimoun La Digue pe demande lo kote *agroforestry by* sa lannen la in dir Desanm *or* boner lannen prosen, tou bann aplikan pou



fini korek avek zot plan pou zot kapab komanse.

Mr Speaker sa en Gouvernman responsab e serye ki fer. Me selman Mr Speaker i annan akse ek finans. E nou koman en Gouvernman dan tou sa travay ki nou pe fer, nou pe fer sir ki nou dimoun i ganny akse ek finans.

Onorab William in vin avek Mosyon konsernan *DBS* mannyer pou akse ek pti biznes. E la ozordi Onorab William in vin avek en lot Mosyon Mr Speaker, pou nou akonpany nou bann pti biznes ankor lo kote sekirite alimanter.

Mr Speaker nou annan en Komite ki'n kree ankor Mr Speaker pou nou al pli pre ek bann biznes. Pou nou akonpany zot Mr Speaker, malgre ki lo lot kote latab zot pa pe zwenn nou.

Mr Speaker akoz petet mon pa konnen kot napa larzan ou pa war zot. E nou Mr Speaker koman en Gouvernman ek bann Manm serye. Malgre napa larzan pou sa Komite, nou pou vini nou pou travay pou nou akonpany nou bann fermye e tou bann dimoun ki pe ede pou kapab anmenn nou pei devan.

Mr Speaker lo kote stokaz ler ou koz sekirite alimanter sa bann zafer stokaz nou ti annan

en problemm stokaz dan Sesel. Kot nou pa ti kapab stok marsandiz pou plis ki 6 mwan. Nou ti bezwen fer vini en pti stok vann vitman avan i gate.

Me ozordi nou annan bann *warehouse* Mr Speaker, ki pe ganny fer par nou Gouvernman ki'n pouse. I annan serten sa bann *bonded warehouse* Mr Speaker ki annan bann tanperatir ki pou kapab tenir nou bann marsandiz, menm si i annan pou 6 mwan. Menm si i annan bann problemm dan lemonn ki pe arive, me selman nou kapab stoke pou nou kapab fer nou dimoun viv byen, annan bann komodite Mr Speaker.

E dan tousala Mr Speaker avek sa louvertir ki nou'n fer Mr Speaker. Nou'n osi fer sir ki tou nou bann *capital project* ki ti lo *hold* depi 2019, nou'n fer sir ki atraver lekonomi ki pe fonksyonn byen, nou pe fer sir ki nou bann proze kapital i ganny fer.

Malgre lot kote latab zot ti dir Mr Speaker kennsel tou proze kapital, donn lapey dimoun. Non, Mr Speaker nou koman en Gouvernman responsab e serye, nou'n fer sir atraver nou lekonomi ki pe bouz byen, nou'n fer sir ki bann biznes ki devlope swa lo kote lagrikiltir ou nenport kwa.

Me osi nou'n fer sir ki nou bann proze i bouze parey Cascade Mr Speaker - en proze ki ti lo *hold* depi 2019 avek en lekonomi ki performan nou'n fer sir ki nou'n fini sa proze. Menm si zot dir sa i zot proze. Me ti'n arete Mr Speaker ti napa larzan. Me nou nou'n fer.

Dan tou sa keksoz ki nou'n fer Mr Speaker, malgre nou'n fer sa louvertir lo kote sekirite alimanter, nou pe donn ferme tou keksoz. Mr Speaker nou'n fer sir osi ki nou bann etidyan ki ti ganny kondannen konmkwa zot pa pou ale deor pou al *scholarship*, nou'n fer sir ki atraver sa lekonomi ki pe performen, ki nou bann etidyan nou'n anvoy zot deor zot *scholarship* e zot pou kontinyen ale deor.

Mr Speaker dan tou sa ki nou'n fer, ler mon pe koz lo bann proze, nou'n fer sir ki bann bazar pe ganny fer. Bann proze ki ti'n ganny inisyé par Gouvernman avan me selman ti'n pri *somewhere*, nou atraver nou *mindset* pou bouz nou lekonomi, pran serten risk. Me depans byen Mr Speaker.

Pa zis aköz nou pe fer byen nou pou pran larzan zis nou pou partaze. Non, Mr Speaker, granmoun i dir ou mazin letan dir. Nou pe fer bazar partou, peser ti pe vann pwason lo

palet. E ozordi zot pe vann zot pwason lo en bazar prop kot zot kapab grate.

Mr Speaker tousala se bann direksyon ki nou koman en Gouvernman serye e responsab nou'n bouz ladan. Mr Speaker ...

### **MR SPEAKER**

10 minit, 10 minit Onorab.

### **HON NORBERT LOIZEAU**

Ok Mr Speaker mon a - An terminan Mr Speaker mon annan, sa i anefe i trwazyenm pwen lo 5 pwen ki mon annan, me selman mon ava termin la aköz pou donn sans lezot dimoun.

Mr Speaker an terminan mon anvi dir avek Onorab William mon pou siport son Mosyon. Aköz tou sa bann Kosyon ki Onorab William in vin avek i posibilite en bann Mosyon ki lontan in la sa. Me selman i pa ti pe ganny sipor.

I pa ti pe ganny sipor pou li kapab anmennen. Me nou koman en Gouvernman serye e responsab, e koman en *Caucus LDS* ki krwar dan nou Manm, ki krwar ler en dimoun i vin avek en propozisyon serye Mr Speaker, nou toultan nou pran li lebra ouver.

Avek sa Mr Speaker, mon a remersi ou pou donn mon

laparol e mon ava dir ek Onorab William nou pou siport sa Mosyon, akoz nou santi sa Mosyon i bon akoz nou bezwen akonpanyy nou Gouvernman e akonpanyy tou dimoun, akoz nou tou nou Seselwa. Mersi Mr Speaker.

**MR SPEAKER**

Mersi Onorab. Onorab Wavel Woodcock.

**HON WAVEL WOODCOCK**

Mersi Mr Speaker. Mr Speaker sa Mosyon ki devan nou ki anmennen par Onorab William i en Mosyon ki vremen bon. I en pti pe malere ki en tel Mosyon avek sitan lenportans annefe *timing* sa Mosyon i vremen bon. Par lefe ki nou fek bomaten kre en Komite ki responsab pou Sekirite Alimanter e Devlopman Soutenab.

Devlopman soutenab Mr Speaker mon met lanfaz lo la. I sagren Mr Speaker ki nou pe anmenn en Mosyon sitan enportan apre ki en Komite Lasanble, ki pou annan en regar lo lagrikiltir, lo nou sekirite alimanter e Mr Speaker parey nou'n war ler nou pe ekout bann entervenans ki'n koze mon konnen, akoz serten fristrasyon sirtou par Onorab Loze ler in koze.

In plizoumwèn olye siport sa Mosyon in plizoumwèn kraz Onorab William. Sa i normal Mr Speaker akoz e zot ki ti anvi fer li pas par lafnet. E la ozordi i dan nou kote, i pe anmenn bann Mosyon pou anmenn nou pei pli devan.

Pou kre bann keksoz ki dan lespas zot pa'n kapab kree. Akoz nou tou nou konnen Mr Speaker pandan letan kolonyal menm avan ki zot Gouvernman ti vin o pouvwar, ti annan en boom dan lagrikiltir Sesel ziska ler zot ti detrir lagrikiltir atraver plizyer bann lakonpanyen ki zot in kree.

Mon pa pou al an detay lo sa bann lakonpanyen - *SMB*, nou tou nou konnen ki'n arive dan bann zafer kanmaron. Nou tou nou konnen ki bann labi ki'n arive. Ozordi Sef sa bann letan ozordi i bezwen pe rann lapel devan Lakour. Akoz bokou bann labi ki'n arive anba sa bann lakonpanyen ki ti enkli anba zot Gouvernman ki'n detri lagrikiltir konpletman dan nou pei Sesel.

E ozordi nou Gouvernman pe relev lagrikiltir ki zot, zot in anmenn sa lendistri sa sekter Mr Speaker lo son zenou.

Mr Speaker koman en Manm ki sorti lo zil, mon sorti annefe lo en zil ki prodwir

bokou. Nou annan bokou laferm anefe Grand Anse sirtou lo blok Amitie, St Joseph, St Sover. Lo kote Baie Ste Anne Praslin osi nou annan bann parey lo plato Cote Dor, Cap Samy e lezot landrwa ankor nou annan bokou bann fermye ki pe prodwir Mr Speaker, *livestock*, *crops* e plizyer bann legim ki nou bezwen ozordi.

Mr Speaker, ozordi nou konnen ennler mon *still* pa ganny en konpran akoz ki bann Onorab lo lot kote latab sak fwa zot vin devan sa Lasanble, sak fwa zot pou koze, olye koz lo en keksoz ki pou ed nou pei, anmenn nou pei pli devan, zot vin plito avek bann mansonz, zot vin parey labitid zwe sa sitar de lakord Mr Speaker. Kot parey menm Manm ki ti dir sa, sa larzan ki *IMF* in donn ou \$107milyon annou pran sa larzan annou partaze.

Olye annan en Gouvernman ki responsab ki balans e zer larzan dan en fason apropiye, ki nou pei i vin pli soutenab. Ki nou kapab kouver tou nou kou e an menm tan se aziste e ed nou travayer dapre nou mwayen, dapre larzan ki nou pei pe anmase.

Sak fwa zot vin devan sa Lasanble Mr Speaker, tanzantan zot koz sa zafer larzan palto, larzan isi, larzan

laba ki bann *allowance* ki bann Minis i gannyen. Be zot bliye Mr Speaker.

Preske tou bann *constitutional appointees* i annan bann alokasyon bann *allowance* ki zot gannyen. E zot Minis ler zot, zot ti o pouwar sa bann *allowance* ki bann Minis pe gannyen ozordi zot ti gannyen *allowance*, *allowance* palto. Zot ti *travel* monte desann e ankor nou ozordi nou Minis i *travel* avek en delegasyon pli mwens. Zot ler zot Prezidan ti *travel* delegasyon 60 dimoun.

Ler bato ti deplase Mahe Praslin ti deplas *Helicopter* tou bato *Coast Guard*, 60 solda tousala Mr Speaker. Gaspiyaz ti annan en kantite anba zot Gouvernman Mr Speaker e zot konn tre byen. Zot konn tre byen mannyer keksoz ti marse. E an plis ki sa pou *top-up* larzan ki bann Minis ti gannyen si nou mazin byen dan Sizyenm Lasanble ti annan, sa lanvlop gri ki ti sorti kot Larme. Sa *revolving account* la.

Mannyer mon konpran sa lanvlop ki sorti kot Larme, ti pou *top-up* saler ki bann Minis i gannyen dan lepase. Nou konnen bann koripsyon ki'n arive Mr Speaker. Sa bann larzan zanmen in ganny rann kont, sa bann larzan ti al,

manner nou apele - Lo kont ganny bage Mr Speaker mon pa pou servi sa lot mo. E nou tou nou konnen bann labi ki'n arive ki manner zot in gaspiye donn bal diverti kontan, fer tou sord kalite keksoz Mr Speaker.

Mr Speaker ozordi nou pei parey bann Manm in dir avan, mon nou'n fer fas pandan 2an avek en kriz mondyal en kriz ekonomik. E nou konnen manner nou pei ti ater. Mon pa bezwen al an detay lo la mon fatigue koz lo la. E Lepep Seselwa deor i konn tre byen kot nou ti ete 2an pase.

An plis ki sa ozordi nou ankor pe fer fas avek en lot kriz. Sa lager Larisi ek *Ukraine*, nou konnen ki lenpak i pe annan lo nou pei. Sanmenm pei ki fer plis prodiksyon *wheat, corn*, delwil *Sun Flower* e bann lezot keksoz ankor ki lemonn antye i bezwen. Nou konnen akoz sa kriz ki pe arive *Ukraine*, ant Larisi ek *Ukraine*, ki manner i pe afekte eksportasyon gas parey *LNG*.

Nou konnen ki pe arive avek ou karbiran ozordi dan lemonn. Ki fer ki ozordi Lerop La Frans pe ganny difikilte pou *supply* son bann pei avek karbiran. Transpor pa pe kapab roule akoz napa karbiran. Dolar in desann in ariv R13.78.

*Pound* in desann pou ariv R15.63 Mr Speaker.

*Despite* tou sa bann *challenge*, nou *still* pe kapab ranpli avyon pou vin Sesel pou ed nou lekonomi marse, pou nou kapab annan sa bann Bidze pou nou kapab fer parey mon'n dir fer nou lekonomi marse, e ki pou kapab met larzan dan pos nou pep ki tou Seselwa ozordi i ankor kapab ganny en saler.

E bann biznes pti-a-pti ki pe refer Mr Speaker. Ou konnen i iresponsab Mr Speaker ler ou tann bann Manm pe dir, ou konnen li i pe dir koman larzan i antre annou zis pran larzan partaze donn *left right and center*.

Me si nou pe dir - wi nou Gouvernman *despite* sa *challenge, despite* en lannen ki nou'n dan en defisit, nou Gouvernman *still* pe fer provizyon pou reviz nou *salary grid*, pou ogmant saler Lepep Seselwa.

Me zot sa bann kalite logmantasyon ki zot pe demande, le kestyon ki mon pe demann zot, eski zot pe dir nou Gouvernman al takse bann biznes deor plis ankor? Kot nou pou ganny larzan? Kot nou pou ganny larzan pou nou ogmant saler Seselwa parey en bann ti dir, mon rapel en Manm enn

fwa ti dir ah fodre nou donn pansyon R15mil.

Kot nou pou ganny R15mil pou donn pansyon? Mon ti ava kontan dir zot eksplik mwan. Eski zot pe espekte nou al takse bann pti biznes deor, bann gro biznes, bann mwayen biznes? Takse biznes plis, detri biznes met biznes net ater?

Mon bann frer ek ser larzan ki nou pei i kolekte pou depans Gouvernman, se larzan *tax* ki nou anmase avek bann biznes. Apre 2an ki bann biznes in *struggle* la zot pe refer, zot pe espekte ki nou al takse bann biznes plis ankor?

Parey en Onorab ti dir sorti La Digue poudir trezyenm mwan saler osi fodre nou *backpay* Mr Speaker. Eski zot anvii nou detri tou sa bann pti biznes La Digue? Zil ki annan plis pti biznes La Digue Mr Speaker?

Mr Speaker i montre poudir enn ler bann keksoz ki zot dir, ou war poudir zot pa responsab, zot pa konn balans keksoz, zot pa konnen ki mannyer pou zer lekonomi.

E se pou rezon ki nou lekonomi in deza tonm *en panne* dan lepase ki *IMF* in bezwen *bail* nou *out*. E an plis ki sa apre ki ankor anba zot *watch* nou lekonomi ti pres pou

ganny detri konpletman. Nou Gouvernman in vini par lagras Bondye e nou'n nobou kapab relans lekonomi nou pei. Pou envestir plis dan bann sekter ki enportan ozordi, sirtou apre bann lesan ki nou aprann. Akoz nou'n depan plizoumwen lo tourism ek lapas dan lepase.

An plis ki sa Mr Speaker, zot pe dir nou pa enterese avek lagrikiltir, me selman dan Bidze siplemanter ki fek vin devan nou, nou Gouvernman in met R73.1milyon sibvansyon pou bann ferme.

*ESA* ozordi Mr Speaker - *ESA* ozordi Mr Speaker mon pa konnen si zot konnen bann Manm, poudir *ESA* pe donn *Grant* aktyelman. I annan bann *Grant* ki zot pe donner pou lagrikiltir avek lapas ki *up to* R200mil - *up to* R200mil pou bann *startup* ouswa pou bann pti biznes ki dan sa sekter.

Sa 2 Sekter Lapas ek Lagrikiltir pou ganny larzan pou enzekte dan zot biznes. Zot pe koz lo ferme ozordi? Be bomaten sa Komite ki'n ganny kree Mr Speaker, sa Komite ki mon'n mansyonnen pou Sekirite Alimanter ek Devlopman Soutenab - napa - zot *Chief Whip* in koze i dir pou napa enn zot Manm lo sa Komite.

Mon kapab konpran aköz Mr Speaker. Mon kapab konpran zot pa met enn zot Manm lo sa Komite, aköz i en Komite ki pa peye, aköz sa en parti ki kontan larzan Mr Speaker!

### **MR SPEAKER**

Eskiz mwan, ou pe akiz bann Manm ki zot pa lo sa Komite aköz larzan. Evite silvouple. Mersi.

### **HON WAVEL WOODCOCK**

En bann in koz *STC* ozordi, se aköz *STC* ozordi aköz nou Gouvernman ki komodite in monte. Mon bann frer ek ser nou tou nou konnen mondyal tou komodite partou dan lemonn, dile, delwil tou keksoz pe monte. Nou bezwen aste keksoz aletranze.

Nou bezwen kapab aste keksoz aletranze lo pri ki i pe vann. Ou pa kapab aste en keksoz ser, nou pa kapab aste en keksoz R100 aletranze vin vann R100 Sesel Mr Speaker. I pa fer sans. Avek son kou *freight* ki tousala in monte ler i ariv Sesel. Konbyen zot pe espekte nou vann sa bann keksoz? An plis ki sa tou dimoun i konnen ozordi poudir marsandiz komodite kot *STC* pli bonmarse ki kot bann lezot marsan.

Se sa rezon ki lepep Pralinwa in demande pou nou annan en *retail store* Praslin, ki baze kot *warehouse STC*, ki nou pa bezwen pay sa bann kou egzorbitan ki nou ti pe *rent* dan lepase anba zot Gouvernman.

E an plis ki sa Mr Speaker zot bliye poudir anba zot Gouvernman, sete zot Mr Speaker ki ti pe *lease* en bout later avek Gouvernman, apre zot ti *sublease* sa later avek *STC* pou R850mil par mwan.

Zot ti *lease* sa later pou selman R73mil *sublease* avek *STC* pou R850 mil par mwan. E ler nou ti debiste zot komans demann zot kestyon lo *FPAC*, zot ti taye zot ti vann sa later pou R17 milyon Mr Speaker.

E la ozordi zot pe dir nou ki'n fer pri komodite monte kan zot, zot in abiz lo later Gouvernman. *Lease* li pou R850 mil lo en profi R775mil apre zot revann sa *lease*, zot vann sa later avek *STC* pou R17milyon Mr Speaker.

Ki nou ti kapab fer vin R17 milyon Mr Speaker?

### **MR SPEAKER**

10 minit Onorab.

### **HON WAVEL WOODCOCK**

En kantite keksoz mon bann frer ek ser. Mr Speaker ozordi nou bezwen azir koman en

Gouvernman responsab. Nou anvi relans lagrikiltir dan nou pei, nou bezwen investir dan nou fermye nou bezwen met bann fasilite kapital pou zot kapab ganny akse avek.

E an menm tan nou bezwen fer provizyon bann later ki deza nou Gouvernman pe met a dispozisyon bann fermye.

Lo kote Praslin mon konnen nou annan enn de *issue* ki nou bezwen rektifye. Fer sir ki i annan ase legren. I annan ase legren, langre, bann materyo pou bann fermye servi. Rezourd *issue* delo, repar bann basen ki zot in les tonm an rin parey Basen Zalouzi, Basen Mont Plaisir, Nouvelle Découverte. E Mr Speaker nou bouze.

Koriz bann fot lepase fer sir ki fermye i ganny akse avek tou bann *matter* ki zot bezwen, langre, legren ki zot bezwen lo *store*. Fer sir ki zot pe ganny delo, fer sir ki zot pe ganny akse ek tou sa bann keksoz ki zot bezwen pou zot kapab bouz devan. E se sa direksyon ki nou Gouvernman pe ale, pou nou aziste pou nou relans sa sekter, donn sa sekter en pti *boost* e ed sa Sekter Lagrikiltir pou bouz pli devan, pou nou fer sir ki nou annan sekirite alimanter dan nou pei Sesel.

Avek sa de mon Mr Speaker mon dir ou mersi.

### **MR SPEAKER**

Mersi. Onorab Doyace Porice.

### **HON DOYACE PORICE**

Mersi Mr Speaker. Bonswar tou dimoun ki pe ekoute. Mr Speaker parfwa i annan nou serten nou Manm Lasanble, ki nou pa konnen ki nou vin rabase dan sa Lasanble.

Zis parey mon koleg Onorab Loze. Mr Speaker mon pou siport sa Mosyon anmennen par Onorab William, akoz i vremen konsern nou tou Seselwa ki reste Sesel.

Akoz sa ki pe arive dan lemonn, Sesel pa pe ganny eparnye. Nou bezwen met nou pare pou revwar lafason travay nou bann fermye ek peser. Ede pou zot anmenn plis prodiksyon, fer plis prodiksyon lo bann laferm. Annan plis later pou donn bann fermye ki vremen anvi fer sa travay.

Parey nou konnen Mr Speaker nou enport bokou komodite. Alor nou pou bezwen esey koup en pe sa bann lenportasyon.

Mon rapel lontan kot mon ti reste Praslin avek defen Mr Salomon Ramkalawan ek manman Mina, mon ti manz zis sa ki nou ti prodwir nou ti osi



lev granmaten pou rod labwet pou met dan kazye Mr Ramkalawan, pou nou ganny pwason pou manze. Apre ki mon ti al lekol.

Legim ek pwason ti an labondans Mr Speaker. Ti napa finans ki ti ganny donner par Gouvernman swa pou al lapes swa pou ou plante. Ler mon ti sorti lekol mon ti travay dir pou mon ganny manze. Zis parey sa Prezidan ki la o pouvwar Prezidan Wavel Ramkalawan, li osi ler i ti ganny son vakans lo Mahe i ti desann Praslin i ti vin donn nou en koudmen lo sa ki nou ti pe fer.

Me konmela nou mazin zis enporte, san mazin lefe nou lasante. Sa ki nou enporte nou pa konnen ki mannyer zot fer sa prodwir. Me Sesel i pli fasil pou nou war ki mannyer nou prodwir. Praslin nou annan nou apepre en santenn ferme. Me nou pa pe war sa kantite prodwir ki nou pe espekte.

Me mwan mon pou kontinyen demann Gouvernman pou siport zot pou anmenn plis prodwir. Nou osi annan bokou peser pe debourye e petet nou demann plis zenn pou zwenn avek bann peser ek ferme pou nou elarzi sa metye.

Byento nou pe ganny en nouvo bazar ek en landrwa pou peser Baie Ste Anne Praslin.

Alor annou zwenn ansanm, e siport Gouvernman pou kontinyen siport nou peser ek nou ferme pou ki nou ava sofgard nou sekirite alimanter.

Avek sa de mo mon pou siport sa Mosyon anmennen par Onorab William, e mon pou demann tou mon bann koleg MNAs pou vote e siport sa Mosyon. Mersi Mr Speaker.

### **MR SPEAKER**

Mersi. Mersi Onorab. Onorab Henrie.

### **HON GERVAIS HENRIE**

Mersi Mr Speaker. Bonn apre midi tou dimoun sirtou bann dimoun dan Distrik Mont Buxton. Mr Speaker nou dan en peryod pos-COVID. Kestyon ki devan nou ozordi se ki mannyer nou *recover* e garanti serten nivo alimanter?

E pou sa arive lemonn antye pe fer refleksyon lo sa size, e largiman prensipal se ki nou fasilite nouvo lenvestisman akoz sa i pou fer 2 keksoz. Lo en kote i ogmant prosperite. E dezyenmman i batir rezilyans. Be dan konteks nouvo lenvestisman nou bezwen mazin devlopman soutenab. Akoz parey loter Mosyon in averti dan en klendey nou pa kapab *afford* perdi tou.

E zot sa devlopman soutenab, i bezwen asire ki i annan larmoni ant lanatir, lekonomi e size sosyal ler nou pe koz nouvo lenvestisman.

Mr Speaker letan nou pe koze ozordi an Oktob 2022, pou bann dimoun ki pe ekoute, mon annan pou dir zot sa. Nou sorti lwen, nou sorti tre lwen. E toulezour mon remersi Bondye ki sa pei pa'n koule e i pa pou koule anba *LDS*.

Si nou fer en pti tourdorizon pou *contextualize* sityasyon ki'n fors lanmen loter Mosyon anmenn sa Mosyon i koumsa;-

*Real GDP* an mwayenn ant 2016 a 2019 ti apepre 4.2poursan. *COVID* i rantre an 2020 nou performans i ratresi i vin, i ratresi par 12.9 poursan an 2020.

Defisit fiskal an mwayenn ant 2016, 2019 normalman i ti mwayen 1.4poursan ouswa 0.7 poursan nou *GDP*. An 2020 sa defisit i agrandi pou vin -19.5 poursan an 2020 det piblik.

An 2018 ti 62.3poursan nou *GDP* lafen 2018 sa. Lafen 2021 sa sif ti ariv 87.7 poursan. Alor nou sorti lwen, nou sorti tre lwen. E ozordi ler nou pe koze an Oktob 2022, pou mwan mon rekonnèt poudir nou pe pas dan en transformasyon. En transformasyon anmennen par

en nouvo Gouvernman, ki mazorite Seselwa ti fer konfyans ladan an Oktob 2020.

Alor pou mwan letan mon regard sityasyon, tout an rekonesan ki degre lwen nou sorti, senserman mon vwar nou ver i lanmwatye plen olye ki lanmwatye vid.

E mon a eksplike aköz Mr Speaker. Sa Gouvernman letan in vini, in pran li son responsabilite pou tir pei dan kriz ekonomik. Tou son bon lentansyon ki in vin avek e ki'n fer serten dimoun en pe ankoler avek nou an partikilyerman nou bann siporter, aköz program ki nou'n vin avek, nou pa'n kapab demar li avek lavites ki nou ti anvi aköz lentansyon sete pou asire ki pei pa koule.

Travayer Seselwa partikilyerman dan servis piblik i kontinyen ganny en saler. Nou'n bezwen met latansyon lo lekonomi e retir pei dan sityasyon *COVID*. E ki nou'n fer? Bokou keksoz. Annou pa oubliye ser frer Seselwa, nou'n donn konsesyon lo *fuel* par 25poursan pou asire ki komodite ki pe al lo bann zil Praslin, La Digue pri i reste stab.

Nou'n redwir *tax* biznes an 2022 pou bann biznes ki ti pe fer profi par lao R1 milyon in

redwir sorti 30 pousan pou desann 25 pousan. Nou'n *repeal CSR Tax Corporate Social Responsibility* ki ti *Bill* limero 17 lannen 2021.

Lagrikiltir;- Onorab Loizeau in koz longman lo la. Me nou'n tande semenn pase Minis in vin dan Lasanbl, e e in dir nou ki an se moman i annan 2.8 ektar later ki pe ganny *survey*. Lo Praslin par egzantp i annan 166 aplikasyon, 25 ladan i ek Praslin e Gouvernman e met nouvo striktir pou kapab demar sa size distribisyon later.

*Loan*;- *Loan* lagrikiltir an 2020 R11 milyon, 24 *loan*. 2021 - R12 milyon pou 22 *loan*. 2022 ziska prezan in annan R11.6 milyon ki'n ganny donnen pou 15 *loan*. Me i reste ankor 24 demann. Mon lapriyer ozordi se ki sa ki ganny i re peye pou kapab asire ki lezot dimoun i gannye.

Lapes Mr Speaker. Nou pe koz devlopman, sekirite alimanter. Dan lapes plizyer proze kominote i demare. Baie Ste Anne Praslin 22milyon in ganny mete. Glacis R600mil. Ile Perseverance R450mil. Anse Aux pins, non, Baie Ste Anne konbyen mon'n dir? 22 milyon. Anse Aux Pins R10milyon.

In annan osi proze Grand Anse Praslin, North East Point,

san oubliy Cascade ki fek ouver zoli pti bazar.

San bliye ki Linyon Eropeen i osi annan en Lagreman avek Sesel, ki apel *Sustainable Fisheries Partnership Agreement*. E sa i en sonm €60milyon. E sa bann proze i enkli fer nouvo bazar, *pontoons*, laboutik pou vann bann lekipman e fasilite karbiran. *Ice plant* Grand Anse Praslin in ganny en nouvo *ice plant* R500mil. Tousala i pou asire ki nou annan sekirite alimanter.

San oubliy *Food and Agriculture Organization* ki i an partenarya avek Sesel pe devlop sa ki nou apel *Blue Growth Initiative* kot pe siport plizyer proze pou ogmant produktivite dan lapes. Me solman zot oule ki nou fer lapes responsab, soutenab e amelyor governans dan Sekter *Aquaculture*.

Sipor finansyel pou kapab asir sekirite alimanter;- An Zilyet 2021 in annan en *loan* \$20 milyon sorti kot Labank *African Development Bank Group* pou siport program reform ekonomik.

I annan osi *ESA Seed Capital* ki Onorab Woodcock in mansyonnen ziska R200 mil pou bann Sekter Ekonomik an Out sa lannen. San nou bliy *Blue Grant Fund SeyCCAT* ziska

\$700 mil par an. Mon'n mansyonn *Sustainable Fisheries Partnership*.

Mr Speaker, an Novanm lannen pase ansanm avek Minister Finans, ti fer en rapor ki ti prezante piblikman *Eden Bleu*, pou nou kapab vwar sityasyon e konpran sa sekous ki Sesel in pas ladan dan letan *COVID*.

E i annan konklizyon ferm ki'n ganny resorti. E ki zot in dir nou bezwen devlop bann nouvo Sekter Ekonomik pou nou kapab devlop tou nou potansyel ekonomik. I annan Lekonomi Nimerik, Lekonomi Ble avek Lapes, Lagrikiltir, Sekter Finansyel. Pti e gro biznes i bezwen vwar ki mannyer zot kapab readapte e moderniz zot.

E ozordi dan nou bann distrik *SIB* pe fer letour pe konsilte bann *DA*, bann *MNA*. I annan osi bann *Honorary Council* ki pe vini pou nou kapab vwar ki bann *potential business opportunities* ki annan dan tou le 26 *constituency* dan Sesel. Alor sa ver i plito plen ki i lanmwatye vid.

*COVID* ki in fer? In anmenn partikilyerman sa bann lenpak lo nou. Rediksyon dan tourizm kot aktivite in desann ziska plis ki 70poursan. Sa ki in fer? In redwir reveni pei ki kontribye an gran parti par

sa sekter. E in osi afekte rediksyon dan demann, akoz partikilyerman lenportasyon swa leksportasyon.

E alor nou bezwen diversifye nou Sekter Tourizm. E ki mannyer nou pou bezwen fer sa? Nou pou bezwen ogmant lenvestisman piblik la nou pe koze, kot li Gouvernman i bezwen pran *the leading role* pou ed Sekter Lagrikiltir agrandi, lapes apre *manufacturing*.

Gouvernman i bezwen seryezman konsider plis *tax incentive* e sibvansyon pou bann lakonpanyen dan sa bann sekter, ki mon'n mansyonnen Mr Speaker. Alor mon ava dir an konklizyon ki nou ver i plito lanmwatye plen ki lanmwatye vid. E akoz mon dir zot sa?

Mon pou donn zot 3 sitasyon pa par mwan, pa par *LDS*, pa par personn. Me bann lorganizasyon enternasyonal *reputab*. *IMF* an premye.

E mon site. *IMF* in fek fini en misyon isi Sesel e zot dir: -

*“The Seychelles Government has made impressive progress in implementing the International Monetary Funds-supported program and restoring macroeconomic balances”*.

Fen sitasyon sorti kot *IMF*.

I annan *The African Development Bank* ki dir: -

*“The African Development bank is pleased that the Government is making the right decisions and the positive trajectory towards positive growth and development in the country”.*

Fen sitasyon.

E lot sitasyon mon trwazyenm e dernyen se Tyermenn Labank pou Devlopman ki ti dir.

*‘We are very proud how Seychelles has recovered quickly from the pandemic. At the moment I think Seychelles has managed this really turbulent economic environment quite well’.*

Mr Speaker sa ki nou pe pas atraver i pa premye sok dan nou demokrasi modern. Pou sa ki annan memwar ki pa tro kourt i a rapel, an 2008 kriz finansyel mondyal e an 2010/2011 kriz piratri par bann Somalyen.

Sa letan mon ti en Manm Lasanble dan Katriyenm Lasanble. Nou ti baze kot *National Cultural Centre* Victoria. Katriyenm Lasanble nou ti annan en Lopozisyon responsab. Mon repete en Lopozisyon responsab, ki ti mars akote Gouvernman pou

soutenir li e pou siport Sesel e Seselwa.

Mon ankor fyer pou rapel premye *joint motion* ki ti anmennen par Dirizan Lopozisyon sa letan ki Prezidan pei konmela Onorab Wavel Ramkalawan, e Mrs Marie-Louise Potter ki ti *Leader of Government Business*.

En *joint motion* pou ki Seselwa i siport Gouvernman dan tou bann demars pou kapab dil avek sa sityasyon piratri. E enn bann Lalwa ki nou ti pase e ki la apre nou'n bezwen anmenn sa onzyenm lamannman konstitisyonnell pou asize ki sa Lalwa i an konformite avek nou Konstitisyon.

Mwan Gervais Henrie mon fyer ki mon ti vote lo sa Lalwa, akoz mon ti pe debout pou tou mon bann frer Seselwa ki Somalyen ti pe fer martir Somali.

**(APPLAUSE)**

### **HON GERVAIS HENRIE**

Mr Speaker nou ti osi siport tou bann Lalwa Finansyel ki *IMF* sa letan ti pe travay avek nou ti dir nou ki nou bezwen fer.

Me ozordi ser, frer pep Seselwa zabitan Mont Buxton, nou dan en sityasyon ki

kontrerman lanver. Nou annan en Lopoziyon ki ti vot kont merit Bidze 2022. Nou annan en Lopoziyon ki ti *walkout* semenn pase ler nou ti pe pas en *Bill* pou kapab aprouv Lapey Trezyenm Mwan. Kantmenm zot tap lanmen lo latab dir donn Seselwa son 50poursan, e mon ava dir Lepep Seselwa ki dan servis piblik.

Mon ava dir zot-

*(Interruption)*

**MR SPEAKER**

*Order please!*

**HON GERVAIS HENRIE**

Tou larzan-

**MR SPEAKER**

Ou ti pe konklir Onorab?

**HON GERVAIS HENRIE**

Mon ti pe konklir mon lo konklizyon Mr Speake -. tou larzan dan bann *public servant the full 100 percent is in the Budget* e sa Lalwa i garanti ou 50 poursan. Ki sa Lalwa i demann ou se zis prezan met sa pti zefor prodiktivite, pou sa lot 50 poursan. Ou kapab garanti.

Me ki Lopoziyon i fer? I *walkout on you* ler ou bezwen li! Ler ou bezwen li lopoziyon in *walkout* e i pa anvi ed ou! *US* pa pe partisip, i pa ti partisip lo

*Platinum Committee* ki ti bezwen pran bann desizyon brav konsernan *COVID-19* dan nou pei.

Zot ti boykot vaksen. Zot ti dir nou pa bezwen ouver *Airport*, zot ti dir *freeze* tou *Capital Projects* e *US* in refize partisip lo *Sustainable Development Committee* Lasanble Nasyonal.

Mr Speaker mon ava dir avek Seselwa ankor ouver zot lizye, akoz nou annan en move Lopoziyon ki konn zis li e fer politik popilis ...

***(APPLAUSE)***

**HON GERVAIS HENRIE**

... sa lekonomi ki pou asir sekirite alimanter.

Onorab Woodcock semenn pase ti dir nou ki en msye ki byen sa dan politik ti dir li e pas sa mesaz avek *US* - sa lekonomi la i pa pou *US* i pa pou *LDS* ouswa sependan lekel parti politik sa lekonomi i pou Sesel e Se..sel..wa!

I annan keksoz wi akoz nou prensip fondamantal i diferan. Zot, zot sosyalis nou, nou liberal *a social democrat*. Me solman i annan bann keksoz parey lekonomi sekirite alimanter, trezyenm mwan, Bidze pei nou pa zwe avek. Nou

bezwen siport sa pei e sa Nasyon.

E mwan mon pou asir Onorab Woodcock mon sipor, Onorab William mon sipor akoz tou lede i 'W' 'W' ki mon frer ek ser ki viv dan Distrik Mont Buxton i kapab benefisyè avèk konsey ki nou pe donn Gouvernman ozordi apre midi. Mr Speaker, e tou Manm Lasanble, mersi pou zot latansyon.

### **MR SPEAKER**

Meri Onorab. Nou ava termin deba avèk ladres 2 *Leaders*. Mon kont lo zot pou gard 10 minit koman sir egalite. Onorab Pillay ou ladres.

### **HON SEBASTIEN PILLAY**

Mersi Mr Speaker, in ariv 5er apre midi - mon le swet bonswar tou Seselwa ki pe ekout nou e tou dimoun ki pe swiv nou deba dan lakour. Mon krwar i enportan ki nou ekout byen kwa ki pe ganny dir apre midi, e pou nou konn en pti pe laverite, larealite, e sirkonstans ki nou pei i ladan ozordi.

Mr Speaker premyerman avan mon al en pe pli lwen, les mon adres serten meapreansyon oubyen serten mon pa pou dir mansonz - me serten lekonomi ki'n ganny fer avèk laverite part zisteman

Onorab ki'n entervenir avan mwan - Onorab Sekreter Zeneral, *sorry* Onorab Gervais Henrie - ki'n koze avan mwan.

Mr Speaker tou dimoun in vwar lo televizyon espekte Onorab Henrie ki ti dan sez, ki ti met mon deor ek ki *US* pa ti *walkout*. Mon krwar tou dimoun in war la ki si nou annan en Deputy Speaker ki pa kapab koz laverite lo sa size Mr Speaker, nou annan en gro problem dan Lasanble Nasyonal - san ki mon *impute* okenn *improper motive* - akoz sa msye ti met mwan deor. *Ok?*

Dezyenman Mr Speaker, ankor en meapreansyon, kan ou dir ki larzan pou trezyenm mwan i dan Bidze i la, mwan mon dir ek ou pey tou travayer Gouvernman zot trezyenm mwan.

**(APPLAUSE)**

### **HON SEBASTIEN PILLAY**

Ki sa zafer al fer dimoun fer *performance appraisal*? Ki sa zafer? Be si larzan i la pey li son larzan. Ou konnen akoz Mr Speaker mon dir sa? Akoz Onorab Woodcock atraver ou Mr Speaker, in anvoy en pti mesaz pou bann dimoun pou dir zot desann pou vini, vin

selebre Dimans dan nou *motorcade*, eksetera.

Mr Speaker atraver ou Mr Speaker Onorab Woodcock i dir 'nou'n sirmont defi e pei pe fer byen'. Be si pei pe fer byen, e la Seselwa mon koz ek ou la deor mon frer ek ser, si sa Gouvernman i dir ou i pe fer byen, i pe get ou byennet, be i dir ou al fer *performance appraisal* pou ganny sa ki pou ou.

Sa ki pou ou Mr Speaker, sa ki pou ou! E nou pa kapab annan en sironstans kot ler nou pe koz en Mosyon ki koz lo sekirite alimenter, be sekirite alimenter i relye avek pouwar pou mon aste sa ki bon osi pou mwan manze?

Me si mon pa kapab aste sa ki bon pou mwan manze, si mon napa larzan dan mon pos pou aste sa ki bon pou mwan manze. Ki mannyer ou kapab vin koz mon sekirite alimenter?

E pou pran parol ki *mover* Mosyon li menm li in deza servi;- *rating IMF, rating World Bank* pa met dan kastrol!

*Rating IMF, rating World Bank* pa met dan kastrol. Sa ki met dan kastrol se ki sa Seselwa i kapab aste pou met dan son *fridge*.

Mr Speaker i annan keksoz ki'n ganny dir apre midi,

i fer mwan realize poudir nou bezwen met rikord *straight*.

*Ok* ler nou koz lo koman en lopoziyon iresponsab, eski ti responsab ler Onorab William ti ganny propoze par *United Seychelles*, sa letan ti *SPPF* koman en anbasader pou *LDS*, *SNP* sa letan dan son zournal, trenn politik ladan zis pou kre bann fristrasyon, bann lanmertim e bann lennmi ki nou pa bezwen dan sa nouvo Sesel. Sa ti parol ki ti ganny servi par *mover* sa Mosyon Onorab Marie-Louise Potter.

E sa moman Minis Mitcy Larue ti annan sa pou dir. Mr Speaker li i siport lapwentman Onorab William, verbatim date Mardi le 22 Novanm 2011. Se pa *SPPF* ki ti pe maltret Onorab. Sete Onorab Henrie atraver son zournal *Le Seychellois*. So annou aret fer lekonomi ek laverite e dir bann keksoz. Akoz Mr Speaker mon pe servi bann fe. Bann fe ki'n ekrir.

### **MR SPEAKER**

Wi, *hold on, hold on* en pti moman. Ou pa sipoze servi lapres an deor pou fer sa.

### **HON SEBASTIEN PILLAY**

Non Mr Speaker, sa i verbatim Lasanble sa. Sa i verbatim Lasanble ki ti pe reflekte lo sa ki



lapres an deor i dir. Verbatim Lasanble le 22 Novanm 2011.

**MR SPEAKER**

Wi evite *Le Seychellois*.

**HON SEBASTIEN PILLAY**

Mr Speaker i enportan osi ki ler nou *move* en Mosyon e nou envok parol Bondye. Zis parey sa Mosyon ki nou ti *move*, mon ava ganny li byen Mr Speaker pou fer sir aköz mon'n get sa verbatim byen.

Sa Mosyon ti ganny *move* le 12 Zanvye 2001. Son lentrodiksyon; -

“Mr Speaker mon ti ava kontan dir ki Bondye in beni nou pei avek en zoli pei avek en lanvironnman ki vreman sen”.

Nou konnen lekel ki ti dir sa nou? Onorab Waven William an 2011, ki i ti kontinyen pou li dir *ok*: -

“Mon le felisit Gouvernman sirtou Prezidan Rene pou sa bann plan e mezir linisyativ ki pe ganny pran.” Ganny dir par Onorab William.

*Now* Mr Speaker, mwan sa ki mon napa problenm avek se ki tou dimoun i annan dwa annan son konviksyon e bouz dan son fason. E mon pa demann okenn dimoun pou anvoy zot *speech* kot mwan pou mwan aprouve. Me sa ki mon

demann dimoun pou annan serten kosyon lo la.

(Onorab Porice mon'n les ou koze mwan en!)

**MR SPEAKER**

Eskiz mwan mon bezwen demann Onorab Larue pou aret enteronp silvouple. Mersi. Onorab Pillay ou a prosede.

**HON SEBASTIEN PILLAY**

Mr Speaker si Onorab Larue i bezwen kalman al rode kot lopital en?

**MR SPEAKER**

Silvouple mon'n adres Onorab Larue.

**HON SEBASTIEN PILLAY**

Mersi Mr Speaker. Onorab Lemiel i dir mwan i annan kalman pou li. Onorab Lemiel ou annan? *Ok alright*.

Mr Speaker annou get larealite devan nou. Mosyon i vin prezant en largiman pou nou koz lo sa ki nou apel sekirite alimanter.

Me *mover* Mosyon dan son lentrodiksyon i dir ek nou koumsa poudir nou annan pou nou selebre. Me mon ti ava kontan konnen kwa ki nou pe selebre? Eski nou pe selebre sa ta problenm ki annan dan Minister Lasante ozordi ki dimoun pe kontinyelman

konplent servis e mankman latizann, mankman isi laba dan Minister Lasante?

Eski nou pe selebre sa kantite dimoun ki'n al rod lasistans sosyal, ki vin kot zot bann *MNA* ki apre pa pe ganny asiste ki dir zot pe pran tou sa letan pou ganny asiste?

Eski nou pe selebre sa kantite problem sosyal ozordi ki nou war pe evolye dan nou pei, apre ki nou'n anmenn en kiltir pou pil lo li pandan en konpany eleksyon?

Eski sa ki nou le selebre? Mr Speaker sa ki mon realize finalman ler mon ekout lentrodiksyon, in napa naryen pou fer ek Mosyon me lentrodiksyon in annan pou fer avek sey ensit dimoun pou desann pou en *rally* ki pe ganny fer mon krwar la *weekend*.

Sa ki enteresan Mr Speaker, sa ki enteresan, sa ki enteresan Mosyon pa'n al fer resers pou vwar ki sekirite alimanter nou pei pe ganny *threaten*, par bann aksyon menm ki Gouvernman in pran.

Par egzanp nou koz lo sekirite alimanter. Eski *mover* Mosyon in koz ek bann fermye pou *find out*, si eski lantre *IDC* dan prodiksyon ozordi pa pe kre en lenpak de favorab pou bann fermye lo Mahe?

Eski nou'n koz lo la? Nou pe koz lo en Komite ki nou'n kree ki *US* pa'n le vin lo la. Rezon i senp. Akoz lentansyon kre sa Komite lo komansman, e la mon lir ki mannyer i ti ete avan, i ti sipoze en Komite sektoryel ki pou dil avek diferan antite e departman. Sa ki Lasanble ti aprouve.

Lasanble pa'n aprouve pou sa Komite vin en Komite Lagrikiltir avek Devlopman Soutenab. Si nou ti le sa nou ti ava *move* en Mosyon pou sa enn Komite ganny konstitye.

Komite orizinal an traver *mover* Mosyon ki ti ganny *move* sa letan, ti demande e ti annan en lalis. E sa ti enkli lagrikiltir, lenerzi, lanvironnman. Akoz sa letan Onorab ti servi koman son baz largiman sete ki zot pa pe ganny konsilte lo bann desizyon ki ganny pran.

Ti napa naryen pou fer avek devlopman soutenab. Alors mon war li i mal e pa apropiye pou akiz bann Manm *US* ki akoz napa larzan lo en Komite nou pa vin lo Komite.

Nou pou vin lo en Komite ler nou konnen ki sa Komite, e lentansyon i annan fer. Ou pa kapab kre en Komite apre kre en lot *at the same time* i dir poudir i annan menm lentansyon dan sa ki i sipoze fer. Mon krwar nou bezwen sa

ki nou pe fer. Mon krwar nou bezwen get sa ki nou pe fer.

Mr Speaker legzanp i la pou dimoun kapab analize si zot santi zot lavi i bokou pli meyer ozordi oubyen yer. I pa mwan ki pou konvenk dimoun si son lavi i pli bon ozordi oubyen ki yer. Se ou sa dimoun ki pe santi dan sa soulye ki ou marse, si ou krwar ki sityasyon i pli bon ki yer.

E prezan si nou pe koz lo rezon sekirite alimanter, e i enportan nou adres sa pwen dan son totalite. Mon ti ava kontan konnen egzaktman ki stratezi Gouvernman i annan, akoz depi yer mon'n war trwa repriz ki en Minis in sipoze vin fer en *statement* lo sekirite alimante -r en *Minister LDS* pa'n kapab vin fer *statement* dan Lasanble lo sekirite alimanter.

In annan en ale vini ziska ler ki finalman mon krwar desizyon in ganny pran pou li pa vini. Si Minis li menm pa kapab vin fer en *statement* lo sekirite alimanter, ki mannyer *MNA* pou kapab enflyans e sanz stratezi Gouvernman lo sekirite alimanter?

*Unless* parey Onorab Henrie in *remind* nou dan son pozisyon koman Sekreter zeneral pou *LDS* sa letan lo *Tête a Tête* ki zot kapab koz deryer

rido e lo avek bann Minis pou fer bann keksoz.

Me malerezman *mes amis*, bann Manm *US* nou napa sa privez pou koz deryer rido avek Minis. So, Seselwa ou, ou bezwen ekoute demann ou lekor. E ferme ou bezwen ekoute demann ou lekor.

Par egzanp ler nou koz lo sekirite alimanter e nou viz nou largiman ver lagrikiltir, Onorab Woodcock atraver ou Mr Speaker, mon ti ava kontan konnen ki dernyen fwa ou'n vizit bann ferme Grand Anse Praslin? *Ok*.

E ler ou'n vizit bann ferme Grand Anse Praslin, eski bann ferme in dir ou ki napa *agronomist* dan lagrikiltir? Eski bann ferme in dir ek ou koumsa poudir zot pe ganny difikilte pou ganny langre?

Eski bann ferme in dir ou koumsa poudir *storage* langre i en problem? E eski zot in koz ek ou lo sityasyon pestisid, ki bokou ferme pe koz lo son bann difikilte ki zot pe gannyen?

Mr Speaker i annan bokou difikilte ki nou bann dimoun dan Sekter Agrikol pe fer fas avek. Me malerezman Gouvernman i kontinyelman dir nou ki tou keksoz i byen.

Zis parey ler nou *challenge* Minis pou

Ledikasyon, e Minis pou Ledikasyon i dir ek nou poudir tou keksoz dan lekòl i byen. Mon'n al en *meeting* bomaten e sa ki ou tandè avèk bann *teachers* i totalman diferan. E pa mon ti ensit sa bann *teachers* mon'n reste trankil mon'n zis ekoute. Zis akòz nou annan en tandans pou nou pa ekoute.

Mr Speaker i enportan ki nou mazin en keksoz en? Akòz toultan mon vwar ki i annan en konfizyon kot kote *LDS* an-ski konsèrn menm en Mosyon ki zot ti anmennen kot *mover* Mosyon li menm lo *floor* ti oule sanz son Mosyon.

Konmsi mon ti ava kontan ganny en konpran, ler zot dir par egzanp zot in fer sa bann keksoz ki zot in fer. Par egzanp sa zafer konsesyon lo *fuel*. Be mwan sa zafer konsesyon lo *fuel* mon rapel en Onorab dan Lasanble lager sa mwan. Mon rapel Onorab Churchill Gill.

Onorab Churchill Gill ki zot laba lot kote pe sey servi pou sey kre en maligans, en divizyon pa pou ariv ankor.

**(APPLAUSE)**

**HON SEBASTIEN PILLAY**

Riye ou, pa pou ariv ankor. *Ok?* Zis parey bann ki ti ganny *train*

dan milisya lontan ti ganny dir *shoot* avèk tron koko *whatever*. Nou'n nepli fer sa bann keksoz ozordi isi nou.

**MR SPEAKER**

*Hold on.* Onorab ou pe apros 15 minit la.

**HON SEBASTIEN PILLAY**

Mr Speaker mon pe degaze pou mwan terminen. Mersi Mr Speaker.

*(Off-Mic)*

**MR SPEAKER**

*Hold on.* Les Onorab fini apre mon ava pran ou *Point of Order*.

**HON SEBASTIEN PILLAY**

Dezyenmman,

**MR SPEAKER**

I annan laparol.

**HON SEBASTIEN PILLAY**

Dezyenmman Mr Speaker lo size sa *S.I.* ki'n vin dan Lasanble. E la mon ti ava kontan met en rikord, met lo rikord. *Ok.* Dan verbatim 1e 19 Fevriye sa ki kontan pou al gete al gete. Dan mon *reply* lo *speech* Bidze, mon ti demann avèk Minis pou Finans, mon ti dir"-

'Akòz ou Gouvernman pa regard dan Lalwa *Control of*

*Supply and Services*'. I lo rikord mon ti dir sa.

Minis ti dir ek mwan poudir sa Lalwa pa kapab ganny aplike.

Dezyenm fwa ankor lo rikord Lasanble Vandredi le 9 Avril, an-ski konsern kestyon lo Lalwa *FTC*, mon demann Minis ankor enn fwa si Prezidan i war poudir i annan difikilte ki dimoun pe pas ladan, akoz zot pa al ver sa Lalwa.

Ankor enn fwa Minis ti dir mon zot pa pe konsider sa Lalwa. Me ki nou'n vwar apre, nou'n vwar menm Lalwa vini ki'n propoz lamannman pou etabli en *maximum retail price*. E sa zot apel sa nide *LDS*.

Nide *LDS* ki lo rikord in ganny propoze par sa kote latab. E rezon akoz ou ti aparet propoz li se akoz sa letan nou ti ganny dir par en dimoun bokou pli savan ki mwan, ki nou, nou en bann lisyen ki aboy ek en karavann, e karavann pou pase.

Mr Speaker an konklizyon. Mon ti ava kontan koz lo sekirite alimanter lo sa Mosyon dan son fason *pure and true*. Semenn pase mon krwar Onorab ti vin avek en Mosyon lo *DBS* e i ti ganny sipor inanim lo sa kote latab. Akoz? Akoz son Mosyon ti vize ver en lentansyon kler pou Lasanble.

Ozordi malerezman Mr Speaker mon pwennvi i Onorab pa'n vir son lentansyon kler pou Lasanble.

Akoz son lentrodiksyon in kler kot i sible nou dan en parol Bondye ki nou, nou pe fer sa ki mal, antretan nou evok parol Bondye pou anmenn *blessings* lo nou tou.

Mon Mr Speaker mon ava servi Bondye pou envok *blessings* lo tou dimoun dan sa lasal. Akoz sa ki enportan Mr Speaker, se ki a lafen dizour Bondye pa zis pou *LDS*. Bondye i pou nou tou.

Sa ki enportan Mr Speaker dan tousala, sa ki enportan Mr Speaker dan tousala apre tou sa ki ganny dir, tou sa ki ganny fer, se ou sa Seselwa ki pe ekoute, ki pe swiv, ki la deor, ki pe santi, ki pe sibir, ki pe koze, mon adres sa pou ou.

Si ou, ou santi poudir keksoz i pli bon pou ou ozordi, si ou, ou santi ou annan zorey bann dimoun ki ou'n met la, ler ou telefonn zot, ler ou ekrir zot, ler ou rod zot. Si ou krwar poudir ou pe ganny sa larepons e sa servis ki ou devret gannyen, ou swa alors ti byen.

Me, si tousala ou pa pe ganny larepons, ou pe ekrir let personn pa pe reponn, ou pe telefonnen personn pa reponn,

ou pe anvoy *text* personn pa pe reponn, pa pe pase, Mr Speaker ou swa i senp, 2025 nou tir li la! Mersi.

**(APPLAUSE)**

**MR SPEAKER**

Bon, mon bezwen fer en pti klarifikasyon. Zis pou met rikord drwat lo size Minis *statement* lo sekirite alimanter. Mannyer ti ete lo *Order Paper* nou ti annan Lalwa *Construction Professional Bill Council* pou fini avek. Minis Rangasamy ti donn *notice* ki i malad e premye kou nou ti pe konsidere ranplas sa *item*.

Me mon pa ti tro satisfè avek sa zis akòz mon ti anvi fini avek sa Lalwa, pou li pa trennen. Se pou sa ki mon ti rode ki mannyer nou kapab fer e nou ti ganny laranzman ki *VP* i kapab vin pran sa *Bill* pou nou terminen.

Minis Joubert nou ti ofer li pou li kapab vin ozordi bomaten me i ti dir non, in fini angaze pou sa. Alor i pa okenn move lentansyon. Mon zis met sa lo rikord *to get the record straight*.

Onorab Larue mon ti'n dir ou, ou kapab ganny ou *point of order*. Ou ankò annan ou *point of order*? Onorab Larue.

**HON FLORY LARUE**

Mersi Mr Speaker. Wi mon ankò annan *Point of Order* anba 50 (2) nou *Standing Order* Mr Speaker. I dir ki nou kapab *call attention of the Speaker* pou en *infringement* ki nou santi en lot Manm in fer.

E mon santi ki dan deba nou Mosyon anba *Standing Order* 43 (5) *Leader* Lopozisyon pa pe respe ditou konteni nou Mosyon e i pe al partou kote.

E la in anmenn ziskan Minis ladan kote Minis ti ete. Letan li i ti malad nou pa ti rode kote i ti ete. Son *Chief Whip* pa ti konnen kot i ti ete Mr Speaker.

Alor annou annan en pe respe pou nou travay. Mersi.

*(Interruption)*

**MR SPEAKER**

Mersi. Non, non, non Onorab Pillay nou pa pou antre dan en deba lo la.

**HON SEBASTIEN PILLAY**

*(Off-Mic)*

**MR SPEAKER**

Non, non.

**HON SEBASTIEN PILLAY**

*(Off-Mic)*

**MR SPEAKER**

*Order! Order! Order* Onorab Pillay! *Order* silvouple! *Order!* Silvouple bes ou lanmen mon pa pe donn ou laparol la. Mon pe zis, mon pou fer en remark lo la. Mon pou fer en remark lo la.

Mon pa krwar *point of order* Onorab Larue i zistifye, akoz en kantite dimoun in koze, pa'n koz direkteman lo Mosyon. Mon'n aksepte dan lesans ki i annan en lentansyon politik dan tou sa bann diskour. Mon'n aksepte e mon pa war li ki i diferan.

Mersi. Mon donk mon pa pe pran *point of order*. mon pa pe pran *point of order*. Onorab Pillay ou ava permet nou termin deba. Mon'n,

### **HON SEBASTIEN PILLAY**

*(Off-Mic)*

### **MR SPEAKER**

... *sorry. Non sorry* - mon'n.

*(Interruption)*

### **MR SPEAKER**

Non, non mon'n *decline point of order* Onorab Larue konpletman. In ganny efase.

Mon pou prezan donn laparol Onorab Georges *Leader Government Business* pou son ladres.

### **HON BERNARD GEORGES**

Mersi Mr Speaker. Bonn apre midi Mr Speaker e tou bann Manm Onorab. Mr Speaker koman ou konnen i pa ti mon lentansyon koz lo sa Mosyon. Me mon'n krwar ki mon devwar pou pran laparol apre midi koman enn sa 2 *Leaders* dan Lasanble.

E pou retourn nou Lasanble lo sa Mosyon. Akoz lot *Leader* dan Lasanble ki'n koz avan mwan, in profite pou li koz pandan 15 minit lo tou keksoz sof sa Mosyon ki devan nou la apre midi.

E i fer parey i kontan fer Mr Speaker sak fwa ki Onorab Pillay i pran laparol, olye koz lo sa keksoz ki devan li, i profite pou li koz lo tou bann pwen ki i pa'n kapab fer depi yer bomaten e in pran sa loportinite pou li rezim tousala dan son 15 minit apre midi.

Alor Mr Speaker permet mwan pou pran laparol pou retourn nou lo sa Mosyon, me avan ki mon fer sa les mon zis koz en pti kou lo selebrasyon.

Kestyon in ganny demande, kisisa ki nou annan pou selebre la kot nou ete ozordi? Mon repons Mr Speaker sa bann dimoun ki demann sa kestyon se Dimans ki pe vini dan pti 4er apre midi desann kot laplenn Roche Caiman, e

zot ava vwar kisisa ki nou pe selebre ...

**(APPLAUSE)**

**HON BERNARD GEORGES**

...e zot ava vwar ki kantite Seselwa ki annan en rezon pou desann pou selebre! Zis vini.

*(Interruption)*

**MR SPEAKER**

*Order!*

**HON BERNARD GEORGES**

Mr Speaker Mosyon ki devan nou i en Mosyon tre, tre enportan. I en Mosyon ki malerezman apard lo nou kote latab, sa Mosyon i pa'n ganny adrese par sa lopoziyon ki sipoze isi dan sa Lasanble, pe travay pou anmenn soulazman pou ed nou amelyor sityasyon Seselwa.

Sa Mosyon ki Onorab William in anmennen, parey tou bann Mosyon ki Onorab William i anmennen, in sezi loportinite pou li *focus* lo en size ki ekstrememan enportan.

Sirtou la ozordi kot zis apre ki nou'n sorti dan *COVID*, nou'n re antre dan en sityasyon problematik enternasyonal avek lager ant Larisi avek Ikrenn. Nou tou nou konn sa.

E nou tou nou konnen ki napa en pei - Sesel pa en leksepsyon - ki pou ganny eparnyen par sa bann move tanpet ki lemonn pe pas ladan.

E sa Mosyon i demann nou *focus*, e demann avek nou Gouvernman revwar bann Polisi pou zot e pou nou kapab alimant bann Seselwa. E fer sir ki toultan nou annan en sekirite lo kestyon manze. Se tou sa ki sa Mosyon pe koz lo la.

Sa Mosyon pa pe koz lo trezyenm mwan. Sa Mosyon pa pe koz lo Bidze, sa Mosyon pa pe koz lo en *S.I.* ki'n vin devan Lasanble e ki pa'n ganny adrese. Sa Mosyon pe koz lo sekirite alimanter. E dan sa pti gin letan ki mon anvi pran apre midi Mr Speaker, akoz tou keksoz ki ganny dir lo nou kote latab in fini fer le pwen lo sa Mosyon, mon ti a kontan zis partaz enn de refleksyon avek nou Manm Lasanble e avek Lepep Seselwa.

Premye refleksyon, se ki *COVID* in montre nou, in donn nou en leson lo sekirite alimanter. In montre nou ki nou pa kapab depann lo ni bato, ni avyon, pou anmenn manze dan nou pei ler i annan en kriz.

In montre nou fodre nou vin pli rezilyan koman en pep, e ki nou kapab prodwi plis isi



lokalman pou nou ler en lot kriz i arive, nou ava annan sa rezilyans ki nou bezwen annan. Sa se premye lesan ki *COVID* in montre nou.

E Mr Speaker dan sa peryod 1an ou 2an ki *COVID* in dire isi, mon felisit bann prodikter Seselwa, akoz zanmen nou'n vwar otan prodiksyon lokal ki nou'n vwar pandan sa 2 lannen.

Partou kot ou ti pase bazar ti plen. Bazar ti plen avek legim avek fri, avek tousord kalite keksoz. Alor Mr Speaker nou pep i konpran sa bann keksoz, e nou konnen koman en pep ki ler nou bezwen prodwir nou *step up* e nou prodwir.

Alor Mr Speaker bravo pou bann prodikter ki montre nou ki zot la dan letan dir, pou fer sir ki nou annan sifizaman keksoz pou nou manze.

Mendev ek dezir pa ase. Nou annan nou en gro problemm isi Sesel, e nou tou nou konnen. E sa se ki later Mahe, Praslin avek La Digue napa ase. Later lagrikiltir napa ase. E la mon ava dir ki dan lepase - mon bezwen dir sa - bokou later lagrikiltir anba Ladministrasyon presedan, ti ganny servi pou fer lakaz olye garde pou fer lagrikiltir.

E nou'n vwar dan bokou landrwa, lakaz pe ganny fer dan plato kot lagrikiltir ki devret ganny fer;- Mahe, Praslin ek La Digue tou le trwa. In en move planifikasyon ki nou ozordi nou bezwen sibir le konsekans. Me akoz nou later i pov e partou kot ou anvoy en pyos swa ou tap avek en ros si ou dan montanny, swa ou tap dan disab ler ou dan plato, nou pa kapab prodwir a sa nivo ki nou ti devret pe prodwir. Donk sa se nou premye problemm.

Nou dezyenm problemm se, kot nou annan later ki plat, i lo en zil elwanye e nou annan problemm anmenn mendev laba, e anmenn prodwi isi Mahe, ki fer monte nou pri.

Alor Mr Speaker, avek sa bann defi nou bezwen - e se sa ki Onorab William pe demann nou ozordi nou bezwen *think outside the box*. Nou bezwen trouv bann fason pou nou parey in ganny dir a plizyer repriz lo sa kote latab, nou bezwen trouv bann fason inovatif pou nou travay avek bann defi ki nou annan.

Lo lot kote nou annan en lanmer ki *super rich*. Nou annan bann gran kargezon - bann gran pwason tou sord kalite, ton. Nou annan menm lapres artizanal, nou annan

sifizaman pou sibvansyon nou bezwen.

Alor nou bezwen fer en balans ant larises nou losean avek lapovrete nou later. Oubyen nou distans ki nou bezwen ale, pou nou kapab anmenn lagrikiltir a en nivo. E pou nou kapab fer sa Mr Speaker fodre nou kapab parey mon'n dir *think outside the box*, e anmenn bann nouvo linovasyon.

E nou pa bezwen re envant larou, me nou bezwen fer li vin pli performan. Se tou sa ki Onorab William pe demann nou fer. I pa pe demann avek Gouvernman anmenn stratezi. I pa pe demann avek Gouvernman mazin en keksoz nouvo. I pe zis demann avek Gouvernman revwar sa stratezi ki nou annan, pou fer sir ki parey nou ti ete dan letan *COVID*, nou kapab vini - pa zis ler nou annan en kriz, me a tou moman tou diran lannen.

Alor Mr Speaker sa mon ti ava kontan sizere apre midi se sa bann keksoz swivan;- Premyerman bann defi. E nou tou nou konnen ki bann defi, later, mankman later, finans, mankman finans avek stok, mankman stok. Sa nou tou nou konnen, nou pa bezwen demann avek Gouvernman re

envant larou, zot konnen e zot pe adres sa parey Onorab Gervais Henrie ki ti koze taler in eksplike, Gouvernman in fini met an mars en program pou adres sa bann defi.

Lo kote later i annan 3 fason pou nou prodwir oubyen ogmant prodiksyon agrikol. Enn, se bann *backyard farming* parey pe ganny fer. Nou bezwen kontinyen avek.

En lot se laferm tradisyonnell parey nou vwar Val Den Dor, Amitie Praslin. Dan tou bann landrwa nou bezwen kontinyen avek sa. Me trwazyenmman fodre nou annan ban nouvo inovasyon lo sekte plan ek legim. Me osi lo Sekte *Livestock*. Nou bezwen kapab re mazin ki mannyer nou pou fer lagrikiltir vin diferan.

E ankor enn fwa bokou lide in ganny donner lo sa kote latab. Lo ki mannyer nou kapab fer *vertical farming* ki pou kapab al plis dan *hydroponics* akoz nou later pa sifizan e i pov.

Se la kot mon krwar Mr Speaker kot Gouvernman i bezwen vin pli inovater. E se sa i bezwen revwar son stratezi, al plis dan sa bann domenn, akoz se sa bann domenn ki pou sibvansyon nou demen.

I byen pou nou dir Coetivy i en teren agrikol. E vre

i en teren agrikol me, defi pou prodwir lagrikiltir Coetivy nou tou nou konnen kot i ete.

Me i annan bann lezot keksoz, e en msye pe dir mwan lotrozour enn bann keksoz pli fasil ki nou kapab fer se pran bann bef, bann zebi *Madagascar*, met zot lo en zil, li in dir Farquhar - mwan mon pa tro dakor avek Farquhar pou lezot rezon. Me met lo en zil e elve bef. E nou kapab fer mouton, nou kapab fer kabri osi parey *IDC* pe fer dan lo sa bann zil.

Alor i annan bann posibilite ki nou kapab fer ki nou pe, ki nou bezwen mazin. Alor mon bann zanmi olye asize apre midi e koz lo trezyenm mwan, e koz lo Bidze e anmenn tou sord kalite largiman lo lekel Minis ki ti devret vin devan Lasanble, akoz en Minis pa'n reponn en kestyon ki ou'n demande lo en *S.I.* annou *focus* lo sa ki sa Mosyon pe demann nou, e annou anmenn bann lide tel parey zot, zot bezwen fer koman en lopoziyon responsab. Zot, zot bezwen anmenn sa bann lide pou ed Gouvernman.

Akoz si zot pa pe fer li, be pa vo lapenn zot la! Akfer ki zot isi dan sa Lasanble si sel keksoz zot pou fer se opoze, opoze, opoze, epi vot kont? Kote sa

pou anmenn zot mon bann zanmi? Akoz demen ler zot pou al kot *STC*, demen ler zot pou al kot sa pti bazar Roche Caiman pou aste en keksoz, zot osi zot bezwen manze. Zot osi zot pou bezwen sa sekirite alimanter.

Mr Speaker lo kote lanmer nou bezwen kontinyen avek lapes artizanal. Nou bezwen kontinyen avek lapes endistriyel. Me nou bezwen osi *focus* lo plis transformasyon nou bann pwason, non selman pou eksporte, me osi pou konsonmasyon lokal.

E deza mon kontan vwar ki i annan plizyer lakonpanyen ki pe deza fer sa, e ki pe ofer sa servis. Dan magazen konmela ou vwar sa bann keksoz.

Me osi nou bezwen kontan pa kontan al dan *aquaculture*. Akoz tel parey nou pe al dan idroponik lo later nou bezwen al dan son lekivalan dan lanmer. Nou tou nou konn sa Mr Speaker. E sa ki sa Mosyon pe demann nou se eski Gouvernman mazin en transformasyon, parey ou pe fer dan tou bann sekter. Mazinen transformasyon dan Sekter Agrikol osi ,pou ki nou ava annan nou sekirite alimanter.

E finalman Mr Speaker, mon anvi konklir lo en not pozitiv. Nou en pep rezilyan.

Nou en pep inovater, nou en pep ki adapte avek diferan sirkonstans lavi. *COVID* in montre nou sa, *Airport* in montre nou sa. Ler da en pti peryod letan nou popilasyon in sorti koman en popilasyon agrikol e in vin en popilasyon touris.

Landrwa kot nou viv in montre nou sa. Nou'n sorti koman en popilasyon ki reste dan lakaz, e nou'n vin en popilasyon prezan ki reste dan flat.

Akoz nou'n realize ki pa tou dimoun ki kapab annan en bout later pou li viv, pou li fer en lakaz lo la. Nou pep i adapte Mr Speaker. E nou pep pou adapte avek sa bann nouvo *challenge* ki devan nou.

Alor Onorab William, les mwan remersye ou lo lapar nou kote Lasanble, aköz mon pa kapab koz pou lot kote, aköz nou'n fini war lapant ki zot, zot pou pran.

Les mwan remersye ou pou nou elev nou konsyans koman en Lasanble e koman en Nasyon, lo sa problem sekirite alimanter. Aköz i tro fasil pou nou bliy kot nou sorti Mr Speaker.

E i vre ozordi nou ver i lanmwatye plen. Annou pa les li aköz en *COVID*, oubyen aköz en lager *Ukraine* re vid ankor.

Annou kontrè fer sir ki nou ver i pa pou zis en lanmwatye plen, me i pou plen an antye.

Avek sa de mon Mr Speaker mon remersye ou e mon asir Onorab William sipor sa kote latab pou son Mosyon, aköz son Mosyon i merite.

### **MR SPEAKER**

Mersi Onorab. Mon prezan apel Onorab William pou fer son repons e konklizyon lo deba. Onorab.

### **HON WAVEN WILLIAM**

Mersi Mr Speaker. Mr Speaker mon pa pou long dan mon konklizyon. Me mon anvi remet lanfaz lo ki mon Mosyon pe dir.

Enn, se son tit se: -

Prenon kont sityasyon lensertitid mondyal, konfli zeopolitik e latak pandemik, e reperkizyon global ki zot in anmennen, Lasanble i demann Gouvernman pou revwar stratezi pou garanti en serten nivo sekirite alimanter nasyon e soutenab.

Mr Speaker, mon pa pou antre dan bann largiman e desann dan sa rigol labou, ki Lopozizyon zot pe sey trenn mwan ladan. Me mon pou dir ki mon'n apresye bann kontribizyon ki annan bokou valer ki'n sorti lo sa kote latab isi.

Mr Speaker mon konpran dilenm Lopoziyon par lefe ki zot pa'n aksepte e pa'n aprouv pou vin lo sa Komite Sekirite Alimanter e Devlopman Soutenab, mon kapab konpran kontradiksyon parmi zot e aköz ki zot pa pou kapab sipòrt sa Mosyon lo sekirite alimanter.

Mr Speaker, i bon ki Seselwa i pran *stock* sey evalye e *assess* Sesel koman sa Pti Leta Zil. E pa separ Sesel avek larestan lemonn. Konsyan sa ki pe arive otour nou. Mr Speaker letan ki nou ti Kigali mon'n vwar en dokimanter kot bann *ice cap* dan Nor Pol pe fonn pli vitman.

E ki i vedir pou pti Sesel letan nou pe koz loz lo *sea level rise* Mr Speaker, kot tou bann devlopman i konsantre lo plato. E si ou pa anmenn inovasyon e nouvo teknolozi ki ou kapab servi dan fore, ouswa lo montanny, Mr Speaker nou sekirite alimanter pou dan problemm.

Mr Speaker bokou bann lezot legzanp in ganny donner, e lefe ki nou'n kre sa Komite i pou donn mwan lokazyon aköz mon en Manm lo sa Komite, pou mwan kapab met mon bann pwennvi e fer mon kontribisyon pozitiv lo la ki mon krwar i enportan pou pei.

Mr Speaker, i enportan ki sa size i osi form parti baz ledikasyon dan lekol. Aköz Mr Speaker nou, nou la demen nou pe ale me sa zenerasyon ki pe monte pou enportan ki i ganny konsyantize Mr Speaker, pou li kapab kontinyen avek sa zefor ki nou, nou pe fer ozordi.

Mr Speaker, i osi enportan ki dan nou distrik koman Manm Elekte nou osi anmenn bann program konsyantizasyon, ki nou pep dan distrik zot osi zot vin pli konsyan e pli responsab dan fason konsonmen e dan nou *lifestyle* Mr Speaker.

Mr Speaker pou terminen mon ti a kontan sit enn de vers dan Labib aköz mon konnen ki bor mon debout Mr Speaker. Si serten pa konnen ki bor zot debout, mwan mon konnen ki bor mon debout Mr Speaker.

E mon pou sit verse 8 dan Proverb sapit 14.

*“The wisdom of the prudent is to discern his way, but the folly of fools is deceiving”.*

Mon repete Mr Speaker.

*“The wisdom of the prudent is to discern his way, but the folly of fools is deceiving”.*

En lot vers Mr Speaker dan sapit 15 Proverb i dir: -

*‘The tongue of the wise commence knowledge but the mouths of the fools poured out folly’* Mr Speaker. Mersi bokou.

*(laughter)*

**MR SPEAKER**

Mersi Onorab. Bon mon ava apel bann Manm pou vot lo Mosyon. Manm ki an faver lev lanmen silvouple?

Mersi. Manm ki kont?

*Thank you.* Vot lo Mosyon anmennen par Onorab Waven William, 21 Manm in vot pour, 0 kont e 8 in *abstain*.

Donk sa Mosyon in ganny aprouve par Lasanble.

Mersi bann Manm pou zot kontribisyon. Nou pou termin nou louvraz pou ozordi la. E mon rapel zot ki Lasanble pe zwenn demen 5er pou en ladres par Prezidan Larepublik. Mersi e bonn sware.

***(ADJOURNMENT)***